

Basef Amama Bu'wami Matyu Nanda'ami

Basef bandami Matyu nanda'ami

1:1–2:23 Bafasana Akusana Jisas natagasi

3:1–12 Jon aman anama napisi'as embeli nawalipasa basefa Jisas

3:13–4:11 Jisas nofa' baptais ea' Satan nafi'i nagwambana ma neanda' waf aonai

4:12–18:35 Jisas nafe' etap hiagoma Galili nawalipasa basef bu'wami nanda'as hiesi awes naninani nanda'asi sataga bo'wes

19:1–20:34 Jisas nakwaha etap hiagoma Galili nafe' etap hiagoma Judia nawalipasa basef bu'wami

21:1–27:66 Jisas nafe' Jerusalem nawalipasa basef ea' sanda'mana basef saundana naga' lawag usi'inai tu'wanainai

28:1–20 Jisas nahafel wapoti' nase'asa maol alupisi ananisi ma ea' nalata heven ilif

Agofa epes hiesi bafapana Jisasi

(Lu 3:23-28)

1 ¹Wambota anama bafapana akupana Jisas Kraisi amama. Jisas nataga wambota Deviti, Devit nataga wambota anama Abrahami. ²Bafasas ehasas wambota atama Abrahami isima. Nogalomana Abrahami Aisak. Nogalomana Aisaki Jekop. Ea' Jekop ahalomana Judai naloma sahopana owalopana ananimi. ³Juda ahalomana Peres naloma Sira. Mama'wam amamu'wi Tamar. Ea' Peres ahalomana Hesron, ea' Hesron ahalomana Ram. ⁴Ram nogalomana agilinama Aminadap. Ea' nogalomana Aminadap Nason. Ea' nogalomana Nasoni Salmon. ⁵Ea' Salmon nogalomana agilinama Boas. Boas mama'wana Rahap. Boas nogalomana agilinama Obet. Obet mama'wana Rut, ea' Obet nogalomana agilinama Jesi. ⁶Ea' Jesi anan ahalomana dembinai king Devit.

Devit naso' ano'w nemata'w fowa' Uria nase'akwi nola king Solomon.

⁷Ea' Solomon nogalomana agilinama Rehoboam, ea' Rehoboam nola

Abiya. Ea' nogalomana Abiya agilinama Asa. ⁸Asa anan ahalomana Jehosafat, nola Jehoram. Ea' Jehoram ahalomana Usia. ⁹Ea' Usia nola Jotam, Jotam nola Ehas ahalomana Hesekia. ¹⁰Hesekia nogalomana agilinama Manase, ea' Manase nola Emon. Emon ahalomana Josaia. ¹¹Ea' Josaia nola Jekonia naloma owapana ananiami maloma ahalomam mama'wam safe' sanda' kalabus sapani wambel Babilon laugoma.

¹²Esis sofa'as sembalomas la'ifis sapani Babilon, Jekonia nogalomana ananinai agilinama Sealtiel, ea' Sealtiel nola Serubabel. ¹³Serubabel anan ahalomana Abiut ea' Abiut nola Eliakim. Nogalomana ananinai agilinama Asor. ¹⁴Asor nogalomana agilinama Sadok, ea' Sadok ahalomana Akim. Akim nola Eliut. ¹⁵Ea' Eliut nogalomana agilinama Elieser, ea' Elieser ahalomana Matan. Ea' Matani nola Jekop ahalomana Josep. ¹⁶Josep anama naso' Maria. Ea' Maria kola Jisas, dei' esis sa'i anan Kraisi Dembinai God nandandepana nasapa'ana nafi'i. ¹⁷Amam bafapana akupana Jisasi fowa'imi seambam mataga na'ama. Amam amama Abraham nolam magi' matagai mafi'i matagama Devit, amama seambam mataga 14-peleim. Ea' amam amama Devit nolam magi' matagai mafi'i matagama nemaf anama naumbih safi'i sofa' esis Israel safe' sanda' kalabus sape wambel Babilon, amama wapoti' 14-peleim. Ea' amam amama esis Israel sanda' kalabus Babilon solam magi' matagai mafi'i matagama nogota Kraisi nataga anai, amama wapoti' 14-peleim.

Maria kola Jisas

(Lu 3:23-28)

¹⁸Fowa' Maria kola Jisasi Kraisi, basef amama mape na'ama. Mama'wana Maria esis sa'i akwa'w kose'a Josep, ea' esis bias ina dei' sandase'ama, ata' owa'etin. Ea' sati Maria kofa' opafa Ambal Bu'unai Godi nafi'mai akwa'w ea' opafu'w. ¹⁹Waulunama'w akwo'unai Josep anan aman bu'unai. Anan nandaiwa'ma neanda'akw ambal aol. Na'ama okom na'i nondambaho' nokwaho'w kopan etin. ²⁰Anan nape ata' okom nandanda'ma amama atom, ea' na'oh nandondo'oh, anona ensel Dembinai natagamana na'ipana na'i, "Josep, ine' akunamena Deviti, ina umbamehenama neao'wa waulu'mina ine'ikwi Maria, owa'. Dei' main, awani inima napei'wi, Ambal Bu'unai Godi nafi'mai akwa'w. ²¹Nambimb kola awani aman, awani inima anan nigiangbama amam nematawa hiesi ma neakwaha waf aonai asasinai nofa'as sotaniamani. Na'ama dei' ine' nenda'managel Jisasi. Basef ofagema ma agel anama na'i, anan aman nofa' epes ananisi ma seape andeande'." ²²Amamaga amama hiami mataga na'ama si'i anom basef Dembinai nase'anam malogel anona aman profet fowa'inai, dei' mataga endilisi. Fowa' gani profet anama na'iam na'ama na'i,

²³ "Owagama ano'w nemata'w awiawai'wi owa' kwease' amani opafu'w. Ea' kola enin awani aman agel ananinai Emanuel."

Agel anama ofagena na'iam na'ama na'i, "God nape naloma ape!"

²⁴⁻²⁵ Ea' Josep na'oh nandamboma nanda'am si'i ensel na'ipana. Ea' naila basef amama nao'wakw ea' esis ina sandase'ama sapan etin, owa'. Ata' sape deindei safe'ma akwa'w kola awani aman. Ea' nanda'managel Jisas.

Amam gawaimi owa' mogawa Godi mafi'i mati Jisas

(Lu 2:1-7)

2 ¹ Maria kola Jisas Betlehem, etap hiagoma Judia. Nogota anama anona aman king Herot dembinai ma gavman nape numafi enis epes sape anona etap hiagoma Judia. Akwa'w kolana ea', anom amam dambami gawaimi owa' mogawa Godi mafi'i laogoma gani aon natefima mafi'i mafi'i mataga Jerusalem ea' mahali'as ma'i, ² "Dei' awani dambaini nataga king dembinai esis Judai nape eti? Afa' ata' wapani gani aon natefima, wati ondo'w anani'wi kwatefi, ea' dei' wafi'i wa'i onda' lotumana ofela agel ananinai."

³ Nema'f anama Dembinai King Herot name' basef amama, okom ananinai aona natanea nafe' na'i nambimb awani inima netaga damben nili'amonana. Ea' esis hiesi sape Jerusalem wapoti' umbamahas sa'i nambimb nema'f aonai notaga. ⁴ Ea' king Herot nefala amam pris hiami dambami maloma amam dambami mawalipasa mi'uli Godi hiami mafi'i ea' nahali'am na'i, "Aman anama Krai's God nandandepana nosapa'ana niefi'i, nambimb anan neataga wambel enima?"

⁵ Ea' amam magwamana basef ma'i, "Mama'wana kolana Betlehem, etap hiagoma Judia. Dei' main, anona profet fowa'inai na'i basef mail okwatip ma'i, God na'i,

⁶ 'Ipe' Betlehem etap hiagoma Judia, ipe' ina epes falafipei, owa'. Ipe' ina pape pagi' ma amam gavman dambami mumafi ipe' Judia, owa'. Dei' main, anona Dembinai anona nema'f neataga wambel ipe'inai Betlehem. Anan nope dembinai ma ipe' amam nematawa Ae'ipei Israel ea' numafi ipe' hipei ma peape andeande'."

⁷ Ea' king Herot nandambaho' etin nofalai amam gawaimi amama mafi'i aon natefima mandambaho' mandatama etifigin nahali'am na'i, "Maina nema'f ipe' pati ondo'w akwama kwataga?"

⁸ Amam ma'ipana ma ea', king Herot nasapa'am mafe' Betlehem na'ipam na'i, "Ipe' fo'o pegolopa awani inima. Ama pitilin, pifi'i pi'ipa ae' wapoti'. Ae' wapoti' a'i efe' itilin enda' lotuman efela agel ananinai lu'una wapoti'."

⁹ Amam mame' basef ananiami ea', mohafel makwaha anan mafe' mati ondo'w akwama fowa' mali' matolo'w gani aon natefima, kwafe' kwali'amam. Ea' kotawa ipat anama ilif awani inima Jisas napeinai.

¹⁰ Amam mati ondo'w akwama kotawa na'ama ea' wandanifel endilisi.

¹¹ Ea' mawis ipat anama mati awani inima naloma mama'wana Maria. Ea' amam mindiwa nembawa motawa manda' lotumana mafela agel ananinai lu'una. Ea' mupalia paus amamumi mowafa hiahaom amama amam matalom otamba lu'wami alogw bu'wami ma'ami mase'anam. Ea' mase'ana gol naloma enin paura sa'i frankinsens, alogw bu'wami ma'ami maloma anom sanda bu'wami sofalam sa'i mer, mase'anam awani inima Jisas. ¹² Mase'anam ea', God na'ipam na'i, "Ipe' ina ata' pitanima pefe'ma king Herot, owa'. Ea' pila anona eaf pitanima pefe' wambel ipe'inai."

Ea' amam maila anona eaf motanima mafe' wambel amamunai laogoma.

**Josep naloma waulu'mana sao'wa awani Jisas safe'
sapani gani laogoma etap hiagoma Isip**

¹³ Amam amama gawaimi mafe' ea', Josep na'oh nandondo'oh anona ensel Dembinai nafi'mai anan na'ipana na'i, "Ine' hafel ne'wa awani inima neloma mama'wana anani'wi pefe' laogoma etap hiagoma Isip. Ea' pipani Isip ama nambimb peme' ae' i'ipina wapoti', pitanimani. Dei' main, King Herot atuwasu ni'ipa soldia ananimi mogolopa awani inima ma mohan neaga'."

¹⁴ Ea' Josep nehafel owamb anama atona nao'wa awani naloma mama'wana Maria safe' Isip laogoma. ¹⁵ Josep napani Isip ama King Herot naga', ea' nao'was sotanimani si'i anom basef Dembinai God na'ipa anona aman profet, amama dei' mataga mandawalap ma'i, God na'i, "Nogalome ae'anai napani Isip ea' ae' efalana notanima nafi'i."

King Herot na'ipa soldia mafe' maha awasi amam hiami maga'

¹⁶ King Herot nogawa amam amama gawaimi ina mutanimani, owa', mambaso'mana mafe' anona eaf. Ea' okom ananinai wandafuna kwapete' na'i noha Jisas neaga'. Dei' anan okom nandanda'ma basef amama amam gawaimi mali' ma'ipanam ma nemaf anama ondo'w kwataga anai. Na'ama dei' nasapa' anom soldia mafe' Betlehema wambel anama nape felefele'i maha awasi amam hiami dei' solam dambaim mafe' mataga afagof biam malo'ami maga' hi'alam.

¹⁷ Ea' dei' anom basef fowa' God na'ipanam profet Jeremaia mataga endilisi mandawalap. ¹⁸ Anan na'i,

"Esis sape anona wambel Rama same' esis salef. Esis salef sandahowe mehup sa'i uwahipisa awasi sa'i, 'Ano'w nemata'w Resel kwalopa batawisa'w akwa'usi, kwandaiwa' ma nambimb enis sonda' okom akwo'unai bo'ona awanena, owa'. Dei' main, awasi akwa'usi saga' hi'alas.' "

Josep naloma waulu'mana sao'wa awani sotanimani safe' Nasaret

¹⁹ Josep ata' napani Isip ama King Herot naga', ensel Dembinai Godi nafe' na'ipana ma na'oh nandondo'oh ²⁰ na'i, "Ine' hafel ne'wa awani

neloma mama'wana anani'wi pitanima pefe' etap hiagoma Israel. Dei' main, amam ma'li meaha awani neaga' maga' hi'alam.”

²¹ Ea' Josep nesafel nao'wa awani naloma mama'wana anani'wi safe' sataga etap hiagoma Israel. ²² Ea' Josep name' basefa anona aman Arkelaus king Herot nogalomana nataga nofa' wambel naho'ofana nape dembinai king ma esis Judai. Ea' Josep umbamahana ma neafe' Judia. Ea' na'oh nandondo'oh wapoti', God na'ipana ma neafe' anama etap hiagoma Galili. ²³ “Ea' nafe' nape enin taun sa'uni sofalagon Nasaret si'i anom basef amam profet fowa' ma'iami ma'i, “Owagama esis sofalana si'i Nasaretinai.”

Basef amama dei' mataga mandawalap endilisi.

Jon napisi'as embeli anan nawalapa basef bu'wami

(Mk 1:2-8; Lu 3:1-18; Jo 1:19-28)

3 ¹ Nimeguf hiami ma nogota anama anona aman Jon napisi'as embeli nafi'i nape anona etap hiagoma Judia wafiguma fatauguma ² ea' nawalapa basef bu'wami na'i, “Nemaf anama bu'unai ea' felefele' notaga ma epes siowis kingdom heveni. Na'ama dei' ipe' pewa' alafugaha waf aonai pemboma opalef pefe'ma God.”

³ Ea' Jon nafe' na'ipasa basef amama si'i anona profet Aisaia fowa' na'iami na'i,

“Owagama malogel anona amani noga ni'i anona etap wafiguma fatauguma ni'i basef na'ama ni'i, ‘Pendandomba eaf Dembinai nefe' usi'ina, penda'manana andeande.’”

⁴ Luwaguf Jon nalami^b sanda' auf anom mafis lu'wami kamel sanda'am, ea' nowaho' anota let sanda' agwahup mafinina sanda'anai. Gwa'aimi ananimi na' gwamu'wis maloma aupimbel aolupumi. ⁵⁻⁶ Nogota anama amam nematawa sape Jerusalemi saloma hiesi sape etap hiagoma Judia ea' wambel anama felefele'ma walemb Jordan hiagoma, hiesi safi'mai Jona neapisi'as embel. Esis sawalapa waf aonai esis sanda'anai ea' Jon napisi'as walemb Jordan. ⁷ Afama Jon nati anom amam dambami esis Judai Farisi maloma anom dambami Sadyusi mafi'i ma mefa' baptais, ea' na'lipam na'i, “Ipe' panda' waf aonai si'i awasi iguf awami molaipei. Emi na'lipa ma pa'i pefa' pefe' pindihi'ama okom wandafunai Godi anona nemaf neatagamepa?

⁸ Ipe' pemboma opalef pewa' alafugaha waf aonai ipe'inai, ea' penda' waf bu'unai ma pihi'ambas ipe' pamboma opalef endilisi paila waf

a 2:23 Lu 2:39; Ais 11:1, 53:2; Mt 12:34, 23:3 **b 3:4** Klos Jon nalami amama atom si'i fowa' gani profet Elisa nalami. Anom basef mail Ol Testameni ma'i nemaf anama Kraisi niefi'ianai, profet anama Elisa nili' nifi'i. Ea' esis Juda sati klos Joni sa'i Jisas ma'una anan Kraisi.

bu'unai. ⁹Ipe' ina ukup mondanda' mi'i, 'Abraham anan ahalomapa ape'inai', owa'. Ae' a'ipipa endilisi, God anan la'ifinai ma nonda' otamba amama motaga epes si'i awasi Abrahami. ¹⁰Tamia'w kwa'oh lawag ofagema. Lawah hiami owa' mola su'utip bu'wami, anona nemaf solam sotopa'am sokwahom mefe'ma nif.

¹¹Ae' dei' apisi'ipa embela pih'i'ambas ipe' pamboma opalef pakwaha waf aonai pafe'ma God. Anona aman nambimb nigima ae' ni'ifi, anan la'ifinai nikila' ae'. Anan nenda' baptaisimepa Ambal Bu'unai Godi nope nolomepa nese'epa nif la'ifimi wapoti'. Ae' ina aman bu'uwei ma eatagaha mandelefa su ananimi, owa'. ¹²Anan nahapila anol savol lagof ananimi ma niesimba'am wit si'i rais amama andeande'. Ama nefa' bu'wami nuwis nembe'am ipat ananinai. Awami nembefam nofam nif amama lu'wami fandom mape la'ela'efi."

Jon napisi' Jisas embel
(Mk 1:9-11; Lu 3:21-22)

¹³Nogota anama Jisas nakwaha etap hiagoma Galili nafi'i walemb Jordan, ea' nafi'mai Jon ama neapisi'ana embel. ¹⁴Ea' Jon na'i nosopama Jisas nai'pana na'i, "Ae' ina aman bu'uwei ma iapisi'ina, owa'. Ine' nipisi' ae', andeande'. Dei' ine' nafi'mai ae' ma main?"

¹⁵Ea' Jisas nagwamana basef na'i, "Ine' nenda'meam si'i ae' a'ipina. Afa' biafa onda'am na'ama ma ondahama waf hianai bu'unai, si'i God na'iam."

Ea' Jon na'i a'e napisi'ana. ¹⁶Jisas nofa' baptais nakwaha embel walemb nandagiai etin, heven nandausi' ma anan, ea' nati Ambal Bu'unai Godi nafi'mai anan, si'i amil mai'una nufia' nisila'manai. ¹⁷Ea' anona maf na'i natagai heven na'i anom basef na'i, "Aman anama Nogalome ae'anai endilisi. Ae' okom nainailana endilisi. Okom ae'anai bo'ona ma anan."

Satan nagwamba Jisasa neanda' waf aonai
(Mk 1:12-13; Lu 4:1-13)

4 ¹Ambal Bu'unai Godi nofa' Jisas nafe' anona etap fatauguma wafiguma ma Satan nagwambana neanda' waf aonai. ²Jisas nape aon si'inai tu'waninai, ina na' gwa'aimi, owa'. Nolomahana. ³Ea' aman anama Satan nagwamba epesi nafi'i na'ipana na'i, "Ine' na'i ine' Nogalomana Godi, dei' kipa otamba amama ma'oh etapi motaga si'i bret."

⁴Ea' Jisas nagwa basef na'ipa Satan, na'i, "Baibel na'i, 'Bret atona ina nose'asa ambagof namumi epes, owa'. Ape' ukup mopoma basef motaga malogel Godi atom monda'apa meape la'ifipa.'"

⁵Ea' Satan nao'wana nondowasa' Jerusalem nahaponana naitu ipat Godi lu'unai sanda' lotuwanai sanda' lotuwanai ilif. ⁶Ea' Satan na'ipana na'i, "Ine' na'i ine' Nogalomana Godi, dei' nukupa' newa etap. Dei' main, basef mail Baibeli ma'i na'ama ma'i,

'God ni'ipa ensel Ananimi mifi'i muhapilina lagof amamumi mumafina ma otamba ina moha bo'wagah ine'imi, owa!'

⁷Ea' Jisas nagwamana basef na'i, "Anom basef Godi wapoti' mape na'ama ma'i,

'Ipe' ina pegwamba dembinai God ipe'inai neanda' waf aonai, owa!'

⁸Ea' Satan nao'wana mafe' wapoti' anona halaf launai endilisi nihi'ambana amamaga hiami bu'wami endilisi mape etap hiagoma maloma amam nematawa hiesi. ⁹Ea' na'ipa Jisas na'i, "I'i ine' nindiwa nembawa netawa neanda' lotu nendanifela ae', ese'ena amamaga amama hiami ine'imi atom."

¹⁰Ea' Jisas nagwamana basef na'i, "Satan, nekwahae fo'o. Dei main, Baibel na'iam na'ama na'i,

'Ipe' penda' lotuma Dembinai God ipe'inai atona ea' penda' opeh ananimi atom.'"

¹¹Ea' Satan nakwahona nafe', dei' ensel Godi mafi'i magiambama Jisas mumafiana.

Jisas nafela maol nanda'ana gani etap hiagoma Galili

(Mk 1:14-15; Lu 4:14-15)

¹²Jisas name' basefa Jon nanda' kalabus, ea' nehafel nakwaha Nasaret nafe' etap hiagoma Galili. ¹³Ea' nakwaha wambel ananinai nafe' Kaperneam, nape felefele'ma walemb batupa'manai lu'unai Galili, anona etap agilinama Sebulun naloma Naptali. ¹⁴Ea' nafe' nape etap anama si'i basef fowa' anona profet Aisaia na'iam dei' mataga mandawalap endilisi. Anan nanda' basef amama na'i, God na'i,

¹⁵"Etap anama Sebuluni Naptali felefele'ma etap anama eaf nafe' nataga naoh. Etap anama wambel Jordan fisamb, wambel hiagoma agel lu'unai Galili. Esi wambel anama hiagoma ina sogawa basef Ae'ami, owa!. ¹⁶Ea' sape si'i epes isima sape owamb atonai, si'i saga'i. Owagama gani sieti owaf lu'unai niluwi sotologon andeande!'"

¹⁷Ea' dei' Jisas nafela maol na'ipasa basef la'ela'ef. Nawalipasa basef amama na'i, "Nemaf anama bu'unai felefele' neataga ma ipe' piowis kingdom heveni. Na'ama dei' ipe' pemboma opalef pefe'ma God."

Jisas nofalai amam biamibiama mailana

(Mk 1:16-20)

¹⁸Jisas naila akata nafe' etin walemb batupa'manai lu'unai Galili, nati amam biam Saimon Pita naloma owalomana Andru. Amam mala anemb magi' agof manda' bisnis. ¹⁹Anan nati amam biam na'ipam na'i, "Ipe' bipa pifi'i pembalo'a basef ae'ami pila ae'. Fowa' ipe' pagi agof, ea' dei' ihi'ambepa pefe' pi'ipa enis epes sila ae!'"

²⁰Ea' amam mame'ana mohafel mehip makwaha anemb ma'oh mailana mafe!. ²¹Ea' Jisas na'i nindiki'ah nafa'o felefele' ea' nati anom amam biam wapoti' Jems naloma owalomana Jon maloma ahalomam amamunai Sebedi. Amam matoma bot mape magundisa anemb amamumi. Ea' Jisas nofala amam biam Jemsi Jon. ²²Ea' mohafel mehip makwaha bot mafi'i maila Jisas mafe!. Ahalomam amamunai Sebedi makwahona nape bot.

**Jisas nawalipasa basef amam nematawa hiesi ea' nanda' enis awes
nanda'asi sataga bo'wes
(Lu 6:17-19)**

²³Ea' Jisas nafe' etap hiagoma Galili, nafe' na'ipasa basef bu'wami Godi amam nematawa hiesi nomon ifagw esis Juda sa'i basef sapeimi. Basef bu'wami anan na'ipasami amama ma'i, "Nemaf anama bu'unai nafi'mai ipe!. Ama ipe' hipei piowis kingdom heveni."

Ea' nanda' epes hiesi awes naninani nanda'asi sataga bo'wes wapoti'. Awes main naninani nanda'asi, Jisas la'ifina nanda'as sataga bo'wes. ²⁴Basef Jisasi mohafel mafe'agon etap hiagoma Siria ma nanda' awesisi hiesi sataga bo'wes. Ea' esis Siria wapoti' sofa'ai hiesi awesisi sofa'as safi'mai Jisas. Enis ambagof awami manda'as sahaga sagaol, enis ambagof awami mahas maofas nif, enis same' alop nimanimi lu'wami mahas, enis lagof bo'wagah monda'alasi esis sofa'as safi'mai Jisas nanda'as sataga bo'wes hi'alas. ²⁵Na'ama amam nematawa hiesi sailana safe!. Enis sape etap hiagoma Galili saloma enis sape wambel anama 10-peleina Dekapolis saloma enis sape Jerusalem, enis sape etap hiagoma Judia, saloma enis epes sape walemb Jordan fisanamb esis hiesi sailana safe!.

Jisas nalata anona halaf ilif ea' nape na'ipasa basef bu'wami

5 ¹Jisas nati esis amam nematawa hiesi ea' nalata anona halaf nape. Ea' alupumi ananiami mafi'i mandatama etifigin malomana. ²Ea' anan nafela basef amama laumi nawalipamom.

**Jisas na'ipasa basefa sandanifel endilisi
(Lu 6:20-23)**

³Anan na'i, "Ipe' emi egafipa pegawa ea' ipe' etipa owa' la'ifipama penda' maol bu'unai Godi, dei' ipe' pandanifel pape andeande!. Dei' main, ipe' pawis ea' kingdom heveni.

⁴Ea' ipe' emi egafipa palef papani, ipe' dei' pandanifel ea!. Dei' main, God nambimb nonda' opalef ipe'imi mope bo'om.

⁵Ea' ipe' emi egafipa mamaipama pape sa'ombel owina enis epes, dei' ipe' pandanifel ea!. Dei' main, ipe' anona nemaf pefa' amamaga bu'wami God na'i endilisi ma nease'epam.

⁶Ea' ipe' emi egafipa ukup mehafel ma'ima'i waf bu'unai, si'i nolomahasa gwa'aimi eap pase'asa embel, dei' ipe' pandanifel pape andeande'. Dei' main? Nambimb God nese'epa waf anama bu'unai ukup maimailanai dende'ma ipe' si'ipamana.

⁷Ea' ipe' emi egafipa pati enis epes uwahipis, dei' ipe' pandanifel ea'. Dei' main, nambimb God niti ipe' uwahipipa.

⁸Ea' ipe' emi egafipa ukup mape bo'om andeande' ma waf aonai a'epa, dei' ipe' pandanifel ea'. Dei' main, ipe' anona nemaf piti God.

⁹Ea' ipe' emi egafipa panda' maola pahagofa wandaf patalogamas seanda' waf bu'unai, dei' ipe' pandanifel ea'. Dei' main, God nambimb nofalepa ni'i ipe' awasi ananipei.

¹⁰Ea' ipe' emi egafipa paila waf bu'unai ma enis epes sanda'mepa waf aonai sase'epa nimanimi, dei' ipe' pandanifel ea'. Dei' main, dei' ipe' pawis ea' kingdom heveni.

¹¹Ipe' emi egafipa paila ae' pape na'ama. Enis sandaiwa'ma paila ae' sonda' basef mamumami awami baso'maimi ma ipe'. Ea' sese'epa agof awami endilisi si'i ipe' epes aopei ma sase'epa nimanimi. Esis sonda'epa na'ama dei' ipe' pandanifel ea'. ¹²Opalef ipe'imi mope awanem pepe pandanifel. Dei' main? Amamaga hiami bu'wami ipe'imi ma'oh heven ilif. Esis isima sanda' waf aonai ma ipe' na'ama etin si'i fowa' gani sanda' waf aonai ma profet amama mape fowa'imi.

Enis epes sope si'i soli lam

(Mk 9:50; Lu 14:34-35)

¹³Ipe' si'i sol ama pigiambama epes hiesi sape etapi. I'i sol amama mumbul usihima a'am, owa'etin. Nambimb ipe' penda'am pi'imama usihim wapoti'? Owa'etin. Sol amama mumbul maol a'ama sonda'am, esis sokwahom mefe' etap sofofo'asom.

¹⁴Ipe' si'i lam epes hiesi sape etapi pih'i'ambas. Anagon taun lu'wagoma natoma halaf ilif ina nape nandambaho', owa'etin. ¹⁵Epes ina sakata lamifah sopalo'am ma'oh balata owin, owa'etin. Esis sawamonam balatagw ilifa howealama epes hiesi sape ipat nomon. ¹⁶Ea' na'ama etin, ipe' penda' waf bu'unai si'i lamifah ipe'imi mape alihima howealama naep esis amam nematawai hiesi siti waf bu'unai ipe' panda'anai ma seafela agel Ahalomepa nape ilifi lu'una.

Anona nemaf basef mi'uli Godi nendawalap endilisi

¹⁷Ipe' ina ukup mondanda' mi'i ae' afi'i ma ili'amonam mi'uli Godi neloma basef amam profet fowa' gani mawalipasami, owa'etin. Ae' ina afi'i ma ili'amonam, owa'. Ae' afi'i ma endelam iwapani'am enda'am

c 5:17 Mt 3:15; Ro 3:31, 10:4

motaga endilisi. ¹⁸ d'Ae' a'ipipa endilisi. Basef amama mope mefe'ma amamaga mape ilif etapi moloma otaga etap higililam hi'ilam. Anom basef tu'wanima^e amef sa'usa'umi moloma anom basef bandami mail nomona buk mi'uli Godi, amama mope la'ela'ef hihif na'ama etin mefe'ma maol hianai Godi netaga nendawalap hi'ilana. ¹⁹ Na'ama i'i emi egafis sili'amona anom basef kwawie'ima basef amama mape mi'uli Godi ma esis sihi'amba enis epesa sonda'am na'ama etin, anona nemaf agof epes isima mefe' sa'osa'om ma kingdom heveni.^s Ea' emi egfis sila mi'uli Godi andeande'ma sihi'amba enisa sielana, anona nemaf esis sefa' agof lu'wami ma kingdom heveni. ²⁰ Na'ama dei' ae' a'ipipa a'i, ipe' ukup pepoma amam dambami mawalipasa mi'uli Godi moloma amam dambami Farisi. I'i waf ipe'inai bu'unai owa' nikila' waf amamunai, anona nemaf ipe' ina pefe' piowis kingdom heveni, owa'etin.

Waf okom wandafunai ma epes saha enis saga'

(Lu 12:57-59)

²¹ Ipe' pame' ea' basef amama fowa' gani amam akupipa mofa'ami ma'iam na'ama ma'i, 'Ipe' owa' peha enin epen neaga'. I'i enin neha enin epen nega', epen inima nambimb netagama basefa kot.' ²² 'Dei' ae' a'ipipa a'i, emi epen okom wandafuna ma enin sahin owan ananisi, enin nambimb netagama basefa kot. Ea' emi epen ni'ipa enin sahin owan ananini ni'i, 'Ine' epen falafinai', enis sonda'mana basef amam Juda dambami mumafi koti. Ea' i'i enin epen ni'ipa enin epen lamana ni'i, 'Ine' okom nahena endilisi', epen inima nefe' wambel aonai nif fandumi ma'oma.

²³ I'i ipe' pi'i pindalali ma God penda' ofa felefele' ma balata anama sondolalima Godanai ma i'i ipe' ukup mopoma anona waf aonai ipe' panda'ana enin sahin owan ea' ukup numbutima ipe', penda'am na'ama. ²⁴ Ata' pekwaha ofa ipe'inai nonda'oh felefele'ma balata anama, ipe' ata' pitanima pefe' penandona basef peloma sahin owan ipe'isi pali' panda'mas waf aonai. Ama ea', pifi'i pefa' ofa pefe' pindalali peso' Goda ofa.

²⁵ I'i enin epen ni'i neanda'mepa basef, nelomepa pefe' ma ata' pitu eaf, ipe' mehip pese'ana okom pewalapa amama pi'iam peloman, ama basef owa'etin. Na'ama epen inima nenda'epa penda' basefa amama ma jas nonda'epa pefe'ma polisman, ea' monda'epa penda' kalabus. ²⁶ Ae' a'ipipa

d 5:18 Lu 16:17, 21:33 **e 5:18** Basef tu'wanim bu'wami ofagema ma'i na'ama. Ma'i anom amef so'umi ma basef mi'uli Godi, si'i diga ape'inai mak anama sa'unai. **f 5:19** Je 2:10 **g 5:19** Waf esis Judai nape na'ama. Esis sandaiwa'ma sie'i agel Godi, ea' esis ina sa'i 'kingdom Godi', owa'. Sa'i 'kingdom heveni.' **h 5:21** Eks 20:13; Eks 21:12; Lev 24:17; Diu 5:17 **i 5:22** 1 Jo 3:15

endilisi, ipe' ina nambimb pekwaha ipat anama sanda' kalabusanai ulal, owa'. Ama peagwa amamaga lu'wami sa'umi ma wiaf ipe'inai hi'ilana, pefe!."

Waf aonai nawala waf bu'unai dase'amainai

²⁷Jisas na'ipam wapoti' na'i, "Ipe' pame'am ea' basef amama fowa'imi. Ipe' ina penda' waf aonai ma so'a waola enis amam nematawa deindeias, owa'. ²⁸Dei' ae' a'ipipa na'ama a'i, i'i anona aman niyeti ano'w nemata'w, ama okom ananinai nehafema akwa'w, aman anama ea' nanda' waf aonai so'a waulanai ma okom ananinai."

²⁹Ea' Jisas na'ipam anom basef womun etin na'i, "I'i naep ipe'imi mape lagof da'isimi monda'epa pewa ma waf aonai, pigiam pikwahom. I'i alop tu'wanina ipe'inai nefa' nimanimi, amama aom kwaukwawie'. Ina andeande' ma esis sokwaha alop si'ina ipe'inai hi'ilana neafe' wambel aonai hel nif fandumi mapoma. Amama anona nemaf pefa' nimanimi awami lu'wami endilisi.

³⁰I'i lagof da'isimi monda'epa pewa ma waf aonai, petopa'am pekwahom. I'i alop tu'wanina ipe'inai nefa' nimanimi, amama aom kwaukwawie'. Na'ama esis sokwaha alop si'ina ipe'inai hi'ilana nefe' wambel aonai hel nif fandumi mapoma.

Waf satopa' dase'amainai (*Mt 19:9; Mk 10:11-12; Lu 16:18*)

³¹Basef amama fowa' mataga ma'i, i'i anona aman ni'i nili'amonawaulu'mana anani'wi, anan ata' ni'i anom basef nonda'am mil anop okwatip nose'akw ma neatopa' dase'ama. ³²Dei' ae' a'ipipa a'i, i'i nemata'w akwama owa' konda' waf aonai so'a waolanai, ma waulunama'w neakwaho'w etin, anan nanda' akwa'w kwanda' waf aonai so'a waola anona aman. Ea' emi aman naso' nemata'w fowa' anona aman nali'amonaw'wi, aman anama nagi' nase'akwi wapoti' nanda' waf aonai so'a waola nemata'w akwama.

Waf sa'i endilisi etis gani ilif

³³Anom basef fowa' gani pame'ami ma'iam na'ama ma'i, 'Basef amama la'ifimi pa'i endilisi gani ilif, ipe' ina pesambalom, owa'. Basef amama pilam mondahama ipe' pa'iama naep Dembinai.' ³⁴Dei' ae' a'ipipa, ipe' ina pi'i basef la'ifimi endilisi gani ilif, owa'. Ea' ina pi'i ilif hevena penda' anom basef la'ififi, owa'. Dei' main, gani ilif heven balata bu'unai dembinai Godi napoma. ³⁵Ea' na'ama etin ina pi'i etap anae' etina penda' basef ipe'imi la'ifim, owa'. Etap anae' nandahama si'i anona tebol sa'unai God nahapona bo'wagahanai. Ea' na'ama etin ipe' ina pi'i Jerusalema penda' anom basef ipe'imi la'ifimi, owa'. Jerusalem anama taun wambel

lu'wagoma dembinai kingi. ³⁶Ipe' ina penda' basef ipe'imi la'ifim pi'i balagah ipe'imi, owa'. Dei' main, ipe' ina la'ifipama penda' anom auf ama balagah ipe'imi meataga afitimi alimi, owa'. ³⁷Ipe' pi'iam pi'i a'e o owa'. Pi'i amama atom. Basef watanieimi, amama mataga epen aonai Satan atona.

Pegwamasa waf aonai enis epes sanda'mepanai

(Lu 6:29-30)

³⁸Ipe' pame'am ea' basef amama fowa' gani mataga ma'i, 'I'i ipe' pepa' peloma enisa seahepa naep o seatalamepa nalelef, ipe' pegwamas pehas wapoti' penda'as sondagwama etin.' ³⁹Dei' ae' a'ipipa, ipe' ina pegwama epes sonda' ipe' aopei, owa'. I'i emi egalin nehepa aomb wa'ol, pendamboma nehepa aomb wa'ol wapoti'. ⁴⁰I'i anona aman nonda'mepa basef ni'i nefa' siaot ipe'inai, ipe' pese'ana sagwegw ipe'igwi wapoti'. ⁴¹I'i anona aman dembinai ma gavman nindinapina ma pefe'mana wiga pelomana anagon fele' si'i nogota atotona, ipe' andeande'ma ata' pefe' pelomanago nehetagw biom laom wapoti'. ⁴²I'i emi epen nefalepa ma anom amamaga, ipe' pese'anam. I'i enin epen ni'i newaolamepa wiaf, ipe' ina pindaiwa'man pesambala basef ananimi, owa'.

Waf ipe' pese'asa opalef esis naumbih

(Lu 6:27-28,32-36)

⁴³Ipe' pame'am ea' basef amama fowa' gani mataga ma'i, 'Ipe' pese'asa opalef epes isima sape felefele'ma ipe', ea' ipe' ukup wandafuma naumbih ipe'isi.' ⁴⁴Ea' dei' ae' a'ipipa anom basef a'i, ipe' ukup mimila naumbih ipe'isi pese'as opalef, penda' betena God niegiambama isima sanda'mepa waf aonai. ⁴⁵Ipe' penda'am na'ama ma peape awasi Godi si'i Ahalomapa nape heven ilifi. Anan nanda' aon alipunai nape ilifa nigiangbama epes bu'wasi saloma epes sanda' waf aonai wapoti'. Anan nanda' asaf nalai ma epes isima sape andeande'i saloma isima sanda' waf aonai wapoti'. ⁴⁶I'i ipe' ukup mila epes isima ukup maimaila ipe' etipa, anona nemaf pefa' amamaga bu'wami maima waf anama? Owa'etin. Amam amama manda' waf aonai maloma mofa' takisi manda' waf anama atona. ⁴⁷I'i ipe' pinifela isima alupisi ipe'isi etis, ipe' petaga pikila' enisa maina waf bu'unai? Owa'etin. Esis sololama Godi sanda'am na'ama etin. ⁴⁸Na'ama ipe' pepe bo'wepa endilisi si'i Ahalomepa ipe'inai God nape heven ilif.

Waf ipe' pigiangbama enis epes kwahusi

6 ¹Ipe' pindumafuma andeande'. Ina penda' waf bu'unai ipe'inai ma naep esis epesi ma seatilipa, ma sie'i ipe' epes bu'wipei ma seafela agof ipe'imi, owa'. I'i ipe' penda'am na'ama, ipe' ina anona nemaf pefa' anom amamaga bu'wami ma Ahalomepa God nape heveni, owa'. ²I'i ipe'

pi'i pigiambama enis epes isima kwahusi, ipe' ine' pi'ipa enis epes, owa'. Ipe' ina penda'am si'i waf anama amam mambaso'as ma'i malogof biami mofapula alelefi batagw ma'ipas sali', owa'. Amam manda'am ifagw esis Juda sa'i basef sapeimi, anama eaf dawalegefa naep epesi seati amam sefela agof amamumi lu'um. Owa', hapaimi. Ae' a'ipipa endilisi, Epes isima safela agof amamumi ea' ma'um amama atom. ³I'i ipe' pigiambama epes isima na'amai kwahusi, ipe' pembaho'as penda'as na'ama. Lagel wa'ana nanda'ami, lagel wa'ana ina nogawam, owa'etin. ⁴Ipe' pembaho'am penda'am. Ama Ahalomepa ipe'inai nati amamaga amama mape mandabahi'i ea' anan atona nambimb nogwamepam ipe'.

Waf ipe' pilana penda' beten

(Lu 11:2-4)

⁵Maina nemaf ipe' penda' beten, ipe' ina penda'am si'i waf anama amam amama mambaso'ami ma'i malogof biam manda'anai, ma mietu etin nomon ifagw esis Juda sa'i basef sapeimi o eaf lu'unai dawalegef, ama epes seatolom, owa'. Ae' a'ipipa endilisi amam anona nemaf God ina nogwamama amam amamaga bu'wami ma waf anama, owa'etin. Epes isima satolom ea' ma'um amama atom.

⁶Nogota anama ipe' pi'i penda' beten, piwis ifagw nomon pewalo utagw ea' penda' betena God Ahalomepa ipe'inai, anan nape anama nandambaho'ma. Anan nati amamaga mape sandabahi'i ma nambimb neagwamipei beten. ⁷Afama ipe' penda' beten, ipe' ina penda' beten pi'i basef loumi atom si'i epes isima sololama Godi sanda'am, owa'. Esis sa'i sonda' beten launai ma nambimb God neame'as. Owa'etin, God ina name'as. ⁸Ipe' ina pila waf asasinai, hapainai. Ahalomepa God nape ilif nogawa ea' ma amamaga a'ipei. Nogota anama ipe' ata' owa' pihali'anama, anan nagawam ea'.

⁹Ipe' penda' beten na'ama pi'i,

'Ahalomapa ape'inai nape heven ilif, ape' ma'i agel ine'inai nope bo'ona andeande' ma hiesi seafela agel ine'inai lu'una. ¹⁰Ape' ma'i nemaf anama bu'unai nifili' ma epes hiesi siowis kingdom ine'inai. Waf bu'unai esis ine'isi sailana heven, ape' ma'i milana etap anae' wapoti' na'ama etin. ¹¹Dei' ine' nese'apa gwa'aimi mondahama nemaf anae'. ¹²Ine' nekwahomapa waf aonai ape' manda'anai si'i ape' makwahomasa waf aonai enis epes sanda'mapanai. ¹³Ine' owa' nili'apa mefe'ma amamaga ahifimi meagwamba ape'i. Hapaimi. Netagahipa ma epen aonai.' ”
[Wambel ine'inai noloma pepel ine'inai noloma nafifili ine'inai, amama ine'imi atom la'ela'ef hihif. Endilisi.]

¹⁴Ea' Jisas na'ipam wapoti' na'i, "I'i ipe' pekwahomasa waf aonai enis epes sanda'mapanai, ma Ahalomepa nape heveni nekwahomepa waf aonai ipe' panda'anai wapoti'. ¹⁵I'i ipe' owa' pekwahomasa waf aonai enis

epes sanda'mepanai, Ahalomepa nape heven ina nekwahomepa waf aonai
ipe' panda'anai wapoti', owa'etin.

Basef amama ma anom nimeguf sokwaha gwa'aimi ma seanda' beten

¹⁶Maim nimeguf ipe' pekwaha gwa'aimi, ina penda'am si'i amam
amama mambaso'mami ma'i malogof biami manda'ami ma manda'
amagah amamumi awasim, owa'. Amam manda' amagah aom na'ama ma
epes satolom sogawa sa'i amam mokwaha gwa'aimi. Ae' a'ipipa endilisi
amam mofa'am ea' amamaga amama ma danifel amamunai. Epes isima
sati waf anama amamunai, ea' ma'um amama atom. ¹⁷Maina nemaf ipe'
pekwaha gwa'aimi ma penda' betena God, ipe' pesa'opa amagah penda'
wel pindisa balagah ipe'imi. ¹⁸Ama enis epes ina sogawa ipe' pakwaha
gwa'aimi, owa'. Penda'am na'ama ma Ahalomepa nape nandambahi'i
anan atona nogawepa. Anan nati amamaga mape mandambahi'i, ma
nambimb neagwamipei beten.

Amamaga bu'wami netamam nimbe'am otaga ilif

(Lu 12:33-34)

¹⁹Ipe' ina petama amamaga bu'wami atom ipe'imi pewa'aniam
etap anae', owa'. Enis sakowalefi sapisila ifagw sawis sakowalopam,
sopafowa motopa'am monda'am aom, waimba nasagiham. ²⁰Dei' ae'
a'ipipa pewa'ania amamaga bu'wami ipe'imi mo'omepa gani heven ilif.
Anama bamagufi sopafowa ina mototopa'am ea' waimba ina nasagiham,
owa'etin endilisi. Ea' sakowalefi ina suwis sokowalopam, owa'. ²¹Maina
wambel amamaga bu'wami ipe'imi ma'oma, ea' wambel anama atona
anona nemaf ukup ipe'imi wapoti' meapoma.

Alop si'ina howalana

(Lu 11:34-36)

²²Naep nomon ukup ipe'ipi si'i lama alop si'ina ipe'inai. I'i ukup ipe'imi
bo'om mope, ea' alop si'ina ipe'inai howalana. ²³I'i ukup ipe'imi aom,
nambimb alop ipe'inai akutina hi'ilana. Ea' na'ama etin, i'i lam amama
mape ukup ipe'imi nomon akutim, anona nemaf owamb anama ea' lu'una
endilisi.

Enin epen ina nanda' maol andeande'ma amam agufumi biam, owa'.

(Lu 16:13)

²⁴Ina enin epen la'ifina nanda' maol nihapila maol bie'fina amam
dambami biam, owa'etin. Na'ama okom nila anona, anona nesambalona.
Ea' anan neme' basefa anona, anona nowa' alafugahana. Ea' na'ama
etin, ipe' ina la'ifipa pepe owina God noloma wiga hianai moni hianai,
owa'etin.

Ukup iwanim nomonas matamea hiahias

(Lu 12:22-31)

²⁵Ea' ae' a'ipipa a'i ipe' ina ukup matamea hiahiaama ambagof ipe'imi pi'i, 'Ape' ata' mea' main? Ea' mea' embel main?' Owa'. Ipe' ina ukup motamea ma alop ipe'inai pi'i, nambimb ape' monda' main mombaho' alop ape'inai? Ambagof afa'imi ina gwa'aimi atom. Ea' alop ina luwaguf atom, owa'. ²⁶Ipe' ukup mopoma amiguf. Amiguf ina manda' aof mawa gwa'aimi maim, owa'. Amiguf amam ifagw owa'etina mowa'ani gwa'aimi mo'oh, ea' mowa'aniam mofa'am ma'oh ifagw gwa'aimi emi, owa'etin. Ea' Ahalomepa ipe'inai nape heveni, anan nase'am gwa'aimi. Ea' ipe' epes pikila' amiguf amama endilisi. ²⁷Ipe' nambimb emi la'ifina nomonas notanea nawis niwatanian anona nemaf wapoti' ma ambal ananinai nope nogota laona wapoti'? Owa'etin. ²⁸Dei' maina nomonas ipe'imi matamea safe' endilisi ma luwaguf maim? Ipe' ata' ukup mopoma afis main salo ande'. Esis sataga salo lu'wis sa'imama? Esis ina sanda' maol, ina sanda' luwaguf maim, owa'etin. ²⁹Dei' ae' a'ipipa fowa' gani anona aman amamaga hiamunai Solomon nanda' sosaf hianai ma luwaguf ananinai, ea' sosaf ananinai ina bo'ona si'i afis amama, owa'etin. ³⁰A'e, otalef amama dei' ata' malo aof ama naman etef sotopa'am sokwahom mefe' nif. Otalef amama awami God nofalo'mam. Ea' ipe' amam nematawa pikila' otalef amama. Ea' dei' ipe' pembale'efa basef Godi, bale'ef ipe'inai ina la'ifina, pegawa endilisi anan numafipa wapoti'. ³¹Ea' ipe' ina ukup motamea hihif endilisi pi'i, 'Nambimb ape' mea' main? Mea' embel eti? Monda' luwaguf eti?' Na'ama owa'. ³²Epes sape etapi sololama Godi ukup matamea mafe' endilisi ma sogolopam amamaga amama hiami. Ea' Ahalomepa ipe'inai nape heveni anan nogawa ea' amamaga amama a'ipei. ³³Ipe' ata' ukup mili' pegolopa waf bu'unai noloma piwis kingdom Ananinai pili', nese'epa amamaga amama ipe' wapoti'. ³⁴Ea' ipe' ina nomonas mopoma amamaga meataga naman, owa'. Nemaf namanifi fendapoma naman atef, ama amamaga amama meataga naman. Amamaga nimanimi matagama nimeguf deindei mandahama nimeguf atona etin. Ipe' ine ukup motamea mefe', owa'.

Waf pewaloga epes si'i kot

(Lu 6:37-38,41-42)

7 ¹Ipe' ina pewaloga enis epes si'i anona jas dembinai nawaloga basef kot lu'unai, owa'. Ama anona nemaf God ina nowalogepe, owa'.

²Waf ipe' panda'ana pawaloga enis epesanai, anona nemaf waf anama atona God nonda'mepana ipe' wapoti'. Ikwaf anama atona ipe' panda'ana pawalogas God nogwamepana ipe'.

³Dei' maina ipe' pati usan sa'unai nape naep sahin owan ipe'isi, ea' ipe' owa' pegawa hapataf lu'unai nape naep ipe'imi? ⁴Dei' maina ipe' ata' pali'

pa'ipa sahin owan ipe'isi pa'i, 'Owalome, ae' a'i iwafamena usan sa'unai nape naem ine'inai.' Ea' hapataf lu'unai nape naep ine'imi. Na'ama owa'.⁵ Ipe' malogof biamipei pambaso'mami. Ipe' ata' pili' pewafam usan hapataf lu'unai nape naep ipe'imi ma piti andeande', pewafamenan usan sa'unai nape naep sahin owan ipe'isi."

⁶Ea' Jisas na'ipam anom basef womun etin wapoti' na'i, "Amamaga bu'wami usi'imi, amama ipe' ina pese' nombagw, owa'. Ea' ipe' ina pekwaha awelep amama bu'wami ipe'imi mefe'ma bogof, owa'. Na'ama mofof'o'asom awelep amama bu'wami bo'walelef amamumi ea' nombagw mohepa mea'epa.

Ipe' penda' beten pendahali' God la'ela'ef

(Lu 11:9-13)

⁷Ipe' pihali' God nambimb nese'epa amamaga amama. Amama ipe' pegolopami nambimb pitolom. Ipe' peha uta, nambimb God nusi'amepana uta. ⁸Dei' main, emi egafis sohali' Godi, nambimb sofa' amamaga. Emi egafis segolopa amamaga, nambimb seatolom. Ea' emi egafis soha uta, nambimb God nusi'amanasa uta. ⁹I'i enin awani nihali' ahalomana ma anom gwa'aيمي, atuwasi ahaloman nefela anom owap nose'anam? Owa'etin. ¹⁰I'i anona awani nihali' ahalomana nease'ana anona eol, anan nambimb ina nose'ana anona yul aonai, owa'. ¹¹Ea' ipe' amam nematawa aopei pase'asa amamaga bu'wami atoma awasi ipe'isi. Ea' endilisi Ahalomepa ipe'inai nape heven nikila' ipe' epes. Anan wapoti' nambimb i save nose'asa amamaga bu'wambu'wami amama sahali' anan emi. ¹²Maina waf ipe' pa'i esis sanda'mepana ipe'i, ipe' penda'masana na'ama etin. Basef amama ofagema ma mi'uli Godi na'ipa Mosesanai naloma basef God fowa' na'ipa amam profet manda'ami.

Basef womun etina utagw biagw sa'unai lu'unai

(Lu 13:24)

¹³Ipe' pefe' piowis uta sa'unai. Dei' main, anona eaf nafe' nawis wambel aonai hel alihina endilisi uta wapoti' alihina. Ea' amam nematawa hiesi safe' saila eaf anama. ¹⁴Ea' uta ma eaf nafe' nawis wambel sape namisagoma ina alihina, owa'etin. Uta wapa'mona. Wambel anama sape bo'wes andeande' la'ela'ef. Eaf anama ahifina endilisi ma seafe'. Amam nematawa atona etin esis ea' amama atom sati eaf anama sailana.

Ape' mundumafuma andeande' ma amam profet mambaso'mami ma'i mowalipasa basef Godi endilisi

(Lu 6:43-44, 13:25-27)

¹⁵Ipe' pindumafuma andeande'ma amam profet mambaso'mami ma'i mowalipasa basef Godi. Amam mafi'i mambaso'mepa manda' ufunufeni

mataga patolom ande' atogon mape bo'om sa'umbilim si'i sipsip. Ea' ukup amamumi nomon aom endilisi ma ipe' ma'i mohambombagepa mohepa si'i nombagw wandafumi. Ea' ipe' ina peme'am, owa'. ¹⁶Ipe' piti waf amamunai netaga nendawalap si'i su'uttip pail lawah ea' pegawa waf amamunai bo'ona o aona. Epes ina sola su'uttip wainim mandelef amama higatagumi, owa'. Ea' esis ina sola su'uttip fik si'i ahip anona mandof higatagunai, amama wapoti' owa'. Ea' waf aonai amamunai nataga nandawalap aona si'i su'uttip awami. ¹⁷Ea' na'ama etin lawah hiami anom bu'wami mola su'uttip bu'wami gwa'aimi, ea' lawah awami mail mola su'uttip awami numbutimi. ¹⁸Lawah bu'wami ina mail mola su'uttip awami ea' lawah awami ina mail mola su'uttip bu'wami, owa'. ¹⁹Lawah hiami owa' mieil mola su'uttip bu'wami, amama esis salam saofam nif. ²⁰Na'ama ipe' nambimb piti waf amam profeti netaga nendawalap si'i su'uttip mail lawah, ea' pegawa waf amamunai bo'ona o aona.

²¹Ipe' ina pi'i amam nematawa hiesi hi'alas sofala ae' sa'i Dembinai, pi'i anona nemaf seafe' siowis kingdom heveni, owa'etin. Emi egafis sila okom Ahalomei nape heven ma sielana, esis etis anona nemaf sefe' suwis kingdom heveni. Enis lamasa owa'. ²²Nemaf anama amam nematawa hiesi sifi'i si'ipa ae' si'i, 'Dembinai, Dembinai, ape' mawalipasa basef Godi si'i profet amama mawalipas ea' ma'i agel ine'inai matofa ambagof awami mape epesi! Ape' ma'i agel ine'inai manda' ikwaf naninani la'ifinai si'i God nanda'anai!'

²³Nemaf anama ae' iwalipas i'ipas alihis na'ama i'i, 'Fowa' gani pafi'i pafi'i pataga dei' Ae' ina egawa ipe', owa'. Ipe' epes panda' waf aonai, ipe' si'amae, ipe' fo'o.'

Waf biefina sala' ifagw

(Lu 6:47-49)

²⁴Emi egafis seme' basef ae'ami ma sielami, esis si'i epen gawainai nala' ipat ananinai netawa etap anama otambaiguma la'ifiguma. ²⁵Anom nimeguf mafe' ea', asaf lu'unai nalai, walemb nawisi lu'una embel kolo'walami mafe', uf la'ifinai naluwi, amama makoto'ma ipat anama ea' ina nato, owa'. Epen inima nala otamba lu'wami mosahapana netawa.

²⁶Ea' emi egafis seme' basef ae'ami owa' silam, esis si'i anona aman nahaga nagaoli. Anan nala' ipat ananinai natoma ilifa wesana atona.

²⁷Anom nimeguf mafe' ea' asaf lu'unai nalai, embel mataga, ea' uf naluwi la'ifina, amama maola ipat anama nondokwaef nowa. Ipat anama nato na'oh kwapete' endilisi aona."

²⁸Nogota anama Jisas na'i basef amama laumi ma hi'alam, esis same' basef ananiami ea' gegelalasis kwapete'as endilisi. ²⁹Dei' main, anan ina nawalipas si'i amam falafumi ma'ipas, owa'. Anan na'ipasa basef la'ifimi naloma pepel na'ama etin si'i amam agufumi ma'ipas. Amam dambami

mawalipasa mi'uli Godi ina mawalipas na'ama si'i anan, owa'. Anan la'ifina endilisi nikila'am.

Anona aman awasinai alop nambo'anai Jisas nanda'ana bo'ona
(Mk 1:40-44; Lu 5:12-14)

8 ¹Ea' Jisas nakwaha halaf anama nilianai, amam nematawa hiesi sailana safe'. ²Ea' anona aman awasinai alop nambo'anai nafi'i felefele'ma Jisas nindiwa nembawa notawa felefele' ma anan na'ipana mehhip na'i, "Dembina'i, i'i ine' ni'i a'e, nenda' ae' etaga bo'owe'."

³Ea' Jisas naso' lagelana nahapila anan na'ipana na'i, "Ae' a'i a'e ma ine' netaga bo'wena."

Ea' dei' etef awes anama aonai nakwahona ea' nataga bo'ona.

⁴Ea' Jisas na'ipana na'i, "Ina nefe' ni'ipa enin epen ni'i ae' anda'ena bo'wena, owa'. Ine' fo'o nihi'ambana alop ine'inai aman anama pris. Ea' nese'ana amamaga amama anan nendolalima God ea' ine' ninifelana ma nataga bo'wena si'i mi'uli ananinai fowa' Moses na'ipasanai na'i. Ama esis hiesi sitilina sogawa ambo'wena."

Jisas nanda' anona aman nanda' maola soldia dembinai bo'ona
(Lu 7:1-10)

⁵Jisas nafe' wambel Kaperneam ea' anona soldia dembinai nape. Anan kepten numafi soldia hiami 100-peleim. Ea' nafi'i nahali' Jisas nindinip na'i, ⁶"Dembina'i, aman anama nanda'me maoli awes nanda'ana na'oh ipat ananitai. Bo'wagahi lagof saga' sailana. Alop ananinai ekep mahana kwapete!'"

⁷Ea' Jisas na'ipana na'i. "Ae' atuwasi efo'o enda'ana bo'ona."

⁸⁻⁹Ea' dembinai soldia anama na'ipana na'i, "Ae' ina aman bu'uwei ma ine' neafo'o niwis ipat ae'anai, owa'. Ine' ni'i basef atom, atuwasi anan bo'ona. Dei' main, ae' ape owina anom soldia dambami mumafi mase'e maol. Ea' ape ilifa anom soldia ae'ami imafiam. I'ipa anona i'i, 'Ine' fo'o', name'e nafe'. Ea' i'ipa anona i'i, 'Ine' fi'i', name'e nafi'i. Ea' i'ipa anama agel a'anai nanda'me maoli i'i, 'Ine' da'a maol anama', anan name'e nanda'ana. Ine' dembinai. Ea' awes anama atuwasi neme' basef ine'imi ea' nefe'. Dei' ine' ni'i etin, ea' anan ambo'ona wapoti!'"

¹⁰Ea' Jisas name' basef ananinimi okom natanea na'ipa amam nematawa hiesi saila anan safi'i na'i, "Endilisi etis ae' a'ipipa! Soldia dembinai anama anan ina ipe' Israelinai. Ea' dei' anan nembale'efa ae'. Ina anona aman Israelinai nembale'efa ae' na'ama, owa'etin. Anan nikila' ipe' Israela nembale'efa ae' la'ifina. ¹¹Endilisi ae' a'ipa ipe' Juda hipei, ipe' ina ukup mi'i ipe' etipa pefe' piowis kingdom heveni, owa'. Amam nematawa hiesi lamasi sifi'i gani aon natefima nowala ma naso'ma, isima sefe' siowis anama. Ea' sefe' siowis soloma dambami bafapepa

ipe'imi Juda, Abraham noloma Aisak Jekop, sefe' sope etifigin sea' gwa'aimi solomam. ¹²Ea' ipe' Juda hipai owa'etin. God nandondomba kingdom heveni ma ipe' piowis, owa'etin. Anona nemaf anan negalo'ma ipe' ni'ipipa ni'i pefe' wambel aonai owamb atona napoma. Ea' pefa' nimanimi lu'wami pelef mehip pena' nalelef ipe' tilili talala' kwapete' pepe."

¹³Ea' Jisas na'ipa soldia anama dembinai na'i, "Ine' fo'o. Ine' na'i ae' la'ifiwei ma iegiangama aman anama nanda'mena maol ine' neataga bo'ona. Ae' anda'ana bo'ona si'i ine' nambale'efa ae'."

Ea' dei' etef aman anama ambo'ona wapoti'.

Jisas nanda' Pita nandagi'mokwi bo'okw

(Mk 1:29-31; Lu 4:38-39)

¹⁴⁻¹⁵Ea' Jisas nafe' nawis nomon ipat Pitai nati Pita nandagi'mokwi awasi'w kwa'oh, alop akwa'unai nifina kwapete'. Ea' natolo'w nahapila lagel akwa'unai awes anama nafe' nakwaha akwa'w. Ea' kohafel kwape kwanda'mana gwa'aimi anan.

Amam nematawa hiesi awesisi Jisas nanda'as bo'wes

(Mk 1:32-34; Lu 4:40-41)

¹⁶Wambomota felefele' ma owamb esis sofa'ai amam nematawa hiesi ambagof awami mapeisi sofa'as safi'mai Jisas. Ea' na'ipa ambagof awami basef bandami atom natofam mafa' mafe'. Anan nanda' esis hiesi awesisi sataga bo'wes hi'alas. ¹⁷Anan nanda'am na'ama si'i fowa' gani anona profet Aisaia na'i basef na'i,

"Anan atona nofa' awes ape'inai nigiangamapa ma meape bo'wepa."

Enis epes sa'i sieila Jisas

(Lu 9:57-60)

¹⁸Ea' Jisas nati epes hiesi saitu sindiwapana, ea' na'ipa alupumi ananiami mofa' bot mefe' anama walemb batupa'manai gani fisana.

¹⁹Ea' anona aman dembinai nawalipasa mi'uli Godi nafi'i na'ipana na'i, "Dembinai tisa, ae' a'i efe' elomena. Ea' ofe' etin anama hiagoma ine' na'i neafe'ma."

²⁰Ea' Jisas nagwamana na'ipana na'i, "Nombagw aolopumi ma'oh mala etap wambel amamunai. Amiguf wapoti' mufia' mafe' ilif mala' alegah mapeih gani ilif, ea' ae' owa'etin. Ae' ataga epen endilisiwei, wambel a'e ma a'oh alo balaga ae'anai."

²¹Ea' anona aman alupunai Jisasi nafi'i na'ipana na'i, "Ae' a'i ata' epe imafi ahalome, ata' igiangamana ma noga' ewana ma nope, ifi'i ilina."

²²Ea' Jisas na'ipana na'i, "Hapainai, esis saga'i sondawago esis etis isima saga'i. Ine' owa'. Ine' fi'i nila ae'."

Jisas na'ipa uf lu'unai owa'etin ea' fase'mana.

(Mk 4:36-41; Lu 8:22-25)

²³Ea' Jisas nalata bot anama naloma alupumi ananiami mafe' malomanamai mombo fisana mafe' anona walemb batupa'manai lu'unai.

²⁴Ea' mehipe etin uf lu'unai naluwi, embel mohafel mawis bot nomon felefele'ma bot na'i nowala embel. Ea' Jisas na'oh nolola bot. ²⁵Ea' alupumi ananiami mafe' minimbalana ma'ipana ma'i, "Dembina! Ine' hafel nigiangamafa. Afa' wa'hi higililafa owala embel!"

²⁶Ea' na'ipam na'i, "Ipe' ina pembale'efa pa'i ae' la'ifiwei, owa'etin. Dei' maina ipe' umbamahepa?"

Ea' nehafel na'ipa uf naloma embel na'i, "Ipe' tol motah."

Ea' uf faso'mana, embel ina ata' manda' fepo, owa'. Tol motah.

²⁷Ea' amam alupumi ananiami gegelalasom umbamaham kwapete'am ma'i, "Anan emi egafuna? Na'ipa uf naloma embel mame'ana mowala."

Jisas natofa ambagof awami mape amam biami bo'om

(Mk 5:1-17; Lu 8:26-37)

²⁸Jisas nafe' nataga anagon wa'ol walemb batupa'manai anama anona etap esis Gadara sapoma. Ea' anom amam biam ambagof awami mapeimi mafi'mai anan. Amam mape la'ela'ef hi'agilif sawa saga'ima mafi'i. Amam amama epes awami mahasi. Ea' esis amam nematawa hiesi umbamahasa seafe' eaf anama amam mapoma. ²⁹Ea' mofala Jisas mehipe ma'i, "Ine' God Nogalamana. Ine' na'i nenda' maina afa'? Ine' na'i nehafa ofa' nimaniami lu'wami? Nema' anama na'i niahafanai ina dei' nataga, ata' owa'."

³⁰Ea' anom bogof hiami maitu ma' gwa'aimi felefele'. ³¹Ea' ambagof awami mahali' Jisas ma'i, "I'i ine' netofafa, nesapa'afa ofe' uwisa bogof mamuma."

³²Ea' na'ipa ambagof amama na'i, "Ipe' fo'o!" Ea' makwaha amam amama biam mawisi mafe' mawisa bogof. Ea' bogof mamuma hiami masagih mafa' mafe' mehipe mowala awagoma tata mowala mala embel walemb batupa'manai afum hi'alam.

³³Ea' amam mumafi bogofi masagih mafe' wambel lu'wagoma ma'ipasa basef amama amam nematawa hiesi ma'ipasa amamaga amama matagama amam amama biam ea' ma'ipasa bogof wapoti' afum hi'alam. ³⁴Ea' epes hiesi wambel anama safi'i sati Jisas sahali'ana sa'ipana mehipe sa'i anan nekwaha etap anama asasima nefe' anagon.

Jisas nanda' anona aman lagof bo'wagah mondola'anai ambo'ona

(Mk 2:1-12; Lu 5:17-26)

9 ¹Esis sandaiwa'ma Jisas ea' nafe' nalata anota bot nafe' walemb batupa'manai lu'unai fisana ea' nataga wambel ananinai

ofagama. ²Ea' anom amam mofa'ai anona aman mafili. Lagof bo'wagah maga' mailanai ea' tol na'oh lahis. Ea' Jisas natolom nogawa amam mombale'efana ma'i anan la'ifinai ma nigiangbama aman anama aonai neataga bo'ona. Ea' na'ipa aman anama na'i, "Ine' epen ae'inai! Opat ine'inai nepe awanena. Waf aonai ine' nanda'anai ae' akwahomenana ea'."

³Ea' anom dambami mawalipasa mi'uli Godi ukup mandanda' na'ama manda'ipama ma'i, "Aman anama Jisas nanda' God findiwana na'ipana awagon."

⁴Jisas nogawa nomonas amamumi. Ea' na'ipam na'i, "Dei' maina ipe' ukup ipe'imi mape na'ama? ⁵Dei' amamaga maim ipe' pa'hi ahifima ae'? Ae' la'ifiwei ma i'ipa aman anama awesinai i'i, 'Ae' ekwahomena waf aonai nanda'anai,' o i'ipana ie'i, 'Nehafel nefe!.' Basef amama nohafel neafe' ipe' pa'i amama ahifima ae'. ⁶Ae' ataga epen endilisiwei a'i ipe' pegawa ae' la'ifiwei ma eakwahomasa waf aonai hianai amam nematawa sape etapi sanda'anai. Na'ama ae' a'i ihi'ambepa ae' la'ifiwei ma enda' amamaga amama."

Ea' na'ipana na'i, "Ine' hafel fela lahis ine'imi fa'am nefe' ipat ine'inai."

⁷Ea' anan nohafel nafe' ipat ananinai. ⁸Ea' amam nematawa hiesi satolona sehafel gegelalasis umbamahas kwapete' sogawa God nagiangbama aman anama nase'ana pepel lu'unai. Na'ama esis safela agel Godi lu'una.

Jisas nofala Matyu nafe' nailana

(Mk 2:13-17; Lu 5:27-32)

⁹Ea' Jisas nohafel nakwaha wambel anama nafa'o nati ae' Matyu, anda' basefa buk anae'. Ae' ape ipat anae' mofa' takisanai. Ea' Jisas na'ipi na'i, "Ine' fi'i nila ae'."

Ea' ae' ehafel ailana afe'.

¹⁰Ea' Jisas naloma alupufai ananifai wape ipat ae'anai wa' gwa'aimi etin, amam hiami manda' waf aonai maloma anom hiami mofa' takisi mafi'i malomafa ma' gwa'aimi. ¹¹Ea' amam Farisi dambami mafi mati Jisas nape nalomafa wa' gwa'aimi, mahali' alupumi ananiami ma'i, "Dei' maina dembinai tisa ipe'inai nape naloma amam mofa' takisi maloma amam amama manda' waf aonai ma' gwa'aimi etifigin?"

¹²Ea' Jisas name'am na'ipam na'i, "Isima awes a'asi ina safe'ma dokta, owa'. Esis bu'wasi. Ea' isima awes nanda'asi etis safe'ma dokta. ¹³Anom basef mape buk Baibeli ma'i na'ama ma'i, God na'i, 'Ae' andaiwa'ma ipe' peha mafis pese' ae', owa'. Ipe' piti enis amam nematawa uwahipis pigiangbamas, andeande!'

Ea' ipe' ina pegawa basef amama ofagema, owa'. Dei' pefe' pitalifam pegawam. Dei' main, ae' ina afi'i ma efala epes sanda' waf bu'unai, owa'. Ae' afi'i ma efala epes isima sanda' waf aonai etis."

Anom nimeguf esis sakwaha gwa'aimi sape etin

(Mk 2:18-22; Lu 5:33-39)

¹⁴Jon aman anama napisi'as embel, alupisi ananisi same' basef ananimiti safiti anama Jisas napoma sahali'ana na'ama sa'i, "Anom nimeguf afa' waloma amam Farisi afa' wakwaha gwa'aimi wape etin wanda' beten. Dei' maina amam alupumi ine'imi owa' meakwaha gwa'aimi si'i afa'?"

¹⁵Ea' Jisas nagwamam na'i basef womun etin na'i, "I'i enis sonda' anom gwa'aimi lu'wami ma enis aman nemata'w bias sondase'ama, ipe' pa'i esis alupisi atuwasi sondaiwa'ma gwa'aimi nemaf anama anan naso' nemata'wi nape nalomas? Owa'etin. Ea' nemaf anama anan nokwaha esis nefe' anagon laogoma, esis sokwaha gwa'aimi."

¹⁶"Ina andeande'ma peatopa' lowaf namunai pigundisana neloma anona lowaf apinai, owa'. Na'ama nambimb lowaf anama namunai nendatagah, nehape' apinai pele'atana negal neataga lu'una."

Ea' na'i anom basef womun etin wapoti' na'i, ¹⁷"Embel wainim dambaimi ape' ina mowalam agwahup apinai mafinina si'i botowagof, owa'. I'i enin nenda'am na'ama, embel wain netef hianai, nohape' agwahup anama pele'etana ea' wain kolo'olana hi'ilana. Na'ama owa'. Wain dambainai mowalana agwahup dambainai atona. Ma embel moloma agwahup mola andeande'."

Jisas nanda' nematawa biawa bo'owa wapoti'

(Mk 5:22-43; Lu 8:41-56)

¹⁸Jisas ata' nape na'ipas etin, anona aman dembinai esis Judai nafi'i nindiwa nembawa notawa na'ipana na'i, "Nogame ae'akwi felefele' kwa'i koga'. Ae' a'i ine' nefe' newamona lagel ine'inai akwa'w ambal natanimai nuwisa'w kohafel kopan."

¹⁹Ea' Jisas nohafel naloma alupumi ananimiti malomana mafe' eaf. ²⁰Ea' ano'w nemata'w kwafi'i alafuga Jisasi kwahapila lowaf ananifi da'malififa. Awes lu'unai nanda'akwi kwape gamba la'ela'ef afagof 12-peleim. ²¹Ea' akwa'w okom nandanda' na'i, "I'i ae' esa lagela lowaf ananifi, ae' bo'awe."

²²Ea' Jisas nandamboma natolo'w na'ipa'w na'i, "Nogame ae'inai! Opaf ine'inai nepe la'ifina. Ine' ea' nembale'efa ae' la'ifiwei. Amama atom dei' anda'ena bo'wena."

²³Ea' Jisas nafe' ipat aman anama dembinai esis Judai nati enis amam nematawa sofapula batagwa nemata'w akwama awiawai'wi afu'w. Ea' epes hiesi salef mehup sa'i sapoma'w. ²⁴Ea' anan na'ipas na'i, "Ipe' si'amae! Akwa'w ina kwaga' endilisi, owa'. Kwa'oh etin."

Ea' esis sanda'iafana. ²⁵Ea' sehafel sawis ande', Jisas nikila'as nawis nomon nahapila lagel akwa'unai nafela'w kohafel ambo'okw wapoti'.

²⁶Ea' basefa nemata'w akwama mafe'agon hi'alagon.

Jisas nagiangbama amam biam naep mase'ami

²⁷Jisas nakwaha wambel anama nafe' etin, nati amam biam naep mase'ami magi'mana mofalana mehup ma'i, "Ine' akunamana Deviti, niti afa' uwahipifa!"

²⁸Ea' Jisas nafe' nawis anota ipat nomon, ea', amama mafi'mai anan nahali'am na'i, "Ipe' pembale'efa ae' la'ifiwei ma enda'epa bo'wepa?"

Ea' amam ma'i, "A'e, Dembinai afa'inai."

²⁹Ea' nasa lagofa naep amamumi na'i, "Ae' egawepa, ipe' pa'i ae' la'ifiwei. Na'ama ae' enda' naep ipe'imi ambo'om wapoti' mondahama pembale'efa ae'."

³⁰Ea' dei' naep amamumi ambo'om matologon andeande'. Na'ama Jisas na'ipam basef la'ifimi na'i, "Ipe' ina pefe' pi'ipa enis amam nematawa ma anda'epa bo'wepa, owa'."

³¹Ea' amam mafe' mawalapa basef ma'ipa amam nematawa hiesi ma'i Jisas nanda' naep amamumi bo'om. Ea' basef amama mafe'agon hi'alagon.

Jisas nagiangbama anona aman malogel nase'anai ambo'ona

³²Amam amama naep mase'ami mafe' etin, esis sofa'i anona aman malogel nase'anai. Anan ambal aonai nanda'ana, na'ama ina noga na'i basef, owa'. Ea' sofa'ana nafi'mai Jisas. ³³Jisas natofa ambal anama aonai. Na'ama dei' aman anama na'i andeande'. Ea' amam nematawa hiesi ukup matamea ma aman anama sa'i, "Fowa' ape' Israel ina mati anom amamaga amama, owa'etin."

³⁴Ea' amam Farisi dambami esis Judai mambaso'am ma'i, "Anan natofa ambagof awami ma pepel anan dembinai ma ambagof awami amama."

Jisas na'i uwahipis amam nematawa hiesi

³⁵^kMaol Jisas nanda'anai nape na'ama. Anan nohafel nafe' wambel hiagoma na'ipasa basef bu'wami Godi. Nafe' nawis ifagw esis Juda sa'i basef sapeimi na'ipasa siowis kingdom heveni. Anan nagiangbama amam nematawa hiesi awes hianai naninani nanda'asi sataga bo'wes wapoti'. ³⁶Ea' nati amam nematawa hiesi uwahipis esis ukup mololas sape umbamahas kwapete'. Ina anona aman nape numafias, owa'. Esis sape si'i sipsip owa' enin epen nimafias. Ea' nati esis uwahipis. ³⁷^mEa' na'ipa alupisi ananisi anom basef na'i, "Ipe' piti aof hianai gwa'aimi hiami maof ea'. Ea' epes sanda' maoli owa' hiase, kwawie'is. ³⁸Ipe' pihali' Dembinai ofagonama aofi. Pihali'ana ma nosapa' epes hiesi sefe' sonda' maola sola gwa'aimi ananiami sembe'am etifigin."

Amam Aposel 12-peleim Jisasi agof amamumi amama

(Mk 3:13-19; Lu 6:12-16)

10 ¹Ea' Jisas nofalai alupumi 12-peleim ananiami mafi'mai anan nase'am agof lu'wami nanda'am mataga la'ifima meatofa ambagof awami ea' monda' hiesi awes hianai naninani nanda'asi sataga bo'wes.

²Amam amama Aposel 12-peleim Jisasi, agof amamumi amama. Nali'i Saimon agel wa'ana Pita, owalomana ananinai Andru. Ea' Jems Sebedi nogalomana naloma owalomana Jon, ³ea' Filip naloma Bartolomyu, Tomas naloma ae' Matyu anda' basef amae' efa'asa takis. Ea' Jems Alfius nogalomana, Tadius, ⁴ea' Saimon anan epes hiesi Seloti. ^o Ea' aman anama Judas nawalapa Jisasa amam naumbih ananiami.

Jisas nase'ama maol Aposel ananiami 12-peleim

(Mk 6:7-13; Lu 9:1-5)

⁵Jisas nasapa' amam amama 12-peleim mafe', nase'ama basef amam na'i, "Ipe' ina pefe'ma epes isima owa' sogawa Godi, owa'. Ea' ina pefe' piwis anona wambel etap esis Samariainai, owa'. ⁶Ipe' pefe' ma esis epes hiesi Israel etisi sape si'i sipsip higilalam. ⁷Pefe' pewalapa basef na'ama pi'i, 'Nemaf bu'unai nafi'i felefele' ea' ma ipe' piowis kingdom heveni.' ⁸Ipe' penda' awesisi bo'wes pefala saga'i sope namis wapoti', penda' isima awes aonai nanda' alop asasinai nambu'wi sotaga bo'wes. Ea' petofa ambagof awami mapeisi. Pepel Godi ipe' pefa'anai, anama ipe' pefa'ana etin, ina patalana otamba, owa'. Ea' na'ama etin ipe' pese'asana etin esis ina sotaloma ipe', owa'etin.

⁹Ipe' ina pelo' otamba gol silva moloma kapa poket isalef ipe'imi, owa'. ¹⁰Ipe' ina pefa' roksak o siaogw biam atom, o su moloma bandefah pandahe'amon pafi'iami, owa'. Dei' main, epes sanda' maoli, andeande'ma sofa' gwa'aimi asasimi.

¹¹I'i ipe' pefe' piowis anona wambel, ata' petologon pegawagon andeande'. Aman wambel anamainai emi egafuna bu'unai nie'i awima ipe', pepe peloma anan atona pefe' ma nemaf anama pekwaha wambel anama pefe'.

¹²Nemaf anama ipe' pefe' piowis anona ipat, pi'ipa esis amam nematawa sape ipat anama pi'i, 'Ipe' pepe opalef awanem.' ¹³I'i enis sape ipat anama bu'wasi senda'mepa waf sie'i a'e ma ipe', nambimb basef ipe'imi opalef awanemami mopomas. I'i owa', hapaimi, basef amama bu'wami motanimani mopomepa la'ela'ef. ¹⁴I'i enin epen nendaiwa'ma

n 10:1 Mk 6:7; Lu 9:1 **o 10:4** Amam Selot anona wambota sandaiwa'ma esis Rom sumafi esis Juda. Anom nimeguf amam Selot mapa' maloma esis Rom.

nease'epa opafa nefa'epa pefe' piowis ipat ananinai ma nindaiwa' ma neame' basef ipe'imi, pehafel pekwhaha ipat anama o taun anama ea' pindilamam nombol sopof mail bo'wagah ipe'imi, ma sitilipa sogawa waf aonai asasinai ofagena asasinai atona.

¹⁵Ae' a'ipipa endilisi, nemaf anama lu'unai anona nemaf God nowaloga epesanai, niti esis fowa' gani sape Sodom Gomora uwahipis andeande'. Ea' epes isima wambel anama isi ina niti uwahipis, owa'. Nimanimi awami endilisi anona nemaf motagamas.”

Jisas na'ipasa nimanimi nambimb meataga

¹⁶Ea' Jisas na'ipam wapoti' na'i, “Ipe' peme', ae' esapa'epa pefe' si'i sipsip pefe' la'afena nombagw wandafumi aolupumi. Na'ama ipe' ukup mondanda' andeande' pefe' pila gawa si'i iguf mafe'. Ea' pila waf bu'unai si'i anona amil ma'unai, ipe' ina ukup mope aoma penda' waf aonai, owa'. ¹⁷Ipe' pindumafuma andeande'ma anom amam. Anona nemaf sonda' kotimipa ma amam dambami Juda ea' sehepa nomon ifagw esis Juda sa'i basef sapeimi. ¹⁸Amam mogawa ipe' panda' maol ae'anai ea' mondaiwa'mepa, ea' mofa'epa pefe' pitu naep kinga gavman dambami ma peawalapa basef ae'ami bu'wami ma amam moloma esis amam nematawa ina sogawa Godi pi'ipasam. ¹⁹Nemaf anama esis sowalapepa ma basef, ipe' ina umbamehepa pi'i, ‘Nambimb ape' mogwa basef mi'iam mi'imama?’ Owa'. Nogota anama atona God nihi'ambepa maim basef ipe' pewalapam pi'iam. ²⁰Amama ina ipe' etipa pi'iam, owa'. Ambal Bu'unai Ahalomepa Godi atona nowalapa basefa malogof ipe'imi.

²¹Nemaf anama esis hiesi sahin owan sonda' basefa enis sohas sogal. Ea' ahapas sonda'am na'ama etina esis nogamas batawiamas asasisi. Ea' nogamas batawisas wapoti' sonda' masa basefa mamasas asasisi enis sohas sogal. ²²Anona nemaf epes hiesi wambel hiagoma siti ipe' pila basef ae'ami, ea' opalef aoma ipe' endilisi. Ea' emi egafis sembale'efa Ae' la'ifis situma seatagama nemaf akutainai, anona nemaf God nefa'as sotanimani. ²³I'i esis sape anona taun sonda' waf aonaima ipe', pefa' pefe' anona wambel. Ae' a'ipipa endilisi, ae' ataga epen endillisiwei. Ipe' ina pefe' pembefa maol ae'anai wambel anama Israeli hiagoma, ata' owa', ipe' piti ae' iefi'i.

²⁴Epes sanda' skul etin ina sape dambes sikila' tisa asasinai, owa'. Ea' epen inima agel a'an nanda' maol etini enin ina nape ilifa dembinai ananinai, owa'. ²⁵I'i esis sanda' skuli sope na'ama etin si'i tisa asasinai, esis ukup mi'i andeande'. Ea' i'i enin epen agel a'an nanda' maol etini nepe si'i dembinai ananinai, isima wapoti' andeande'. Ae' Dembiwei Ahalomepa ma wambota ae'anai esis sa'i basef awami ma agel ae'anai

sa'i ae' Belsebul.^p Na'ama anona nemaf esis si'ipipa sonda'mepa agof awami endilisi mikila' agel Belsebul sanda'meana ae'.

Epes umbamohasa God atona

(Lu 12:2-7)

²⁶ Na'ama ipe' ina umbamehepa ma amam, owa'. Amamaga hiami mape mandambahi'i anona nemaf motaga alihim hiesi sotolom sogawam. Ea' amamaga hiami ata' sambaho'am mapani anona nemaf motaga mondawalap, hiesi sogawam. ²⁷ Basef amae' ambahe'am owamb a'ipa ipe' etipami, amama pewalapam pi'iam alip. Ea' basef pame'am sa'iam so'uso'umbili, amama petoma ifagw ilif pewalapam pi'iana amam nematawa some'am. ²⁸ Ipe' ina umbamehepama esis soha alop atona neaga'i, ea' anona nemaf esis ina la'ifisa soha ambagof ipe'mi, owa'. Ea' ipe' umbamehepama aman anama la'ifinai ma noha alop si'ina noloma ambagof ipe'imi ma wambel aonai hel.

²⁹ Ipe' pegawa epes satala amiguf sa'umi biam ma moni owap wa'anai atotona. Ea' Ahalomepa ipe'inai ina nati anona amil atotona nowai etin, owa'. Numafiam andeande'. ³⁰ Ea' neambam auf malo balagah ipe'imi dende' hi'alam. ³¹ Na'ama ipe' ina umbamehepa. Anan okom napoma ipe' pikila' amiguf hiami amama."

Waf ape' mowalapa agel Jisasi alihina

(Lu 12:8-9)

³² Ea' Jisas na'ipas na'i, "Emi egafis sowalapa agel ae'anai ma amam nematawa hiesi, anona nemaf ae' wapoti' ewalapa agof epes isima ma naep Ahalome Godi gani heven. ³³ Ea' emi egafis sowa' alafuga ae' sindaiwa'me ma owa' sowalape si'ipas naep amam nematawai, na'ama etin anona nemaf ae' wapoti' ewa' alafugahas ma naep Ahalome Godi gani ilif heven."

Jisas nafi'i ma nonda' wandaf netaga ma ape'

(Lu 12:51-53, 14:26-27)

³⁴ Ea' Jisas na'i anom basef wapoti' na'i, "Ipe' ina pi'i ae' afi'i etap anae' ma eakolasa ipe' peape opalef awanem, owa'. Ae' efa'i bainat hi'elinai afi'i ma nambimb enis epes sohafel sepa' sealoma enis. ³⁵ Ae' afi'i ma enda' waf anama lopa' fitapanai neataga, si'i basef ma'iam ma'i, 'Anona nemaf anona aman noloma ahalomana ananinai mondawaloga biefim, ea' ano'w nemata'w koloma mama'wakw

p 10:25 Belsebul anona god esis Kenan sa'i anan dembinai ma god baso'amunai hianai. Ea' amam Juda mandaiwa'ma Jisas mase'ana agel anama. Ea' mofalana ma'i anan aman aonai Satan wapoti'. Niti Matyu 12:24. **q 10:26** Mk 4:22; Lu 8:17 **r 10:28** Je 4:12 **s 10:31** Mt 6:26, 12:12 **t 10:33** Mk 8:38; Lu 9:26; 2 Ti 2:12

ondawaloga biefiwa, ea' mefi'ma'w akwo'ukwi koloma ma'makw kwandagi'mokwi ondawaloga biefiwa.

³⁶ Ea' esis sape ipat atotona nambimb esis wambota aman anama sondawaloga seataga naumbih.'

³⁷Emi egafis ukup maimaila ahapas mamasas asasisi etis ma owa' ukup mimila ae', epes isima ina setaga alupisi ae'asi endilisi, owa'. Ea' emi egafis ukup asasisi mohafel mimila awasi asasisi, ma owa' ukup mimila ae', isima ina setaga alupisi ae'si, owa'. ³⁸ Ae' efa' nimanimi awami anda' maol Godi sehe ega' lawag usi'inai tu'wanainai. Emi egafis owa' senda'am na'ama etin si'i ae' ma sieli, epes isima ina la'ifis setaga alupisi ae'asi, owa'. ³⁹Emi egafis ukup mopoma ambagof asasisi atom si'i sihapilam tatala'im sigiambama ambagof asasisi, anona nemaf ambagof asasisi higililam. Ea' emi egafis ukup mopoma ae' ma sesambala ambagof asasisi etap anae', anona nemaf God nofa' ambagof asasisi sotanimani sope andeande' la'ela'ef hihif.

Jisas na'ipa epes ananisi ma anona nemaf sefa' amamaga bu'wami
(Mk 9:41)

⁴⁰Emi egafis sese'epa opalefa sie'i ipe' ae'ipai, esis sase'e opalef ae' wapoti'. Ea' emi egafis sase'e opalefa ae', esis sase'ana opalef God nasapa'e afi'i. ⁴¹Ea' emi egafis sieti anona aman profeta sie'i, 'Aman anama profet nanda' maol Godi. Ape' mose'ana opalef migiambamana,' epes isima anona nemaf sefa' amamaga bu'wami si'i profet anama nefa'ami. Ea' emi egafis sieti anona aman bu'unai nifi'i ma esis sie'i, 'Ape' ma'i anan aman bu'unai. Ea' migiambamana mese'ana opalef.' Epes isima anona nemaf sefa' amamaga bu'wami si'i aman anama bu'unai neafa'ami. ⁴²I'i emi egafis sieti enis epes falafisi wafisi o agufisi ma esis sietilis ukup mimila epes isima Jisasi sigiambamas sese'asa embel maim, ae' a'ipipa endilisi, anona nemaf epes isima sefa' amamaga asasisi bu'wami ina higililam, owa'."

Jon nasapa' alupumi maila basef ananisi mafe'ma Jisas
(Lu 7:18-35)

11 ¹ Jisas na'ipama basef amama alupumi ananisi 12-peleim ma hi'alam, nohafel nakwaha wambel anama nafe' taun wambel hiagoma etap hiagoma Galili nawalipa amam nematawa hiesi na'ipasa basef Godi. ² Jon napisi'as embeli nape nanda' kalabus, ea' name' basefa maol hianai Kraisi nanda'anai. Ea' dei' Jon nasapa' anom alupumi ananisi mafe'ma Kraisi. ³ Ea' mahali'ana ma'i, "Ine' aman ma'wina nafi'i ea', o ata' mope mohafa anona?"

⁴ Ea' Jisas nagwamama basef na'i, "Ipe' pitanima pefe' pi'ipa Jona amamaga amama dei' patolomi pami'ami. ⁵ Isima naep mase'asi asati

wapoti', bo'wagah awamisi safe' andeande', awes aonai nanda' alop asasinai nambu'wi ambo'wes, aligah mase'asi same' basef andeande', saga'i sotanima sohafel wapoti' ea' kwahusi same' basef bu'wami Godi. ⁶Emi egafis ukup etifim sombale'efa ae', isima sandanifel endilisi."

⁷Ea' alupumi amama Joni mafe' etin, Jisas na'ipa esis amam nematawa hiesi ma Jon na'i, "Fowa' ipe' pafe' anona etap fatauguma wafiguma, pafe' pati main? Pafe'ma pati anona aman ina nembale'ef andeande'i si'i anona elifita uf nefa'ana nonda' felifal nalimbi? Owa'etin. ⁸Pafe' pati main? Pafe' pati anona aman nala luwaguf bu'wami atumi? Owa'etin. Epes isima sala luwaguf bu'wami atom esis sape ifagw bu'wami king dambami atom mapeimi. ⁹Dei' ipe' pafe' pati main? Pafe' pati anona aman profet? Ae' a'ipipa, anan profet dembinai nikila' profet hiami hi'alam. ¹⁰Aman anama ea' ma'una anan atona si'i basef mape Baibeli na'iam. God fowa' gani na'ipa Jisas na'i,

'Ine' neme', anona nemaf ae' esapa' anona aman nofa' basef ae'ami nili' nefe' nendondombamena eaf ine'inai.'

¹¹Ae' a'ipipa endilisi. Aman anama Jon napisi'as embeli nikila' amam hiami ma etap anae'. Ea' emi egafis dei' siowis kingdom heveni, epes isima dembesi sikila' Jon. I'i epes isima agof a'asi ma kingdom heveni, esis wapoti' dei' sape dembesi sikila'ana. ¹²Nogota anama fowa' Jon napisi'as embel ea' nafi'i nagata dei', anom amam la'ifimi ma'i mohambombaga waf epes siowis kingdom heveni. Ea' anom amam la'ifimi dei' mawis mape kingdom anama heveni. ¹³Amam mawalipasa basefa mi'uli Godi maloma basef amam profeti mawalipasam mape mafi'i mataga nogota Jon nataganai. ¹⁴I'i ipe' pi'i a'e ma pembale'efa basef amamumi, dei' pegawa Jon anan si'i Elaija, aman anama fowa' amam profet ma'i niefi'i. ¹⁵Ipe' emi egafipa aligah magalipei, peme' basef amama andeande'.

¹⁶Ae' indila'wifa ipe' amam nematawa dei' pape etap anae'i i'imama? Ipe' pape si'i awasi sandatama etifigin sapoma sofala enis awasi sa'i,

¹⁷'Ape' mandani mufapula batagwa ipe', ea' ipe' ina palemb. Ape' manda' awalef malef matamea, ea' ipe' ina palef.'

Ipe' epes dei' pape etap anae' patotopa' basef si'i awasi isima owa' sealemb selef seatasea,

¹⁸Aman anama Jon napisi'as embeli nafi'i ina na' gwa'aimi embel wainim, owa'. Ea' pa'i ambal aonai napeina. ¹⁹Ae' ataga epen endillisiwei afi'i a' gwa'aimi maloma embel wain, ea' patolowe pa'i, 'Piti aman anama na' gwa'aimi hiami na' embel wain hianai endilisi. Anan alupunai ma amam mefa' takisi maloma amam manda' waf aonai!'

Gawa anama gawa bu'unai Godi sonda' waf bu'unai. Epes isima sa'i na'ama, ea' opeh Godi mihi'ambas gawa Ananinai bu'unai endilisi."

Jisas na'i esis wambel hiagoma uwahipis, esis ina samboma opalefa God, owa'.

(Lu 10:13-15)

²⁰Wambel hiagoma taun fowa' Jisas nali' nafe' nanda' ikwaf naninani la'ifinai esis satolom sogawam ea' esis ina samboma opalef safe'ma God, owa'. Na'ama dei' Jisas okom numbutina ²¹na'ipas na'i, "Ae' ati ipe' Korasinipei paloma Betsaidaipei uwahipipa endilisi. Nimanimi awami anona nemaf meatagamepa. Epes isima fowa' gani sanda' waf aonai sape wambel biefim Tair naloma Saidon ina sati ikwaf la'ifinai naninani si'i dei' anda'ana wambel ipe'inai, owa'. I'i esis seatolom, fowa' sowaho'am begah pepe'agatami si'i luwaguf tol sope nif agambeh. Ama sihi'amba enis epes esis ea' samboma opalef endilisi safe'ma God. Owa'etin.

²²Endilisi ae' a'ipipa. Anona nemaf God nowaloga esis amam nematawa hiesi, anama nimanimi Tairi soloma Saidoni amama ina lu'um endilisi si'i nimanimi anona nemaf meatagamipei, owa'etin. Anona nemaf anan nieta esis uwahipis ea' ipe' owa'. ²³Ea' ipe' Kaperneam, anona nemaf esis sefala agof ipe'imi molata ilif? Owa'etin. God nokwahipa pefe' wambel aonai hel. I'i fowa' gani anona aman nonda' anona pepel la'ifinai wambel anama Sodom si'i anda'ana wambel ipe'inai, epes isima Sodom sope etin. Owa'etin. Saga' hi'alas. ²⁴Dei' ae' a'ipipa, nemaf anama lu'unai God nowaloga epesanai, niti esis fowa' sape Sodomi uwahipis. Ea' ipe' anan ina niti uwahipipa, owa'. Ipe' pefa' nimanimi lu'wami awami endilisi."

Jisas na'i, "Ipe' pifi'mai ae' pepoma noma'w."

(Lu 10:21-22)

²⁵Nemaf anama Jisas na'iam na'ama na'i, "Ahalome, ine' Dembinai ma ilif etapi. Ine' nambaho' amamaga amama ma esis epes gawaisi sofa' gawa lu'unai, ea' nambomam nihi'ambasam epes isima gawa a'asi falafisi isima sape si'i awasi. ²⁶A'e Ahalome okom ine'inai na'i ea' anama atona. ²⁷Ahalome ae'anai nanda' amamaga hiami hi'alam mape lagel ae'anai. Ina enin epen negawa ae' Nogalomana Godi, owa'etin. Anan atona nogawe. Ea' owa' enin epen negawa Ahalome, owa'etin. Ae' Nogalomana ananiwei atowe egawana. Ea' emi egafis ihi'ambasa Ahalomei, isima wapoti' esis etis sogawana.

²⁸Ipe' epes panda' maol numa'unai noma'w nahipei ipe' hipei ipe' pifi'mai ae', enda'epa pepoma noma'w. ²⁹Peme' basef ae'ami pilam penda' waf ae'anai. Waf anama si'i anona lawag ae' ase'epana pewandefana ekaguf ipe'imi. Ea' pelafa gawa ae'anai ma pegawa ae'. Dei' main? Ae' anda' waf sa'umbilinai ma epes, ae' ina afela agel ae'anai atona, owa'. Ipe' pifi'mai ae' ma nambimb pepoma noma'wa ambagof ipe'imi. ³⁰Dei' main? Maol ae' ese'epana pefa'anai, anama ina amamaga nimanimi,

owa'. Maol anama andepenai bu'unai endilisi ma niegiambama ipe' epes hipei.”

Jisas atona Dembinai ma nemaf anama sapoma noma'wanai Sabat
(Mk 2:23-28; Lu 6:1-5)

12 ¹Anona nemaf esis Juda sapoma noma'wanai Sabat, Jisas nafe' anagon, nataga anona aof sawa witanai ea' nawis. Ea' alupumi ananiami mafe' malomana nolomaham magi anom wit maufi magwa'am. ²Ea' amam Farisi mati waf anama alupumi Jisasi manda'anai ea' mahali'ana ma'i, “Ine' niti waf anama alupumi ine'imi manda'anai. Amam mosombala mi'uli ma nemaf anama Sabat mapoma noma'wanai. Dei' maina amam manda'am na'ama?”

³Ea' Jisas nagwamam na'ipam na'i, “Ipe' pegawa basef amama ea' ma waf fowa' gani dembinai king Devit nanda'anai. Nemaf anama Devit naloma alupumi ananiami nolomaham. ⁴Anan nawis ipat lu'unai Godi nomon na' bret anama amam pris mondolali maso' Godanai. Ea' anan na'ana naso' alupumi ananiami wapoti' ma'ana etin. Ea' mi'uli ape'inai na'i amam pris atom mea'ana. Enis epes owa'. Anan ina naila mi'uli anama, owa'. ⁵Ipe' patalifa basef amama mape buk mi'uli Godi ea' ma amam pris manda' maol ipat lu'unai Godi nomon nemaf anama Sabat. Basef amama ma nemaf sapoma noma'wanai amam ina magi'am, owa'. Mumbisila'am mawala mi'uli anama. Ea' amam ina manda' waf aonai, owa'. ⁶Ae' dei' a'ipipa, enin epen dei' nape na'ae enin nikila' ipat lu'unai Godi. ⁷Basef mail buk Baibel fowa' amam manda'ami ma'iam na'ama ma'i, God na'i, 'Ae' ina okom na'i bulmakau mafis pindalalima ae'ami, owa'. Ae' okom na'i ipe' piti sahin owan ipe'isi uwahipis.’

I'i ipe' pegawa basef amama Godi ofagema, ipe' ina pewaloga epes isima owa' sonda' anona waf aonai, pi'i awasi. Owa'etin. Ipe' owa' pegawami. ⁸Dei' main, ae' ataga epen endilisiwei, ae' atowe ape Dembiwei ma nemaf anama Sabata i'ipipa maina maol andeande'ma pila basef penda'ana nemaf anama.”

Jisas nanda' aman lagel aonainai bo'ona nemaf anama sapoma noma'wanai
(Mk 3:1-6; Lu 6:6-11)

⁹Jisas nohafel nakwaha aof anama nafe' nawis anona ipat esis Juda sa'i basef sapeinai. ¹⁰Ea' nati anona aman lagel aonainai nape ipat anama. Wa'ana naga' dindigina nailana. Anom amam ma'i mogolopa anona eafa meambaso'ma Jisasa anom basef baso'maimi ma monda'mana basef.

Ea' mahali'ana ma'i, “Afa' andeande'ma wigiambama enis epes awesisi ma nemaf anae' sapoma noma'wanai, o owa'?”

¹¹Ea' Jisas nagwamam basef na'ipam na'i, “I'i anona aman ipe'inai sipsip ananinai nefe' newala nepe anona nowaga lounai nemaf anama

Sabat sapoma noma'wanai, ipe' pafe' pagianai. ¹²Waf anama bu'unai. Ea' epes sikila' sipsip endilisi. Ea' na'ama etin ape' monda' waf bu'unai migiambama epes nemaf anama mapoma noma'wanai.”

¹³Ea' Jisas na'ipa aman anama lagel aonainai na'i, “Dowa lagel ine'inai usi'ina.”

Ea' aman nando lagel ananinai nataga bo'ona wapoti', si'i wa'ana. ¹⁴Ea' amam dambami Farisi mohafel mawis ande' munduwa'anima ma'i basef mandame'mama moha Jisas neaga'.

God nandandepa Jisasa neanda' maol ananinai

¹⁵Jisas nogawa amam ma'i mohana neaga'. Ea' nakwaha wambel anama nafe' ea' hiesi sailana safe', nanda' isima awes nanda'asi sataga bo'wes. ¹⁶“Ea' na'ipas mehipe na'i esis ina sowalapa anan si'iana alihina, owa'. ¹⁷Anan na'ipas na'ama etin si'i anom basef God fowa' na'ipa profet Aisaiai. Basef amama mataga endilisi ma'iam na'ama ma'i,

¹⁸”“Piti aman anama nanda' maola ae'i, ae' andandepana ea'. Nomonas ae'ami maimailana endilisi, okom ae'anai ea' bo'oma anan. Ae' nambimb ese'ana Ambal Bu'unai Ae'anai nuwalipasa basef ae'ami ma neawaloga epes hiesi owa' seagawa ae'i ma waf bu'unai usi'inai.

¹⁹Aman anama ina nonda' megah mahas ninifalis ni'ipas diga lu'unai, owa'. Esis ina some' malogel ananinai noga nie'i eaf lu'unai, owa'.

²⁰Anona elifita sa'unai nondola'i anama anan ina nowalona, owa'etin. Ea' anona lam fandona sa'osa'ombel, anama anan ina nehefana noga', owa'. Anan nope nonda' maol la'ela'ef nefe' nefe' neatagama nemaf anama nonda' waf bu'unai nikila' endilisi waf aonai ma neawala.

²¹Ea' esis amam nematawa hiesi owa' seagawa ae'i sila basef ananiami sope sohafana ma negiambamas.”

Esis sa'i Jisas nanda' maol naloma Belsebul, dembinai ma ambagof awami (Mk 3:20-30; Lu 11:14-23, 12:10)

²²xNemaf anama esis sofa'ai anona aman ambal aonai nawisanai safi'mai Jisas. Naep mase'ana malogel ananinai nase'ana, ea' Jisas nanda'ana bo'ona, na'i andeande' naep mati natologon nafe' andeande'.

²³Ea' amam nematawa hiesi gegelalasis kwapete'as sa'i, “Aman anama anan Devit akunamana?”^y

u 12:16 Mt 8:4; Mk 3:12 v 12:17 Ais 42:1-4 w 12:18 Mt 3:17 x 12:22 Mt 9:32-33 y 12:23 Esis Juda sa'i agel anama Devit akunamana agel wa'ana ma Kraiss, God nandandepana nosapa'ana neafi'i.

²⁴ʔEa' amam Farisi mame' amama mambaso'am ma'i, "Anan natofa ambagof awami ma pepel anan dembinai ma ambagof awami agilinama Belsebul anan atona."

²⁵Ea' Jisas nogawa ukup amamumi na'ipam na'i, "I'i enis epes hiesi sape etap hiagoma anona kantri sondawaloga biefisa sopa', ina nambimb la'ifis, owa'. I'i enis epes wambota atotona sondawaloga biefisa sopa', esis nambimb ina la'ifisa seapa', owa'. ²⁶I'i wambota Satani sondawaloga biefis seapa', nambimb wambota ananinai la'ifis si'imama? Owa'. ²⁷I'i endilisi ae' atofa ambagof awami ma pepel Belsebuli, dei' emi nigiangama epes ipe'isi satofam? Owa'. Dei' epes isima ipe'isi etis sihi'ambepa basef ipe'imi owa' endilisimi. ²⁸Endilisi, Ambal Bu'unai Godi nigiangama ae' atofa ambagof amama awami. Ea' dei' ipe' pegawa nemaf anama piowis wambota Godi numafipa dei' natagamepa ea'.

²⁹Anom basef wapoti' amama. Enin epen ina la'ifina nefe' nuwis ipat anona aman la'ifinai napeinai nonda' wala amamaga ananimi, owa'. Enin ata' nili' nombalo'ana nowa'ana tatala'ina, anan la'ifina ma niowis nokolawefa nefa' amamaga ma'oh ipat aman anama.

³⁰Emi egafis owa' alupisi ae'asi ma owa' sepe la'ela'ef seloma ae', esis naumbih ae'asi. Emi egafis owa' sekolasa sipsip moloma ae', esis satofa sipsip mafa' mafe' atona etin deindei. ³¹Ea' ae' dei' a'ipipa, anona nemaf God nokwaha waf aonai naninani hianai noloma basef findiwaimi hiami amam nematawa sanda'ami hi'ilam. Ea' emi egafis sanda' basef findiwama Ambal Bu'unai Godi, anona nemaf God ina nokwahomasam, owa'. ³²Emi egafis seanda' anom basef awami findiwama ae' ataga epen endilisiwei, nambimb God nokwahomasa awami amama asasimi. Ea' emi egafis sanda' basef findiwama Ambal Bu'unai Godi, anona nemaf God ina nokwahomasam, owa'. Findiwa aonai la'ela'ef nopais, dei' nogota anae' nefe' anona nemaf nogota nigil' neatagai wapoti' nope la'ela'ef hihif.

Lawag aonai nail nola su'utip awami

(Lu 6:43-45)

³³Lawah bu'wami mail mola gwa'aimi bu'wami. Lawah awami mail mola gwa'aimi awami. Dei' main, ape' mati gwa'aimi mailami, mogawa lawah bu'wami awami. ³⁴Ipe' epes aopei si'i iguf mahasi, nambimb ipe' la'ifipa pi'i basef bu'wami? Owa'etin. Maim basef mape si'ima opalef epesi, amama atom esis sawalapama malogof asasimi. ³⁵Epes bu'wasi, esis ukup bu'wami mapeis ea' sawalapa waf bu'unai. Ea' epes awasi waf hianai aonai napeis ea' sawalapa waf aonai atona.

³⁶Dei' ae' a'ipipa. Basef hiami amam nematawa sa'iami, anona nemaf God nohali'asa basef amama ea' nowalogas nemaf anama newaloga epes hiesi anai.

³⁷Basef ipe'imi atom anona nemaf God neme'epamam newaloga ipe' ni'i ipe' epes bu'wipei. Ea' i'i owa', ea' basef amama ipe'imi atom anona nemaf God neme'epamam wapoti' newaloga ipe' ni'i ipe' epes aopei.”

Enis epes sa'i siti amamaga pepel Godi

(Mk 8:12; Lu 11:29-32)

³⁸Ea' nemaf anama anom mawalipasa mi'uli Godi maloma anom Farisi mahali'ana ma'i, “Tisa dembinai, afa' wa'i ine' nenda' anona ikwaf la'ifinai si'i God nanda'anai ma afa' ata' otolona.”

³⁹Ea' Jisas nagwamam basef na'ipam na'i, “Ipe' amam nematawa dei' pape etap anae' panda' waf aonai pewa' alafugaha God. Dei' maina ipe' pa'i piti Ae' enda' anona ikwaf la'ifinai ma ihi'ambepa pepel Godi? Ae' ina ihi'ambepa pepel anama ipe', owa'. Ikwaf anama la'ifinai fowa' God nihi'amba profet Jona atona nambimb ihi'ambepana ipe'. ⁴⁰Fowa' gani aman anama Jona aol lu'unai nowalo'ana nape opaf nomon nimeguf wanom, owambeh wanom. Ea' na'ama etina ae' ataga epen endilisiwei nambimb epe nimeguf wanom owambeh wanom etap nomon. ⁴¹Nemaf anama God newaloga esis amam nematawa esis epes Ninivaisi sohafel sola' basef motanima milipa ma waf aonai ipe' panda'anai. Dei' main, esis Ninive same' basef Godi Jona na'ipasami ea' samboma opalef safe'ma God. Ea' dei' anona nikila' Jona nape na'ae. ⁴²Anona nemaf God nowaloga epes, nemaf anama ano'w nemata'w kwim dembe'wi kwapani gani wa'ol aon nowalama lambihilifinama kohafel koloma ipe' pape na'ae kogwamepa basef motanima milipa kwi'i ipe' epes aopei. Dei' main, kwim akwama kwapani gani etap nafe' notambela ea' kwafi'i kwame' basefa gawa lu'unai dembinai king Solomon nawalipasanai. Ea' dei' anona nikila' Solomoni nape na'ae.

Basefa ambal aonai notanima nafi'i nawis enin epen wapoti'

(Lu 11:24-26)

⁴³Nemaf anama anona ambal aonai nakwaha enin epen nawisi nafi'i, anan nafe' anama fatauguma nogolopa anagon na'i neapoma noma'w. Owa'. Ina nati anagona neape, owa'. ⁴⁴Ea' na'i, 'Ae' etanima efe' ipat fowa' apeinai.' Ea' nafi'i nati ipat anama sambefana andeande' sofalo'mana nape wafina. ⁴⁵Ea' notanima nafe' nao'wai anom ambagof awami 7-peleim wapoti' mafi'i mawis mape ipat anama. Ambagof amama awami endilisi manda' waf aonai nikila' waf aonai fowa' nali' nanda'anai. Fowa' epen inima nape awen ea' dei' nape awen endilisi nikila' pe fowa' nali' napeinai. Ipe' amam nematawa dei' pape etap anae' panda' waf aonai, anona nemaf pepe awepa na'ama etin si'i epen inima.”

Mama'wana Jisasi kwaloma owapana ananimi

(Mk 3:31-35; Lu 8:19-21)

⁴⁶Jisas ata' na'ipasa basef etin esis amam nematawa, mama'wana kwaloma owapana ananimi safi'i saitau ande' sa'i si'ipana anom basef.

⁴⁷Ea' anona aman na'ipa Jisas na'i, "Ine' neme', mama'wena ine'ikwi kwaloma anom owapena ine'imi safi'i saitu ande' sa'i solomena si'i."

⁴⁸Ea' anan nagwamana basef na'ipana na'i, "Mama'we owape ae'asi emi egafis?"

⁴⁹Ea' nanda' lagel nendela'wifa amam alupumi ananiami na'ipas na'i, "Piti mama'we kwaloma owape ae'asi isima. ⁵⁰Emi egafis sila okom Ahalome nape heven ilif, ma sila waf ananinai, amama atom si'i mama'we owape henitiame ae'asi."

Basef womun etina aman nowaha olelemb gwa'aimi aof

(Mk 4:1-9; Lu 8:4-8)

13 ¹Nemaf anama atona Jisas nakwaha ipat nawis ande' nafe' nape felefele'ma walemb batupa'manai lu'unai. ²Ea' amam nematawa hiesi safi'i salipana sape. Ea' nalata natoma anona bot sa'unai, esis saitu akata. ³Ea' na'ipasa basef hiami wamon etini na'ipas na'ama na'i, "Anona aman nafe' nowaha olelemb witim si'i rais anona aof. ⁴Anan nowahom nafe', anom mowa eaf safe'ma ea' amiguf mufia' mafi'i ma'am. ⁵Ea' anom mowa otambaiguma etap ina lu'una, natoma ilif atogon, ina nowala owin. Ea' mataga mehipe. ⁶Ea' owaf naluwi naham alim masilimb ina mowala etap ea' alim. ⁷Ea' anom mowala la'afena mandelef wandafumi mataga malomam maofenia wit, ea' ina mail mola gwa'aimi, owa'. ⁸Ea' anom mowa mafe' etap bu'unai ea' mataga malo mail mola gwa'aimi. Anom mola 100-peleim, anom mail mola 60-peleim, ea' anom mail mola 30-peleim atom. ⁹Ipe' aligah magalipei ma pame' basef amama, peme'am andeande' ukup okokomam."

Basef ofagema ma Jisas na'i basef womun etin

(Mk 4:10-12; Lu 8:9-10)

¹⁰Ea' amam alupumi ananiami mafi'mai Jisas ma'ipana ma'i, "Dei' maina ine' na'ipasa basef esis womun etin?"

¹¹Ea' nagwamama basef na'i, "God nihi'ambepa basef ofagema mape mandambahi'i ma ipe' piowis kingdom heveni. Ea' epes isima, owa'etin.

¹²Emi egafis sembale'efa basef Godi nambimb God nowatanimasam wapoti'. Ea' isima owa' sembale'ami, nambimb basef kwawie'im amama esis sombale'efami, God nondalombasam esis sopan etin. ¹³Basef ofagema ma ae' dei' a'i basef wamun etinami ma esis, amama.

'Esis sotologon, ea' ina nambimb siti anom amamaga, owa'. Ea' esis some' basef aligah asasimi ea' ina sogawa ofagema, owa'.' ¹⁴Esis sanda'am na'ama ma anom basef fowa'imi mandawalap endilisi. Basef amama anona profet Aisaia fowa' God na'ipanam nanda'ami ma'iam na'ama ma'i,

'Ipe' anona nemaf pegehembe' peme' basef, ea' ina pegawa ofagema. Ipe' petologon la'ela'ef, ea' ina piti anom amamaga, owa'.

¹⁵ Dei' main, ukup amam nematawa isima mase'as endilisi, aligah asasimi mase'as ukup iwanima seame' basef. Ea' sasopama naep asasimi ma siti amamaga. I'i owa', seme' basef aligah asasimi ma sogawa basef ofagema ma ukup asasimi. Ama esis somboma opalef sila ae' ma enda'as bo'wes wapoti'. Owa!'

¹⁶ Ea' ipe' pandanifel. Dei' main, naep ipe'imi ea' mati amamaga, aligah ipe'imi mame' basef. ¹⁷ Ae' a'ipipa endilisi, fowa' gani amam profet hiami maloma anom amam manda' waf bu'unai ma'i miti amamaga amama dei' ipe' patulumi, owa'. Ukup amamumi maimailam endilisi ma mame' basef amama ipe' pame'ami. Owa. Amam ina mame'am.

Jisas nawalipama basef ofagema womun etina olelemb gwa'aimi
(*Mk 4:13-20; Lu 8:11-15*)

¹⁸ Ipe' peme' basef ofagema amama womun etina aman anama nowaha olelemb gwa'aimi aof. ¹⁹ Basef amama ma epes siowis kingdom heveni mape na'ama. Olelemb mowa eafi amama si'i epes isima same' basef amama, esis ina okokoma basef, owa'. Ea' Satan nafi'i nofa' basef amama God nase'asam opalef asasimi nakwahom nafe'. ²⁰ Ea' anom mowa mafe' anagon otambaiguma, amama si'i enis epes same' basef Godi sofa'am mehipe sandanifelamam. ²¹ Isima si'i masilimb ina mowala etap owin. Esis sembale'am nogota bandana etin ea' nemanimi matagamas enis amam nematawa sandaiwa'ma sembale'a basef Godi sanda'as findiwas sahas sanda'masa waf aonai ea' sandahagas satanima. ²² Anom mowa mandelef wandafumi la'afen, amama si'i enis epes same' basef sailam safe', ukup matamea ma amamaga amama mape etapi ma ukup maimaila moni maim hiami ea' amama mataga maofania basef Godi. Ea' ina sombale'ef sanda' waf bu'unai la'ifis, owa'. ²³ Ea' anom mowa etap bu'unai si'i epes isima same' basef bu'wami ma ukup asasimi maimailam sogawama sanda' waf bu'unai. Enis sanda' waf bu'unai si'i olelemb mola 100-peleim, enis si'i mola 60-peleim. Ea' enis si'i mola 30-peleim atom."

Basef womun etina otalef awami malo aof

²⁴ Ea' Jisas na'ipasa anom basef womun etin wapoti' esis amam nematawa hiesi na'i, "Epes siowis kingdom heveni si'i anona aman nafe' nowaha olelemb bu'wami gwa'aimi aof ananinai. ²⁵ Anom nimeguf mafe'ma ea', owamb esis hiesi sa'ihhi, anona aman naumbihinai nafi'i nowaha otalef awami wapoti' aof anama anan do'ok nowaha olelemb bu'wami ea' nafe'. ²⁶ Anom nimeguf mafe'ma ea' olelemb amama bu'wami mataga ma monafa mola gwa'aimi, amam manda' maola aman ofagonama aof ea' mati otalef awami mataga mape maloma olelemb bu'wami.

²⁷ Ea' mati na'ama, mafi'i ma'ipa anan ma'i, 'Dembinai, afa' wa'i ine' newaha olelemb bu'wami aof ine'inai. Ea' otalef amama awami malo. Emi newahom mataga?'

²⁸ Ea' na'ipam na'i, 'Anona aman naumbihinai nanda'am.'

Ea' ma'ipana ma'i, 'Ine' na'i afa' ofe' ugi otalef amama awami owa'aniam mo'oh atogon?'

²⁹ Ea' aman anama na'ipam na'i, 'Owa'. Na'ama pelalama wit pigiam moloma otalef awami. ³⁰ Ipe' kwahowam mope atifima la'isitai, ea' usifa'am. Nogota anama sofa' gwa'aimianai, ae' i'ipa amam manda' maol anama i'ipam i'i, "Ipe' piwa'ania otalef amama awami piwasi'am ondogw mo'oha peofam. Ea' petama wit pefa'am pekolasom mofe' miowis mo'oh ipat ae'anai." ' ' "

Basef womun etina nalelef anona lawag mastet naloma yis manda' bret natifi

(Mk 4:30-32; Lu 13:18-21)

³¹ Ea' Jisas nase'asa anom basef womun etin wapoti' na'i, "Epes siowis kingdom heveni si'i nalof su'utipi sa'umi. Anona aman nofa'am nawam aof ananinai. ³² Nalelef mastetimi sa'usa'umi. Ina lu'um si'i su'utip gwa'aimi lawah hiami, owa'. Amama sa'usa'um endilisi. Ea' mataga malo, lu'um mikila' gwa'aimi hiami mape aofi. Amam mataga si'i lawag lu'unai ea' amiguf mafi'i mala alegah mail agof."

³³ Ea' nawalapa anom basef womun etin wapoti' ma esis na'i, "Epes isima siowis kingdom heveni si'i yis ano'w nemata'w kofa'am kwambomam maloma plaua hiami mala dram lu'unai ea' plaua hiami matef lu'um."

Jisas nawalapa basef womun etin

(Mk 4:33-34)

³⁴ Ea' Jisas nawalapa basef amama hiami womun etina amam nematawa isima hiesi. Anan ina na'ipasam alihim, owa'. Na'iam womun etin. ³⁵ Anom basef anona aman profet fowa' gani nanda'ami dei' mataga alihim mandawalap mapan. Profet anama na'iam na'ama na'i,

"Anona nemaf ae' ie'i malogel i'i basef womun etin. Ae' ie'i basef mape mandambahi'i dambadamba God nanda' ilif etap mafi'i mafi'i mataga dei'."

Jisas na'ipa alupumi ananiami ma basef ofagema womun etina otalef awami

³⁶ Ea' Jisas nohafel nakwaha esis amam nematawa hiesi nafe' ipat, ea' alupumi ananiami mafi'mai anan ma'ipana ma'i, "Basef amama womun etina otalef awami mataga aof, ine' newalapa ofagema ma afa'."

³⁷ Ea' Jisas nagwamama basef na'ipam na'i, "Aman nowaha olelemb bu'wami anama ae' ataga epen endilisiwei. ³⁸ Ea' aof anama si'i wambel etap anae' hiagoma. Ea' olelemb amama bu'wami si'i epes siowis kingdom heveni. Ea' otalef awami, amama si'i epes awasi Satani. ³⁹ Ea'

aman anama naumbihinai nowaha otalef awami, anan Satan. Ea' nogota anama sola gwa'aimianai, anama si'i nemaf akutainai ma etap anae' hiagoma. Ea' amam amama mola gwa'aimi witi, amama si'i amam ensel. ⁴⁰Nemaf anama amam motama otalef awami mofam nif hi'ilalm na'ama etin si'i nemaf akutainai. ⁴¹Ae' ataga epen endilisiwei anona nemaf ae' esapa'i amam ensel ae'ami ea' motofa amamaga amama hiami manda' epes sanda' waf aonai moloma amam nematawa isima hiesi sanda' waf aonai muli'amonas seakwaha kingdom Ae'anai. ⁴²Ea' amam ensel mokwaha epes isima sefe' nif lu'wami fandomi sepe nif amama selef kwapete'as nalelef tilili talala' sope awes. ⁴³Nemaf anama amam nematawa bu'wasi seataga wanefigeis si'i aon alipunai nalatawi kingdom Ahalomasi. Epes aligah mapaipei, ipe' peame' basef amama andeande'.

Basef womun etina aman nati amamaga satalom otamba hiami mandambahi'i

⁴⁴Epes siowis kingdom heveni si'i anom amamaga satalom otamba hiami sambaho'am ma'oh anona aof etap. Ea' anona aman nafi'i natolom nambaho'am wapoti'. Anan nandanifel endilisi nafe' nofala enis epes safi'i sase'ana moni ma satala amamaga ananiami hi'alam. Ea' nofa' moni anama nafe' natala aof anama.

Basef womun etina ombahigis satalis otamba hiami

⁴⁵Anom basef wapoti', epes siowis kingdom heveni si'i anona aman nanda' bisnis nagolopa enis ombahigis bu'wasi etis. ⁴⁶Ea' nati enis bu'wasi endilisi satalis otamba hiami nofala enis epes safi'i ma sase'ana otamba satala amamaga ananiami hi'alam. Ea' nofa' otamba ma isima nafe' natala ombahigis isima fasisi etis.

Basef womun etina anemb

⁴⁷Anom basef wapoti'. Epes siowis kingdom heveni si'i anona anemb anom amam mafe' malana nowala walemb batupa'manai lu'unai malimai agof mamumami. ⁴⁸Ea' anemb anama si'ina ma agof mahende'ana nafi'i akata wata'ita. Ea' mape masifa'ma agof bu'wami atom malo'am holalef. Ea' awami makwahom. ⁴⁹Ama anona nemaf akutainai etap anae' ea' na'ama etin si'i amam masifa'ma agof bu'wami dei awami dei. Nemaf anama amam ensel mufi'i misifa'mas sanda' waf aonai sape la'afena amam nematawa isima bu'wasi mofa'as mefe' ⁵⁰mokwahis sefe' nif lu'wami fandomi. Ama seapan nif amama lu'wami sowa selef kwapete'as nalelef tilili talala' sopan la'ela'ef."

Basef endilisimi amama namumi maloma apimi

⁵¹Ea' Jisas nahali' alupumi ananiami na'i, "Ipe' ea' pegawa basef amama hiami o owa'?"

Ea' magwamana basef ma'i, "A'e."

⁵²Ea' na'lipam na'i, "Amom dambami mawalipasa mi'uli Godi molafa basef ananimi ma miowis kingdom heveni, amam mandahama si'i anona aman ofagonama ipati. Anan nafe' nawis ipat nomon nofa'ai amamaga bu'wami namumi maloma apimi ea' nofa'am nafi'i."

Esis amam nematawa sape Nasareti sase'ana alafugahama Jisas

(Mk 6:1-6; Lu 4:16-30)

⁵³Jisas nawalipam basef amama womun etin ma ea', nakwaha wambel anama ⁵⁴nafe' wambel ananinai ofagama. Ea' nawis ipat esis Juda sa'i basef sapeinai nasefela basef Godi na'ipasam. Anan na'iam na'ama esis gegelalasis kwapete' sa'i, "Gawa anama naloma pepel anama ma nanda' amamaga si'i God nanda'ami, anan nofa'ana eti? ⁵⁵A'i aman anama nogalomana aman nala' ifagwi Maria kolanai? Ape' mogawa owalopana ananimi Jems Josep Saimon Judas mape na'ae. ⁵⁶Henitiamana ananiwai wape walomapa na'ae. Ea' amamaga amama gawa bu'unai anan nofa'ana eti?"

⁵⁷Ea' sowa' alafugaha anan.

Ea' Jisas na'ipas na'i, "Anona profet nofa' agel lu'unai wambel hiagoma deindei, sa'i anan dembinai sembale'efana. Ea' ina nofa' agel lu'unai wambel ofagama ananima, wambota ananinai sapoma, owa'."

⁵⁸Ea' esis owa' sembale'efana, owa'. Na'ama dei' anan ina nanda' anom amamaga la'ifimi hiami wambel anama, owa'.

Amam matopa' bagato'w ma Jon, aman anama napisi'as embeli afuna

(Mk 6:14-29; Lu 3:19-20, 9:7-9)

14 ¹Nemaf anama anona aman agilinama Herot nape dembinai gavmana etap hiagoma Galili. Anan name' basefa maol bu'unai Jisas nanda'anai, ea' name' safela agel Jisasi nafe' lu'una. ²Ea' Herot na'ipa isima sanda'mana maol na'i, "Aman anama Jon napisi'as embeli dei' nohafel wapoti' nape la'ifina nanda' maol si'i God nanda'anai."

³⁻⁴Fowa' basef amama mape na'ama. Herot owalomana Filip waulu'mana anani'wi agili'wa Herodias. Ea' sahalomana Herot nandalombana'w. Ea' Jon na'ipa Herot na'i, "Ine' naso' nemata'w sahalomenai, ea' nawala mi'uli Godi. Na'ama ina andeande', owa'."

Ea' Herot nandaiwa'ma neali'amonaw ea' na'ipa amam soldia mombalo' Jon mofa'ana mafe' manda'ana nanda' kalabus. ⁵Herot na'i nohana noga', ea' owa'etin. Dei' main, anan umbamahanama amam nematawa hiesi sa'i Jon anona profet. Na'ama Herot ina nahana, owa'. ⁶⁻⁷Nafe' ma anona nemaf Herot nofala epes hiesi safi'i sandakolas etifigin nandanifela ma nemaf mama'wana kolanai. Nemaf anama Herodias nogama'w kwafi'i kwawisi nomon kwaitu kwalemb. Esis hiesi satolo'w ea'

Herot nandanifela ma akwa'w na'i basef la'ifimi endilisi gani ilif na'iam na'i, "Endilisi ae' a'ipina, i'i ine' ni'ipa ae' ma ease'ena anom amamaga ae', ese'enam."

⁸Ea' akwa'w kwafe'ma mama'wakw kwahali'akw kwafe' kwa'ipa Herot kwa'i, "Dei' etef ae' a'i ine' neha aman anama Jon napisi'as embeli neaga' netopa' balaga nola anona plet nefa'anai nese'eana."

⁹⁻¹¹Akwa'w kwa'iam na'ama, opaf Heroti nimanina endilisi. Ea' anan okom na'i basef endilisi gani ilif na'iam la'ifimi, ea' amam nematawa hiesi isima same'ana. Ea' nasapa' anona aman soldia nafe' ipat kalabusanai natopa' bagato'w Joni nala balaga nala anona plet nafi'i naso' Herodias nogama'w kofa'ana kwafe' kwaso' mama'wakw. ¹²Ea' amam alupumi Joni mafi'i mofa' alop si'ina mafe' mawana hi'agif. Ea' mafe' ma'ipa Jisasa amamaga amama.

Jisas nase'asa gwa'aimi amam nematawa hiesi 5,000-peleis

(Mk 6:31-44; Lu 9:10-17; Jo 6:1-13)

¹³Jisas name' basef amama, anan atona nafe' nakwaha wambel anama nofa' bot nafe' anagon wafiguma epes a'agoma. Ea' amam nematawa hiesi same' basefa Jisas nafe', sakwaha wambel hiagoma asasima sailana safe' eaf sa'i sotolona. ¹⁴Jisas nafe' nataga akata nati esis hiesi nati uwahipis. Ea' nati epes asasisi awes nanda'asi nanda'as sataga bo'wes wapoti'.

¹⁵Wambomota felefele'ma owamb alupumi ananiami mafi'i ma'ipana ma'i, "Afa' wape na'ae wafiguma ea' wambomota felefele'ma owamb. Ine' nesapa'as sofo'o wambel asasima setala gwa'aimi sonda'am sea'am."

¹⁶Ea' Jisas nagwamam na'ipam na'i, "Ae' ina esapa'as sefe', owa'. Ipe' etipa pese'as gwa'aimi."

¹⁷Ea' amam ma'ipana ma'i, "Afa' gwa'aimi ina hiam. Bret lagel wa'ana atona naloma agof biam ea' ma'um ma'omafa."

¹⁸Ea' na'ipam na'i, "Ipe' fa'am fi'i pese' ae'."

¹⁹⁻²⁰Ea' na'ipa amam nematawa hiesi sape otalef bu'wami etap. Ea' nafela bret anama lagel wa'ana atona naloma agof naniga nati heven ilif nanifela God ea' nawalam naso' alupumi ananiami mafe' mase'as sa'am dende' alihis andeande'. Ea' alupumi ananiami matatama tu'wa'wanimi ma'ihhi malo'wam holalef lu'wami 12-peleim si'im endilisi. ²¹Epes sa' gwa'aimi amama hiesi. Esis seamba amam atom mataga 5,000-peleim. Ea' ina seamba awasi nematawa, owa'.

Jisas natoma nafe' embel ilif walemb batupa'manai lu'unai

(Mk 6:45-52; Jo 6:15-21)

²²Ea' Jisas nasapa' alupumi ananiami mofa' bot mali' mafe' walemb batupa'manai lu'unai anama mambo fisana. Ea' nasapa' amam nematawa

isima hiesi safe'. ²³Safe'ma ea', anan atona nandowasa' halaf nape nanda' beten nahali' God.

Wambomota felefele'ma owamb, anan atona ata' napani halaf ilif. ²⁴Ea' alupumi ananiami mape bot mali' mafe' mape walemb batupa'manai lu'unai la'afen, ea' uf lu'unai naluwi. Ea' naoh fepo mafi'i makwasa bot. Ea' uf wapoti' nalo nakoto'ma bot, nanda'am bumu boma nala.

²⁵Owamb ata' nail etin, felefele'ma lala, Jisas nailam natoma nafe' embel ilif nafe'ma amam. ²⁶Amam mati anan naitu nafi'i embel ilif, umbamaham kwapete' ma'i, anona gamba nailam nafe'. Ea' manda'am wige' ma'oh kwapete'am. ²⁷Ea' Jisas nalomam na'i mehip na'i, "Ipe' la'ifipa umbamehepa owa'. Ae' atowe ma'uwi ailipa afi'i."

²⁸Ea' Pita nagwamana na'ipana na'i, "Dembina! I'i ine' ma'wina, ni'ipa ae' itu efe'mago ine' embel ilif."

²⁹Ea' Jisas na'ipana na'i, "Ine' fi'i."

Ea' Pita nakwaha bot natoma nafe' embel ilif nafe'ma Jisas. ³⁰Ea' anan nati naoh mohafel lu'um, umbamahana na'i nowala naoh. Ea' nofala Jisas na'i, "Dembina! Nigiambame."

³¹Ea' mehip etin Jisas nowasa' lagel nahapilana na'ipana na'i, "Ine' owa' nembale'ef la'ifina ni'i ae' la'ifiwei, owa'. Dei' maina ine' nomonas mape biefim?"

³²Ea' amam biam malata bot, uf naloma embel mandahagas. ³³Ea' amam mape boti mati amamaga amama manda' lotuma Jisas mafela agel Godi lu'una ma'i, "Endilisi etis, ine' nogalomana Godi."

Jisas nanda' amam nematawa hiesi awesisi anagon etap hiagoma Genesaret ambo'wes
(Mk 6:53-56)

³⁴Ea' Jisas naloma alupumi ananiami mowala mambo walemb batupa'manai anama mafe' mataga anagon etap hiagoma Genesaret. ³⁵Ea' enis epes sape etap anama sagawana sa'i anama Jisas. Ea' sasapa' enis safe' sa'ipa enis sape felefele'i hiagoma sofa'ai enis epes awes nanda'asi safi'mai anan. ³⁶Ea' sofa'ai isima awes nanda'asi sa'ipana saisailana sa'i anan ni'i a'e ma isima sohapila lowaf ananinai da'malifina atona. Ea' emi egafis sahapila lowaf ananinai sataga bo'wes wapoti'.

Mi'uli Godi nikila' basef bafas akwis
(Mk 7:1-13)

15 ¹Nemaf anama anom Farisi esis Judai maloma anom amam mawalipasa mi'uli Godi makwaha Jerusalem mafi'mai Jisas. Ea' mahali'ana ma'i, ²"Dei' maina alupumi ine'imi mumbisila' waf

ape'inai akupapa mase'apenai? Ama amam owa' measa'opa lagofa^b mea' gwa'aimi.”

³Ea' Jisas nagwamama basef na'i, “Dei' maina ipe' pawala mi'uli Godi ma paila waf ipe'inai atona? ⁴cIpe' pawala basef God na'iam na'i, 'Ipe' pinifela mamasepa ipe'isi pembale'efas pigiambamas. Emi egafis si'i basef awami ma ahapas mamasas asasisi, isima enis epes sohas sogal.’ ⁵Ea' ipe' pambaso'am pa'i anom basef na'ama pa'i, Emi epen nindaiwa'ma nigiangama mamasan ni'ipas ni'i, 'Otamba maim ae'ami andaiwa'ma ese'epam. Ae' andandepama ese'anam God.’ ⁶Ea' ipe' Farisi paloma ipe' enipa pawalipasa mi'uli Godi, ipe' pa'i a'e ma epen inima nembaso'ma mamasan, ea' ina nagiambamas.

Ipe' panda' waf anama pesambala basef amama Godi na'i migiangama mamasapa. Ea' panda' waf ipe'inai atona lu'una. ⁷dFowa' profet Aisaia nendela'wifa ipe' endilisi, ipe' pa'i basefa malogof biam. Anan nanda'am andeande' dende'ma ipe' na'iam na'ama na'i,

⁸ ‘Amam nematawa isima safela agel ae'anai lu'una malogof asasimi atom ande', ea' opalef asasimi mape laogona ae'. Ukup asasimi ina sembale'efa ae', owa'.

⁹ Esis ina sawalipasa basef ae'ami. Esis sawalapa mi'uli epes sape etapi sambaso'mas sa'i, “Mi'uli anama basef Godi.” Ea' sanda' lotu safela agel ae'anai atona.’ ”

Amamaga awami manda' epes sanda' waf aonai

(Mk 7:14-23)

¹⁰Ea' Jisas nofala esis amam nematawa hiesi safi'mai anan na'ipas na'i, “Ipe' hipei peme' basef Ae'ami okokomam pegawam andeande'.

¹¹ eAmamaga gwa'aimi maim ande'ami ipe' pegwa'am mowala nomon, amama ina manda'epa awepa, owa'. Ea' amamaga mape ukup ipe'imi nomon mawisi ande', amama atom manda'epa awepa.”

¹² Ea' alupumi ananiami 12-peleim mafi'mai anan ma'ipana ma'i, “Ine' negawa amam Farisi mame' basef amama ine'imi mandaiwa'mam opalef aoma ine'?”

¹³ Ea' nagwa basef womun etina amam na'ipam na'i, “Ahalome ae'anai nape heveni nawa amamaga anona aof. Ea' amamaga hiami anan owa' neawami, amama anona nemaf nigiam moloma nombalef masilimb. ¹⁴Ipe' kwahowa amam Farisi ata' mopan. Amam si'i amam naep mase'ami ma'i mihi'amba eafa enis epes. I'i esis naep mase'asi si'i sihi'amba eaf enis

b 15:2 Amam Farisi ma'i esis owa' Judaisi waf asasinai aona. Ea' ma'i emi egafis safe' anagon eaf o maket, ma sitanima siefi'i ifagw, ata' sili' sosa'opa lagof ea' sea' gwa'aimi. Owa' seasa'opa lagof, amam ma'i lagof asasimi alugum. **c 15:4** Eks 20:12; Eks 21:17; Diu 5:16 **d 15:7** Ais 29:13 **e 15:11** Mt 12:34

epes isima naep mase'asi, atuwasi esis hiesi sondakolas dogwas sefe' sowala etin kwambiwig.”

¹⁵Ea' Pita nagwamana basef na'ipa Jisas na'i, “Ine' ni'i basef amama ofagema womun etina amamaga awami ma afa' ata' weame'am.”

¹⁶Ea' Jisas na'ipam na'i, “Ipe' wapoti' nomonas ata' a'epa? ¹⁷Ipe' owa' ata' pegawa! Amamaga ande'ami mawis malogofa mowala opalef, amama motanima mawisi ande' mafe' mowala dowah. ¹⁸Ea' amamaga mape ipe' nomon, ukup awami maim mataga ande', amama atom manda'epa awepa. ¹⁹Amamaga awami mape ukup nomon mawisi ande' amama. Ukup awami, waf soha enis seaga', waf sanda' so'a waulanai, ea' sonda' anona waf aonai si'i waf anama so'a waulanai, wal, baso'am, findiwa. ²⁰Waf anama atona nawisi ande' nanda' epes awes. Ea' epes owa' seasa'opa lagof andeande'ma sea' gwa'aimi si'i amam Farisi ma'iam, amama ina manda'as awes, owa'.”

Nemata'w Kenani'wi kombale'efa Jisas endilisi

(Mk 7:24-30)

²¹Ea' Jisas nakwaha wambel anama nafe' gani wa'ol etap felefele'ma wambel anama biefina Tair Saidon. ²²Ea' ano'w nemata'w Kenani'wi kwafi'i kofalana na'ama kwa'i, “O, Dembinai, ine' akunamana Deviti, ine' niti ae' uwahipiwi. Ambal aonai nahambombaga nogame ae'akwi endilisi ea' kofa' nimanimi endilisi.”

²³Ea' Jisas ina nagwama'wa anom basef akwa'w, owa'. Ea' amam alupumi ananiami mafi'mai anan ma'ipana mehip ma'i, “Nemata'w akwama kwanda'am falafala kwagi'mafa. Ine' sapa'akw kotanima kofa'o!”

²⁴Ea' Jisas nagwa basef na'ipa'w na'i, “God nasapa' ae' afi'i ma epes sape si'i sipsip higilalapi isima esis Israeli etis.”

²⁵Ea' akwa'w kwafi'i kwindiwa nembawa kotawa felefele'ma anan kwa'i, “Dembinai, ine' nigiangama ae'.”

²⁶Ea' nagwama'wa basef na'i, “Ape' ina mofa' gwa'aimi awasi ape'isi makwahom mafe'ma nombagw,^s owa'.”

²⁷Ea' akwa'w kwagwamana basef anan kwa'i, “Dembinai, ine' na'i endilisi. Ea' nombagw mafe' owina tebol matatama gwa'aimi mowa etapi magwa'am.”

²⁸^hAkwa'w kwa'iam na'ama, Jisas nagwama'wa basef na'i, “O, nemata'w, bale'ef ine'inai lu'unai. Dei' amamaga ina okom na'iami atuwasi meatagamena si'i ine' na'iam.”

f 15:24 Mt 10:6 g 15:26 Akwa'w ina Judai'wi. Esis Juda sa'i epes owa' Judaisi sanda' waf aonai sofalas sa'i nombagw. Ea' dei' Jisas na'ipakw basef amama ma nombagw.

h 15:28 Mt 8:10,13

Ea' nogota anama atona nogama'w akwa'ukwi ambo'okw wapoti'.

Jisas nanda' hiesi awes nanda'asi sataga bo'wes

²⁹ Jisas nakwaha wambel anama nafe' felefele'ma walemb batupa'manai Galili. Ea' nondowasa' anona halaf tol nape. ³⁰ Ea' esis amam nematawa hiesi safi'i satagamana sofa'ai esis awes naninani nanda'asi safi'mai anan. Enis bo'wagah awamisi, enis naep mase'asi, bihiguf mondola'asi, enis malogof mase'asi, awes naninani nanda'asi. Esis sofa'as safi'i sambe'as sa'oh felefele'ma bo'wagah Jisasi ea' nanda'as bo'wes. ³¹ Ea' esis gegelalasisa sati epes isima naep mase'asi satologon, malogof mase'as sa'i, bihiguf mondola'asi ea' usi'im, bo'wagah awamisi ea' bo'om safe'. Ea' dei' esis hiesi safela agel God Israeli lu'una.

Jisas nase'asa gwa'aimi epes hiesi 4,000-peleis

(Mk 8:1-10)

³² Ea' Jisas nofalai alupumi ananiami mafi'i na'ipam na'ama na'i, "Ae' ati esis amam nematawa isima uwahipis. Esis sape salome nimeguf wanom gwa'aimi a'as nolomahas endilisi. I'i ae' esapa'as sefe' etin utagw wambel asasima, siti noga atona sowa so'oh sefe' eaf."

³³ Ea' alupumi ananiami ma'ipana na'ama ma'i, "Ae' wafiguma epes a'agoma. Atuwasi afa' ofa'ai bret eti ma weaso' amam nematawa isima hiesi?"

³⁴ Ea' Jisas nahali'am na'i, "Dei' ipe' bret ma'um ma'oh?"

Ea' amam ma'i, "Afa' bret 7-peleim ma'omafa maloma agof sa'umi kwasala'um."

³⁵ Ea' Jisas na'ipa esis amam nematawa sope etap, ³⁶ nafela bret 7-peleim maloma agof amama nanifela God nawalom naso' alupumi ananiami ma mease'asam esis amam nematawa hiesi. Amam mase'as hi'alas dende'.

³⁷ Ea' sa'am dende' elihis andeande'. Ea' alupumi ananiami matatama tukwakwaniami ma'ihhi makolasom maolo'wam holalef lu'wami 7-peleim si'im endilisi. ³⁸ Esis amam nematawa sa' gwa'aimi amama, seamba amam atom mataga 4,000-peleim. Ea' esis ina seamba awasi nematawa wapoti', owa'. ³⁹ Jisas nasapa'as safe' ea', anan nalata bot nafe' gani wa'ol walemb batupa'manai lu'unai anona etap lu'unai Magadan.

Esis sa'i siti ikwaf la'ifinai si'i God atona

(Mk 8:11-13; Lu 12:54-56)

16 ¹ Ea' anom Farisi maloma anom Sadyusi mafi'mai Jisas ma'i mogwambana ma anan ata' nonda' anona ikwaf la'ifinai si'i God nape heven ilifi nanda'anai ma ata' motolona. ² Ea' anan nagwamam

anom basef womun etin na'i, "Ipe' pati otaga wambomota felefele'ma owamb ea' pa'i, 'Otaga nasa'of akwahina. Na'ama atuwasi nogota bo'otama owaf nilowata.' ³Ea' kuhimbata pa'i, 'Otaga ilagw ea' alialim. Manda'am na'ama ma atuwasi uf nuluwi asaf nolai.' A'e, ipe' pati ikwaf hianai ilifanai etapanai andeande' ea' dei' ipe' owa' pegawa ikwaf nogota anae' andeande'. ⁴Ipe' epes hiesi amam nematawa dei' pape etap anae' panda' waf aonai pewa' alafugaha God. Dei' pa'i piti anona ikwaf la'ifinai. Ea' ae' owa'etina enda'ana potolona, owa'. Ikwaf anama la'ifinai fowa' God nihi'amba profet Jona atona nambimb ihi'ambepana ipe'."

Jisas na'ipam ea', nakwahom nafe'.

Basef womun etina yis amam Farisi maloma amam Sadyusi

(Mk 8:14-21)

⁵Ea' Jisas nao'wa alupumi ananiami mofa' bot mowala mambo walemb batupa'manai anama mataga fisana, ea' amam ukup mase'ama mofa' anona bret nolomam. ⁶Ea' Jisas na'ipam na'i, "Ipe' pindumafuma andeande' ma yis amama amam Farisi maloma amam Sadyusi!"

⁷Ea' amam mame' anan na'iam na'ama, amam manda'ipama ma'i, "Afa' ukup mase'afa bret na'ih, dei' na'ipafa."

⁸Ea' Jisas nogawa ukup amamumi na'ipam na'i, "Bale'ef ipe'inai ina la'ifina. Dei' maina ipe' panda'ipama pa'i, 'Afa' bret a'afa?" ⁹Ipe' ukup ma'i ma bret anama wanifina biefina esis hiesi 5,000-peleis sa'ana ma tu'wanina na'ih, o owa'? Pakolasom paolo'wam holalef ma'um si'im? Ipe' ata' owa' pegawa? ¹⁰Ipe' owa' ukup mi'i bret amama 7-peleim nemaf anama hiesi 4,000-peleis sagwa'anai tu'wanina na'ih pakolasom paolo'wam holalef ma'um si'im?

¹¹Dei' maina ipe' owa' peagawa? Ae' ina a'ipipa bret endilisinai, owa'. Ae' a'i ipe' pindumafuma yis amama amam Farisi maloma amam Sadyusi."

¹²Ea' dei' amam mogawa, anan ina na'ipama yis amama endilisimi, owa'. Anan na'i amam mundumafuma basef amam Farisi maloma amam Sadyusi mawalipasami.

Pita nawalapa basef na'i Jisas anan Kraisi God nandandepana nasapa'ana nafi'i

(Mk 8:27-30; Lu 9:18-21)

¹³Ea' Jisas nafe' naloma alupumi ananiami mataga felefele'ma wambel hiagoma Sisaria Filipai. Ea' nahali'am na'i, "Amam nematawa esis sogawa ae' ataga epen endilisiwei sogawa maina agel sanda'meana?"

¹⁴Ea' ma'ipana ma'i, "Enis sa'i ine' Jon aman napisias embeli. Enis sa'i ine' Elaija. Ea' enis sa'i ine' Jeremaia o enina profet."

¹⁵Ea' nahali'am na'i, "Ipe' pa'i ae' emi?"

¹⁶Ea' Saimon Pita nagwamana basef na'i, "Ine' Kraisi, aman anama God nandandepena nasapa'ena nafi'i. Ine' nogalomana God ambal namunai napeinai."

¹⁷*k*Ea' Jisas nagwamana basef Pita na'i, "Saimon, ine' nogalomana Jonai, ine' nendanifel endilisi. Dei' main, ina anona aman etapanai nihi'ambena basef amae' na'iam, owa'. Ahalome atona nape heveni nihi'ambenam na'iam. ¹⁸*l*Dei' a'ipina endilisi, agel ine'inai Pita, agel anama na'i owap.^m Nambimb ae' enda' maol la'ifinai ma sios ae'ami motoma owap anama ilif. Ama pepel anama ga'inai ina la'ifina nikila'a amam, owa'etin. ¹⁹*n*Ae' nambimb ese'ena ki utainai ine' ma kingdom heveni. Amamaga ine' nehapilam nape na'ae etapi, amama anona nemaf God nohapilam gani heven ilif wapoti'. Ea' maim amamaga ine' nekwhom na'ae etapi, amama anona nemaf God nokwhom gani heven ilif wapoti'."

²⁰*o*Ea' Jisas na'ipam basef la'ifimi na'i amam ina mi'ipasa basef amama enis epes mi'i Anan Krais, God nandandepana nasapa'ana nafi'i, owa'. Mombaho'ana.

Jisas na'i anan nambimb noga' notanima nohafel wapoti'

(Mk 8:31–9:1; Lu 9:22–27)

²¹Nogota anama Jisas nali' nahafel nihi'amba alupumi ananimi ma nambimb nofe' niwis Jerusalem ama agufumi Judai mease'ana nimanimi lu'wami. Amam dambami mawalipasa mi'uli Godi moloma amam pris dambami nambimb mose'ana nimanimi lu'wami anona mohana noga'. Ama nimeguf biam hi'ilama anona neafe'ma wanomi ea' notanima nohafel wapoti'.

²²Ea' Pita nofa' Jisas nelefata nasa gamba ea' na'ipana na'i, "Dembinai, owa'etin. Ae' andaiwa' endilisi ma amamaga amama mogatagama ine', owa', hapaimi!"

²³Ea' Jisas nandamboma na'ipa Pita na'i, "Ine' si'i Satan. Dei' main, ine' owa' okom ni'i okom Godi, owa'. Okom na'i nomonas epes sape etapi etis. Ine' nehopa eaf ae'anai, Si'amae nefe' alafuga ae'anai."

²⁴*p*Dei' Jisas na'ipa alupumi ananimi na'i, "Ae' efa' nimanimi anda' maol Godi sehe ega' lawag usi'inai tu'wanainai. I'i emi egafis si'i sila ae', esis senda'am na'ama etin si'i ae' ma sieili. Ea' sehagofa ukup asasimi ma maina maol esis sa'i senda'anai. ²⁵*q*Emi egafis ukup mopoma ambagof asasimi atom si'i sihapilam tatala'im, anona nemaf ambagof asasimi higililam. Ea' emi egafis ukup mopoma ae' ma sesambala ambagof asasimi etap anae', anona nemaf God nofa'as sotanemani sopan andeande' la'ela'ef. ²⁶I'i emi egafis seanda' maol naninani ma sofa' gwa'aimi wiga amamaga hiami etapami atom hegilialami, esis wapoti'

k 16:17 Mt 17:5; Ga 1:15-16 **l 16:18** Jo 1:42; Ef 2:20 **m 16:18** Agel anama Pita diga Griki sa'i owap. Niti Jon 1:42. **n 16:19** Mt 18:18; Jo 20:23 **o 16:20** Mt 17:9; Mk 9:9 **p 16:24** Mt 10:38; Lu 14:27 **q 16:25** Mt 10:39; Lu 17:33; Jo 12:25

hegililas solomam. Dei' amamaga amama anona nemaf migiambamas mi'imama? Owa'etin. Amama nambimb sefa' amamaga maima seatal ambagof asasimi ma setanima seawambilai ambagof asasimi wapoti'? Owa'etin. ²⁷Ae' ataga epen endilisiwei, anona nemaf ae' ifi'i elomai amamaga bu'wami pepel nafifili noloma amam ensel ae'ami. Ama nemaf anama, ae' egwamasa amamaga hiami esis amam nematawa hiesi mondahama waf esis sanda'anai hianai. ²⁸Ae' a'lipipa endilisi! Enis epes dei' saitu na'ae, esis ina nambimb sog'a' ulal, ata' owa', siti ae' ataga epen endilisiwei eape si'i dembiwai king iefi'i.”

Alop Jisasi nataga wanafigeina

(Mk 9:2-13; Lu 9:28-36)

17 ¹Nimeguf wanom mafe'ma hi'alam, Jisas nao'wa Pita naloma Jems naloma owalomana Jon nao'wam mondowasa' anona halaf launai. Nao'wa amam atom mape. ²Ea' mati alop ananinai wanifigeina endilisi. Ea' naep ananiami wanefigeim endilisi si'i owaf nowala naso' ea' luwaguf ananiami mataga afitim si'i lamifah mafifil. ³Ea' amam wanom mape dei' atef mati amam biam fowa'imi Moses naloma Elaija mataga maitu ma'i maloma Jisas.

⁴Amam mati amam wanom, Pita na'ipa Jisas na'i, “Dembinai, afa' wape na'ae andeande'. Ine' ni'i awi, afa' ola' aolah wanom na'ae, anona ine'inai anona Mosesi, anona Elaijai.”

⁵Anan ata' na'i etin, anom elagw afitimi mafifil endilisi mafi'i mili'akwa amam. Ea' anona malogel na'i natagai elagw amama na'i basef na'i, “Anan nogalome ae'anai, ae' okom nainailana endilisi ea' ae' okom nohafel naila waf ananinai. Ipe' peme' basef ananiami.”

⁶Amam alupumi ananiami mame' basef amama, umbamaham endilisi ea' mande' nembawa motawa mande' amagah etap. ⁷Ea' Jisas nafi'i felefele'ma amam nasa lagela amam na'ipam na'i, “Ipe' hafel. Ipe' ina umbamehepa, owa'.”

⁸Ea' amam masa'ma naep matologon ea', ina ata' mati enin epen, owa'. Mati Jisas atona naitu nalomam.

⁹Ea' amam ata' makwaha halaf makini' etin, ea' Jisas na'ipam mehip na'i, “Ipe' ina pewalapa amamaga amama dei' patulumu, pi'ipa enin epen, owa'. Pefe' dahama dahama nemaf anama ae' ataga epen endilisiwei ma sehe ega' etanima ehafel hi'agif wapoti', pi'ipas.”

¹⁰Ea' alupumi ananiami mahali'ana ma'i, “Dei' maina amam mawalipasa mi'uli Godi ma'i Elaija fowa'inai ata' nili' nifi'i?”

¹¹Ea' Jisas nagwa basef na'i, “A'e endilisi, Elaija nifi'i nondondomba amamaga hiami motaga bo'om andeande'. ¹²Ea' dei' ae' a'lipipa, anona Elaija nafi'i ea'. Ea' esis amam nematawa ina sogawa anan, owa'. Sa'i anona epen. Esis saila ukup asasimi atom sanda'mana waf aonai endilisi.

Ea' anona nemaf sonda'am na'ama etina sease'e nimanimi ae' ataga epen endilisiwei.”

¹³Jisas na'iam na'ama, ea' alupumi ananiami mogawa anan na'ipama Elaija anan womun etina Jon napisi'as embeli.

Jisas nanda' anona aman sa'unai ambal aonai napainai ambo'ona
(Mk 9:14-29; Lu 9:37-42)

¹⁴Amam mafe' mataga ma esis amaz nematawa hiesi, anona aman nafi'i natagama Jisas nindiwa nembawa notaoma Anan ¹⁵na'ipana na'i, “Dembina, ine' ni'i uwahipina so'uso'win aman ae'anai. Enin ambal aonai nanda'ana name' nimanimi lu'wami endilisi ma alop ananinai. La'ela'ef ambal anama nanda'ana newala nasef nif fandumi nafe' nowala embel la'ela'ef. ¹⁶Ae' ao'wana wafe'ma alupumi ine'imi ea' amaz ina la'ifima monda'ana bo'ona, owa'.”

¹⁷Ea' Jisas nagwamama basef na'ama na'i, “Ipe' amaz nematawa owa' pembale'efa ae'. Ea' opalef ipe'imi owa' mope andeande'. Nimeguf ma'um ata' epe elomepa? Nimeguf ma'um wapoti' ma efa' nimanimi ipe'imi? Ipe' fa'an pifi'mai ae'.”

¹⁸Ea' Jisas nagaola ambal anama aonai ea' nakwaha aman inima so'uso'win ea' dei' etef nataga bo'ona.

¹⁹Alupumi Jisasi atom malomana mape, mahali'ana na'ama ma'i, “Dei' maina afa' owa' la'ififa ma weatofa ambal anama aonai?”

²⁰Ea' na'ipam na'i, “Bale'ef ipe'inai ata' sa'ona, Amama atom dei' ipe' ina la'ififa, ata' owa'. A'e, ae' a'ipipa endilisi, i'i bale'ef ipe'inai so'ona, nendahama si'i nalelef sa'umi mastetimi lawag, nambimb ipe' pi'ipa halaf nani pi'i, ine' degia nefe' newala gani wa'ol, nendegia nefe'. Ipe' pembale'efa ae' la'ififa, na'ama dei' la'ifipei ma penda' maolan hianai naninani. [²¹Owa' anona eaf peatofa ambagof amama awami, owa'etin. Pekwaha gwa'aimi ma penda' beten, ea' amama atom.”]

Jisas dei' na'ipas ea' bifa neaga' ma neahafel wapoti'
(Mk 9:30-32; Lu 9:43-45)

²²Nemaf anama Jisas nao'wa alupumi ananiami mafi'i etin anama etap hiagoma Galili, ea' na'ipam na'i, “Ae' ataga epen endilisiwei, nambimb felefele' anona aman nose'asa ae' efe'ma lagof amaz naumbih ae'ami.

²³Ea' amaz amama mohe ega'. Ama nimeguf biam hi'ilam ea', anona neafe'ma wanomi, etanima ehafel wapoti'.”

Ea' opalef amaz alupumi ananiami nimanim endilisi.

Jisas natala takis ipat lu'unai Godi esis Juda sanda' lotuwanai

²⁴Ea' Jisas naloma alupumi ananiami mataga anona wambel Kaperneam. Ea' amaz mofa' takisa ipat lu'unai Godi mafi'mai Pita mahali'ana ma'i, “Dembina tisa ipe'inai anan natala takisa ipat anama?”

²⁵Ea' Pita na'i "A'e."

Pita notanima nafe' nawis anona ipat nomon, ea' Jisas nali' nahali'ana na'i, "Ine' okom na'imama? Amam king dambami etapami mofa' otamba ma takisa wiga maima emi? Amam mofa'asa epes hiesi esis amam nematawa amamisi etis a'a enis epes anona wambota?"

²⁶Ea' Pita na'i, "Ama enis amam nematawa anona wambota."

Ea' Jisas na'ipana na'i, "Na'ama esis epes hiesi kingi ina satala takis, owa'. Sape etin. ²⁷Ea' afa' undumafuma. Na'ama amam miti afa' owa' onda' takis, amam ukup numbutima afa' mi'i afa' epes aofai. Ea' dei' ine' fo'o la huk walemb batupa'manai anama ma niegiai aol anama nali'i ine' newala malogel aoli niti anona moni atona, moni anama dende' ma takisa afa' biafa. Ea' ine' nefa' moni anama nese'amana amam ama neatala takis isima afa' biafa."

Emi epen nepe dembeni ma kingdom heveni?

(Mk 9:33-37; Lu 9:46-48)

18 ¹Nemaf anama amam alupumi Jisasi mafi'mai anan mahali'ana ma'i, "Emi nikila' enis nataga dembeni endilisi ma kingdom heveni?"

²Ea' Jisas nofalai enin so'uso'win nafi'mai anan nahaponan naitu la'afena amam. ³Ea' na'ipam, "Ae' a'ipipa endilisi. Emi egafis si'i siowis kingdom heveni, ama sase'ana opalef God si'i awasi isima sa'i sase'ana opalef God, isima sanda'am na'ama anona nemaf siowis kingdom heveni. I'i owa', owa'etin. ⁴Emi egafis seape sa'umbili owa' seafela agof asasimi lu'um setaga si'i awani inima, epes isima ea' sikila' enis epes seape dembesi ma kingdom heveni. ⁵Emi egafis sese' opalefa sigiambama enin so'uso'win si'i ini' ma ukup asasimi mopoma ae', esis sase'e opalef ae' wapotil' sagiambame.

Waf aonai nahambombaga bale'ef amam nematawai

(Mk 9:42-48; Lu 17:1-2)

⁶I'i emi egafis seanda' enin epen so'uso'win nembale'efa ae'i nefe' nenda' waf aonai, epes isima sepe na'ama. I'i enis epes sofa' epes isima sepa' owap lu'unai nil bagafowa asasimi sofa'as sefe' sokwahis sowala naoh mami lu'wami, esis sope andeande' kwaukwawie'. I'i epes isima senda' enin so'uso'win nekwaha nembale'efa ae', epes isima anona nemaf sope awes endilisi sikila' sowala naoh afisi. ⁷Ipe' epes etapipei, ae' ati ipe' uwahipipa ma amamaga amama meagwambipei monda'epa penda' waf aonai. Endilisi amamaga amama anona nemaf meatagai, ea' emi egafis sonda'am meatagai, ae' ati esis uwahipis endilisi. Dei' main, anona nemaf sefa' nimanimi.

⁸I'i lagof o bo'wagah ipe'imi monda'epa pewa ma waf aonai, petopa'am pekwahom mefe'. Andeande' ma lagof bo'wagah atom mope ma ambal

nopeipa pepan andeande' la'ela'ef. Ea' sefa'epa sokwahipa pefe' wambel aonai nif fandumi la'ela'efi. Anama ina nambimb pepe andeande', owa'. Pepe aopa endilisi. ⁹Ea' i'i naep ipe'imi monda'epa pewa ma waf aonai, pigiam pekwhom. Atom etin mope ma pefa' ambal namunai napeipa peapan andeande' la'ela'ef hihif. Na'ama naep biam mapomepa mofa'epa mokwahepa pefe' wambel aonai hel nif fandumi mape la'la'efi. Na'ama ina nambimb pepe andeande', owa'. Pepe aopa endilisi.

Basef womun etina enin mafin sipsip higilalanai

¹⁰Ipe' pindumafuma! Na'ama pi'i enin epen atitin sa'wini pi'i inima enin falafini, owa'. Dei' main, amam ensel اساسimi mape heveni mumafi awasi isima andeande'. Ensel amama la'ela'ef mape felefele'ma Ahalome God nape heveni. [¹¹Ae' ataga epen endiliswei, ae' afi'i ma eagolopa epes higilalasi efa'as setanimani.]

¹²Ipe' ukup ma'imama? I'i anona aman numafi anom sipsip 100-peleim ama anona atotona hegililana, aman amama ata' nokwaha sipsip amama 99-peleim mitu mea' otalef anagon dohotagw, anan ata' nefe' nogolopa anona hegilalanai. ¹³I'i nefa'anai, a'ipipa endilisi, atuwasi nondanifamana. Danifel ananinai nikila' nandanifel ma sipsip amama 99-peleim maituwi. ¹⁴Ea' na'ama etin Ahalomepa ipe'inai nape ilif heveni nandaiwa' ma enin epen so'uso'unai higililana, owa'.

Waf anama ipe' pinindinas enis sahin owan sanda' waf aonai

¹⁵I'i sahin owan sonda' waf aonai ma ine', ine' nefe' nitilin ipe' etipa pepe ea' nihi'amban waf aonai ananinai. I'i enin neme'ena, andeande', si'i ine' nofa'ai enin netanimani wapoti'. ¹⁶Ea' i'i enin owa' neme' basef ine'ifi, ni'ipa enis epes bias wapoti' ea' pefe' etin. Ama ipe' bipa o wanipa pefe'ma peame' basef epen inima ma peawaloga basef amama pi'i endilisimi atom. ¹⁷Ama i'i enin nindaiwa'ma neame' basef ipe'ifi, ine' ni'ipa esis Kristen hiesi sondatama etifigin ni'ipasan. Ama enin ni'i nindaiwa'ma neame' basefa esis Kristen hiesi wapoti', ine' nekwahin nepe si'i isima owa' seagawa Godi, o si'i amam amama awami mofa' takisi.

¹⁸Ae' a'ipipa endilisi! Amamaga ipe' pahapilam etap anae', amama anona nemaf God nohapilam mape gani ilif heven wapoti'. Ea' amamaga amama ipe' pekwhom etap anae, amama anona nemaf God nokwahom gani heven ilif wapoti'.

¹⁹Ea' ae' a'iam endilisi ma ipe' wapoti'. I'i ipe' bipa pape etapi ukup mefe' atifigina anom amamaga, pi'i penda' beten pehali' Goda nease'epa amamaga amama, ea' andeande' Ahalome ae'anai napani ilif heveni nambimb nese'epam ipe'. ²⁰Dei' main, i'i epes bias o wenis ukup mapoma agel ae'anai ma sunduwa'anima sope etifigin, ae' ape alomas.”

**Basef womun etina nanda' maoli owa' okom
nease'ana wiaf anona nanda'manai**

²¹Nemaf anama Pita nafi'i nahali'ana na'i, "Dembina, nimeguf ma'uma'um sahin owan ae'asi sonda'me waf aonai ae', ma eakwahamasana? Nimeguf 7-peleim o ma'um?"

²²Ea' Jisas na'ipana na'ama na'i, "Ae' ina a'ipina nimeguf amama atom 7-peleim, owa'. Ae' a'i ine' nekwaha waf aonai esis sanda'minai nimeguf hiami 490-peleim.

²³Dei' main, esis siowis kingdom heveni si'i anona dembinai king na'i nogawa wialef mapoma amam manda' maol ananinai mapoma ma'um. ²⁴Ea' anan nanda'am nogawam andeande'ma nonda' amam meagwamana wiaf, ea' sofa' anona aman safe'ma anan. Ea' aman anama nowaola wiafa moni lu'unai 10 milian kina. ²⁵Ea' anan moni a'ana ma neagwan dende'ma niembi wiaf anama anan nowaolamasana. Ea' dembinai king na'ipas na'i esis setala aman anama noloma waulu'mana awasi ananisi ma sonda' maol akupi ea' setala amamaga asasimi wapoti' sofa' moni ma seagwa wiaf anama.

²⁶Ea' aman anama nowafa notawa etapa naep king anama dembinai na'ipana na'ama na'i, 'Ine' niti ae' uwahipiwi nepe nehafa ae'. Anona nemaf ae' egwamena wiaf anama hi'ilana ma ine!' ²⁷Ea' dembinai anama nati owahipina nakwahomana wiaf ananinai nafe' wafifina.

²⁸Ea' aman anama nawisi ande' nati anona amam atom manda' maol etini, anan nowaola wiafa moni kwawie'in si'i 10 kina. Ea' nombalo' aman anama nowa'ana sisihina bini'w anani'wi na'ipana na'i, 'Ine' negwame wiaf ine'inai hi'ilana!'

²⁹Ea' aman anama nowafa notawa etap ea' na'ipana basef la'ifimi na'i 'Ine' niti ae' owahipiwi ea' nepe nehafa ae'! Nambimb egwamena wiaf ine'inai hi'ilana.'

³⁰Ea' anan nandaiwa'. Ea' nofa'ana nafe' nanda'ana nanda' kalabus, ama nepe neagwa wiaf anama. ³¹Amam mandao'oma manda' maoli mati amama, opalef amamumi nimanim endilisi mafe' mawalapa amama ma dembinai amamunai.

³²Ea' dembinai nofalai aman anama nanda' maoli ea' na'ipana na'i, Ine' aman nanda' maol aonai. Do'ok ine' naloma ae' nalef, ea' akwaha wiaf anama lu'unai ine'inai hi'alana. ³³Ae' ati ine' owahipina, ea' dei' maina ine' owa' nie'i owahipina alupunai ine'inai panda' maol etini? ³⁴Ea' dembinai okom numbutina nase'amana amam amama mumafi kalabusi ma mease'ana nimanimi lu'wami nope nope neagwa wiaf ananinai hi'alana.

³⁵I'i ukup ipe' hipei owa' peakwaha waf aonai endilisima sahin owan sanda'mipanai, anona nemaf Ahalome ae'anai nape ilif heveni wapoti' nonda'mepam ipe' na'ama etin si'i dembinai nanda'ama aman anama."

Jisas na'i waf anama satopa' dase'amainai
(Mk 10:1-12; Lu 16:18)

- 19** ¹Jisas na'i basef amama mafe' ea', nakwaha etap anama hiagoma Galili nafe' anona etap hiagoma Judia gani wa'ol walemb Jordan gani fisana.
- ²Ea' amam nematawa hiesi sailana safe' ea' nanda' epes hiesi ambo'wes.
- ³Ea' anom dambami Farisi mafi'mai anan mahali'ana anom basef magwambana ma'i, "Mi'uli ape'inai andeande'ma anona aman nondaiwa'ma nemata'w anani'wi nokwaho'wa okom ananinai atona o owa'?"
- ⁴Ea' anan nagwamama basef amam na'i, "Ipe' patalifa basef amama Godi pagawam ea'. Basef amama ma'iam na'ama ma'i, 'Fowa' gani dambadamba God nanda' amamaga hiama nanda' epes sataga amam nematawa.'
- ⁵Ea' God na'i, 'Na'ama esis bias ina ata' sope si'i sape deindei, owa'. Aman nokwaha mamasana ananisi nefe' noloma waulu'mana anani'wi, esis bias sope alop atotona.' ⁶Ea' esis bias sondase'ama sotaga si'i alop etifina. Esis ina ata' sape biasa sape deindei, owa'. Ea' esis God nakolasis sape la'ifis, isima God na'i enin epen ina nehape'as, owa'."
- ⁷Ea' Farisi amama ma'ipana wapoti' ma'i, "Moses na'ipapa mi'uli anama na'i, aman nonda' anom basef mil okwatip nose'akwana nokwaho'w kofe'."
- ⁸Ea' Jisas na'ipa amam na'i, "Ipe' patopa' basefi. Dei' Moses na'i a'e ma eaf anama dei' pailana pagalo'ma wauhiamepa patopa' waf dase'amainai. Fowa' gani dambadamba ina anom basef mape na'ama, owa'. ⁹Ae' a'ipipa a'i, I'i ano'w nemata'w anona amani owa' konda' waf aonai so'a waulanai, ma anan nogolo'makw noso' ano'w wapoti', anan nanda' waf aonai so'a waola nemata'w akwama nali' nase'akwi."
- ¹⁰Ea' amam alupumi ananiami ma'ipana ma'i, "I'i waf anama endilisinai ma owa' neape la'ela'ef noloma akwa'w, dase'ama hapainai. Ea' andeande'ma nemata'w a'ana nope etin."
- ¹¹Ea' anan na'ipam na'ama na'i, "Ina nambimb amam nematawa hiesi la'ifis sofa' basef amama sombale'am, owa'. Epes isima God nase'as pepel ea', esis etis sofa'am.
- ¹²Dei' main, amam na'amaimi mape amam owa' la'ifima mease' nematawai. Ea' anom mamalawa amamuwai olam ea' la'ela'ef mape na'ama. Ea' anom, amam matopa'am alop amamunai. Ea' amam ina la'ifima measo' nematawa, owa'. Ea' anom, okokoma miegiambama epes hiesi siowis kingdom heveni. Na'ama mandaiwa'ma mease' nematawa. Emi aman la'ifina niela basef amama, anan nilam andeande'."

Jisas nase'asa basef bu'wami esis awasi
(Mk 10:13-16; Lu 18:15-17)

- ¹³Nemaf anama esis sao'wamanai enis awasi sofa'as safi'mai anan, sa'i anan nowamona lagof ananiami ma awasi isima ni'ipasa basef bu'wami

ma God nefalo'mas. Ea' alupumi ananiami ma'ipa esis owa' sofa'as safi'mai anan.

¹⁴Ea' Jisas na'i, "Ipe' kwahowas awasi isima sifi'mai ae'. Ipe' ina pindaiwa'mas. Fa'asi sifi'mai Ae'. Dei' main, esis amam nematawa siowis kingdom heveni, esis same' basef Godi sailam si'i awasi isima."

¹⁵Ea' nawamona lagof ananiami balagah اساسimi, nakwaha esis nafe'.

Aman sa'unai amamaga hiamunai

(Mk 10:17-31; Lu 18:18-30)

¹⁶Ea' anona aman nafi'i na'ipa Jisas na'i, "Dembina'i Tisa, ae' nambimb enda' maina waf bu'unai ma efa' ambal namunai epe andeande' la'ela'ef?"

¹⁷Ea' Jisas na'ipana na'i, "Dei' maina ine' nahali' ae' ma amamaga amama? Anona aman atotona nape ilifi Anan bu'unai. I'i ine' ni'i nefa' ambal namunai, andeande'ma nila basefa mi'uli fowa' God naso' Mosasanai hianai."

¹⁸Ea' aman anama nahali' Jisas na'i, "Maina mi'uli?"

Ea' Jisas nagwamana basef na'ipana na'i, "Ina nenda' waf aonai so'a waulanai, neha enis epes sega' nenda' wal, owa'. Ina neambaso'ma enis epes, ¹⁹ine' nepe owina mamasena ine'isi neme' basef اساسimi nilam ea' nimafias andeande'. Ine' okom ninila enis sape felefele'ma ine'i, si'i ine' okom nainaila ine' etina ma nimafi ine'."

²⁰Ea' aman anama ata' sa'unai awaminai na'ipa Jisas na'i, "Mi'uli anama hianai ae' embale'efana ailana afi'i ea'. Dei' maina waf ata' nape?"

²¹Ea' Jisas na'ipana na'i, "I'i ine' ni'i neataga bu'winai endilisi, ine' fo'o nese'asa amamaga ine'imi ma enis epes sotalinama nefa' moni anama nenda'ana nese isima kwahusi. Nenda'am na'ama ma anona nemaf nefa' amamaga bu'wami gani ilif heven. Ea' ine' nifi' nila ae'."

²²Ea' aman anama sa'unai name' basef amama, okom ananinai nimanina ea' nandamboma megah atogah nafe'. Dei' main, anan amamaga hiamunai.

²³Ea' Jisas na'ipa alupumi ananiami na'ama na'i, "Ae' a'ipipa endilisi, epes isima wiga moni hianaisi, sanda'am ahifim endilisi ma sefe' siowis kingdom heveni. Atona etin sefe' siowis. ²⁴Ae' a'i i'ipipa wapoti', anona mafin lu'unai kamel nuwis nil nagala sagundisa luwagufanai, anama wila ma niowis. Ea' amam nematawa amamaga hiamisi sefe' siowis kingdom Godi, sonda'am ahifim endilisi ma sefe' siowis. Eaf anama ahifina endilisi nikila' maol kamel nuwis nil nagala."

²⁵Ea' alupumi ananiami mame' basef amama, amam gegelalasom kwapete'am endilisi. Ea' ma'i, "I'i na'ama, anona nemaf God nefa' emi egafis sotaniami seape andeande' la'ela'ef? Owa'etin."

²⁶Ea' Jisas naniga nati amam na'ipam na'i, "Amamaga epes owa' la'ifisa seanda'ami, amama God atona la'ifinai ma nonda'am. Anan la'ifinai nonda' amamaga hiami."

²⁷Ea' Pita nagwamana basef na'ipana na'i, "Neme', afa' ea' wakwaha amamaga afa'imi hiami, ea' dei' wafi'i wambale'efa basef ine'imi wailina. Afa' anona nemaf ofa' maim amamaga?"

²⁸Ea' Jisas na'ipam na'i, "Ae' a'ipipa endilisi. Owagama nemaf anama neataga ma amamaga hiami meataga dambaim wapoti', nemaf anama ae' ataga epen endilisiwei, efa' pepel howalagon atoma balata king ae'anai. Nemaf anama ipe' amam ae'ipei pail ae'i ipe' 12-peleipa petoma siaifah bu'wami amam dambami kingi 12-peleim, ea' pewaloga wambotagw 12-peleim amam nematawa ape'isi Isrel. ²⁹Ea' emi egafis ukup asasimi mopoma ae' sokwaha ifagw moloma sahin owan ahapas mamasas batawisas moloma aof amamaga maim asasimi, anona nemaf sofa' amamaga hiami endilisi mikila' asasimi fowa'imi. Ea' anona nemaf sofa' ambagof namumi sopan andeande' la'ela'ef hihif. ³⁰Ea' epes hiesi dei' sataga sali'i agof lu'womisi, anona nemaf owagama agof a'as sotaga sigi'. Ea' epes isima sataga sagi' owagama sofa' agof lu'wami sotaga sili'."

Basef womun etina amam manda' maola aof sawa mandelef wainanai

20 ¹"A'e, epes siowis kingdom heveni si'i anona aman nafamunagoma anona etap lu'wagoma. Ea' lala kuhimbata atona anan nafe'ma nufa'i anom amam monda' maol aof anama ananinai nawa su'utip mandelef wain napoma. ²Anan nafe' na'i naloma anom manda' maoli ea' nalomam ukup etifima otamba atuwasi meafa'ami, mofa' wan kina atona etina nemaf anama. Ea' nasapa'am mafe' manda' maol aof ananinai.

³Ea' anan nape ma aon nandegiai nape si'i 9 klok, anan nafe' ea' nati anom amam ata' tol maitu etin anama mondowa'anima mapoma. ⁴Ea' na'ipam na'i, 'Ipe' wapoti' fo'o penda' maol aof ae'anai ma ease'epa otamba mondendaepa mondahama waf bu'unai.' ⁵Ea' amam mafe'.

Ea' aon nahagasom 12 klok anan nafe' wapoti' ea' nanda'am na'ama etin si'i do'ok nanda'am.

Ama aon nasa 3 klok, nafe' nanda'am wapoti' si'i do'ok nanda'am.

⁶Ea' wambomota 5 klok, nafe' nati anom ata' maitu etin. Ea' na'ipam na'i, 'Dei' maina ipe' ata' tol paitu etin na'ae nemaf anae' laona?"

⁷Ea' mal'ipana ma'i, 'Ina anona aman nase'afa maol afa', owa!'

Ea' anan na'ipam na'i, 'Ipe' wapoti' fo'o penda' maol aof ae'anai.'

⁸Ea' wambomota felefele'ma owamb aman anama nafomona aofi nafili' na'ipa aman numafi amam manda' maoli na'i, 'Ine' fala manda' maoli amama hiami ea' nese'ama moni amam. Ine' nili' nese amam amama magi' matagai, nese'aman nefe' nefe' netagama amam amama mali' mataga manda' maoli.'

⁹Ea' amam amama mataga manda' maol wambomota 5 kloki, mataga mofa' wan kina atona etin. ¹⁰Ea' amam amama mali' mohafel kuhimbata

manda' maoli, mafi'i ukup mandanda' ma'i atuwasi amam mofa' moni lu'unai nikila' anom. Owa'etin. Amam wapoti' mofa' wan kina na'ama etin. ¹¹Ea' manda' megah mahana nafomona aofi.

¹²Ea' ma'iam na'ama ma'i, 'Amam amama magi' matagai, amam mafi'i manda' maol nogota bandana si'i awa atitin, ea' ine' nase'ama moni anama na'ama etin si'i afa' ofa'anai. Ea' afa' wali' wanda' maol lu'unai endilisi ma nemaf launai, ea' owaf nahafa.'

¹³Ea' anan nagwamana basef anona aman amamunai na'ipana na'ama na'i, 'Alupinai, ae' ina anda'ena awena, owa'. Afa' biafa wali' wa'iam ea' nomonas atifima pefa' wan kina etin. ¹⁴Ine' fa'a moni ine'inai ea' fo'o. Otamba ae' ase'enama ine'i, ea' ikwaf anama atona ae' ese'anama aman anama nagi' nafi'i nanda' maoli, pefa'am dende' etin. ¹⁵Ae' anda' maol si'i okom ae'anai na'iana moni ae'anai. Na'ama andeande'. Ae' anda' waf bu'unai ma imafi amam magi' mafi'i wambomota. Na'ama dei' ine' kowalena ma otamba amamumi ma main?'

¹⁶Anona nemaf na'ama etin, epes isima dei' sataga sagi'i agof a'asi sotaga agufisi sope sili', ea' epes isima sataga sali' agufisi, anona nemaf agof a'as sotaga sigi'."

Jisas dei' na'iam wapoti' wenifa noga' notanima nehafel wapoti'
(*Mk 10:32-34; Lu 18:31-33*)

¹⁷Jisas na'i nondowasa' Jerusalem, anan nao'wa alupumi ananiami 12-peleim atom mafe'. Amam ata' mafe' etin eaf ea' na'ipam na'i, ¹⁸"Peme', dei' afa' ondowasa' Jerusalem. Ae' ataga epen endilisiwei nambimb anona aman nowalapa ae' ma amam pris dambami moloma amam dambami mawalipasa mi'uli Godi, ea' monda' kotimi ea' mi'i basef mondame'mam ma mohe eaga'. ¹⁹Ea' monda'e efe'ma esis sololama Godi ma sonda' findiwae ma basef awami sopagahowe sehe egaga' lawag usi'inai tu'wanainai. Ama nimeguf biam hi'ilam anona nefe'ma wanomi, God nefe'le ma hi'agif etanima ehafel wapoti'."

Jems naloma owalomana Jon ma'i motaga mope dambami
(*Mk 10:35-45*)

²⁰Nemaf anama Sebedi waulu'mana mama'wana Jemsi Jon kwao'wai batawisa'w akwa'umi biam safi'mai Jisas. Ea' kwindiwa nembawa kotawa etap kwa'ipana anom basef.

²¹Ea' Jisas nahali'akw na'i, "Ine' na'i ae' enda'mena main?'"

Ea' kwa'ipana kwa'i, "Ine' ni'i anona nemaf netaga dembinai, nemaf anama ae' a'i batawisi amama ae'ami biam mope dembem felefele'ma ine', anona nil wa'ol egagili, ea' anona nil wa'ol da'isinaima."

²²Akwa'w kwa'iam na'ama, Jisas nagwama'w na'ipa amam na'i, "Ipe' ina pegawa andeande'ma amamaga ipe' pahali'imami, owa'! Ipe' bipa la'ifipama pegwa' embela kap anama dei' ae' egwa' embelanai, o owa'?"

Ea' magwamana ma'lipana ma'i, "Afa' wila la'ififa."

²³Ea' Jisas na'lipam na'i, "Endilisi, ipe' bipa nambimb pegwa' embela kap anama ae' egwa' embelanai. Ea' pepe lagel da'isinai o egagili ae'ami, amama ina maol ae'anai, owa'. Ahalome atona ni'i esis isima nandandepas ea'i, esis etis sope lagof da'isinai o egagili ae'ami."

²⁴Ea' alupumi Jisasi tu'wanim 10-peleim mame' amam biam ma'iam na'ama, manda' megah mahama amam sahalomana owalomana. ²⁵Ea' Jisas nofala alupumi Ananimi 12-peleim mafi'mai anan, ea' na'lipam na'i, "Ipe' pegawa, anom king mape dambami ma isima sololama Godi, amam mape ilifa esis endilisi manda'as kwapete'as. Ea' amam dambami mape la'ifim endilisi ma manda' esis amam nematawa saila malogof amamumi. ²⁶Ea' waf anama ina nepoma ipe', hapainai. Emi aman nope dembinai ma ipe', anan ata' nili' nope si'i nanda' maol etina ipe' hipei. ²⁷Ea' emi aman ni'i notaga dembeni ma ipe', anan ata' nopan si'i agel a'anai nanda' maol etin nape owina hiesi. ²⁸Ae' ataga epen endilisiwei, ae' wapoti' na'ama etin. Ina afi'i ma esis sonda'me maola siegiambame, owa'. Ae' afi'i enda' maola igiambama ipe' hipei. Afi'i ma sehe ega' etala ipe' peloma epes hiesi etagahipama waf aonai ipe' panda'anai."

Jisas nanda' amam biam naep mase'ami bo'om mati andeande'
(Mk 10:46-52; Lu 18:35-43)

²⁹Ea' Jisas naloma alupumi ananimi makwaha wambel anama Jeriko ma'i mefe', amam nematawa hiesi sailana safe'. ³⁰Ea' amam biam naep mase'ami tol mape felefele'ma eaf. Ea' mame' basef sa'i Jisas nafi'i ea' mofalana mehip ma'i, "Dembinai, ine' akunamana Deviti, niti afa' uwahipifa!"

³¹Ea' esis amam nematawa hiesi sinifalom sa'i mosopama malogof. Owa'etin. Amam mofalana mehip endilisi ma'i, "Dembinai ine' akunamana Deviti, niti afa' uwahipifa!"

³²Ea' Jisas naitu nofala amam biam na'i, "Ipe' bipa pa'i ae' enda'mepa main?"

³³Ea' amam ma'lipana ma'i, "Dembinai, afa' wa'i ine' newalamafa naep afalimi ma witi andeande'."

³⁴Ea' Jisas nati amam owahipim nasa lagof ananimi naep amamumi, ea' dei' etef amam biam mati andeande' wapoti', ea' magi'ma Jisas mafe'.

Jisas nafe' nawis Jerusalem si'i anona king dembinai
(Mk 11:1-11; Lu 19:28-40; Jo 12:12-19)

21 ¹Ea' amam mafe' mataga felefele'ma Jerusalem, mataga Betfage felefele'ma halaf Oliv. Ea' Jisas nasapa' alupumi ananimi biam

r 20:25 Lu 22:25-26 s 20:26 Mt 23:11; Mk 9:35; Lu 9:48 t 20:28 Lu 22:27; Fl 2:7; 1 Ti 2:6 u 20:30 Mt 9:27, 15:22 v 20:30 Niti futnot Matyu 12:23.

na'ipam na'i, ²“Ipe' bipa pefe' piwis wambel nanima nape gani wa'ili felefele'ma na'ae. Ea' piti anona donki sa'unai esis sepama nail naloma noganai ananinai maitu. Ipe' petagahom ea' pefa'am pifi'mai ae'. ³I'i enin epen ni'i nihali'ipa ma anom basef, pi'ipan pi'i, 'Dembina' afa'inai na'ipafa na'i nonda' maola anan ama atuwasi nosapa'am mutanimipei mehip.’ ”

⁴Amamaga amama amam mofa'i donki mataga dende' si'i basef amama fowa' gani anona profet na'iami. Anan na'i,

⁵“Ipe' pi'ipa epes sape Saioni pi'i, 'Ipe' piti, dei' king dembinai ipe'inai anona nemaf nifi'mai ipe'. Anan nanda' waf sa'umbilifi, ea' notoma donki noganai nofa'ana nifi'i.’ ”

⁶Ea' alupumi Jisasi biam mafe' ea' manda'am si'i do'ok na'ipamam. ⁷Amam mofa' donki anama naloma noganai mafi'mai Jisas, mawamona sagwegw amamumi matoma ilifa donki amama biam. Ea' Jisas nandegia natoma donki anama.

⁸Ea' amam nematawa hiesi sambe'amonam sagwegw eaf, safela agel ananinai lu'una. Enis satopa' lawah agof apulima motawa felefele'i sase'wiam eaf sofalo'mana. ⁹Ea' esis amam nematawa hiesi sali' sagi' sanda' la kolo' na'ama sa'i,

“Hosana! Ine' akunamana Deviti! Ape' mandanifel endilisi ma ine'.

Ape' ma'i God nofalo'ma ine' nafi'i agel ananinai nese'ena pepel ma neanda' maol ananinai. Ape' mofela agel dembinai God nape ilifi.”

¹⁰Nemaf anama Jisas nafe' nawis wambel Jerusalem, ea' amam nematawa hiesi sohafel gegelalasis kwapete' ea' soga sa'i mehip sandahali'ma sa'i, “Aman anama anan emi egalina?”

¹¹Ea' esis amam nematawa hiesi safe' salomanai sa'i, “Aman anama anona profet Jisas, aman nape wambel Nasaret nape etap hiagoma Galili.”

Jisas nagalo'ma epes satala amamaga ipat lu'unai Godi nomon
(*Mk 11:15-19; Lu 19:45-48; Jo 2:13-22*)

¹²Ea' Jisas nawis ipat lu'unai Godi nagalo'ma esis hiesi sanda' bisnis saloma isima satalom ipat anama nomon. Anom amam mati otamba enis epesi ea' mindisila'mam. Ea' Jisas namboma tebol amamumi nakowasom. Enis sanda' bisnisa setala amiguf mai'unamb. Ea' namboma siaifah asasimi nakowasom wapoti'. ¹³Ea' na'ipas na'i, “Basef mape Baibeli God na'i,

‘Ipat ae'anai nondapoma epes hiesi sifi'i sopaina sonda' beten sohali' Ae. Ea' ipe' panda'ana nataga si'i ipat sanda' walanai.’ ”

¹⁴Jisas ata' napani ipat anama lu'unai nomon, sofa'manai epes isima naep mase'asi bo'wagah maim mondala'asi safi'manai, ea' nanda'as sataga bo'wes. ¹⁵Ea' amam pris dembami maloma anom mawalipasa

mi'uli Godi mati anan nanda' maol la'ifinai bu'unai, ea' mame' esis awasi sandanifela anan gani nomon ipat lu'unai Godi sa'i, "Ape' mafela agel akunamana Deviti!"

Ea' amam dei' ukup aom kwapete' ma anan.

¹⁶Ea' mahali'ana ma'i, "Ine' negawa basef ofagema awasi isima sa'iami?"

Ea' Jisas na'ipam na'i, "A'e, ae' egawam."

Ea' na'ipam na'i, "Ipe' pitalifam basef amama mail Baibeli pegawam o owa'.? Basef amama fowa'imi ma'i na'ama ma'i, God,

'Ine' owagama niwalipa awasi sa'wisi soloma isima ata' agunifisi sa' nomambeh atumi, ea' sofela agel ine'inai.' "

¹⁷Ea' anan nakwaha amam nawisi ande' nafe' nape anona wambel Betani ea' na'oh owamb anama.

Jisas na'ipa lawag fik alina

(Mk 11:12-14,20-24)

¹⁸Ama wafilu kuhimbata atona Jisas nohafel notanima nafe' nataga felefele' ma taun anama Jerusalem ea' nolomahana. ¹⁹Ea' nati anona lawag fik notawa eaf ea' nafe' natolona. Ea' ina nati anom su'uttip mailana, owa'. Apul atom. Ea' na'ipana na'i, "Ine' ina ata' anom su'uttip milina wapoti'. Owa'." Ea' mehip lawag anama bowana ea' alina hi'alana.

²⁰Ea' amam alupumi ananiami mati lawag anama alina, gegelalatom endilisi. Ea' ma'i, "Dei' maina lawag anama fik bowana ea' alina mehip?"

²¹Ea' Jisas nagwamama basef amam na'ipam na'i, "Ae' a'ipipa endilisi. I'i ipe' pembale'efa ae' endilisi ma ipe' ina ukup biembiefim mupeipa, nambimb ea' penda'am si'i ae' anda'ama lawag anama fik. Ea' ipe' ina penda' amama atom, owa'. I'i ipe' pi'ipa halaf nanima pi'i, 'Ine' degia nefe' newala naoh,' nambimb neme'epa nilam si'i ipe' pa'iam. ²²I'i ipe' pembale'ef endilisi ma penda' beten, amamaga amama ipe' panda' betena pa'i pefa'ami, nambimb ipe' pefa'am."

Esis sahali' Jisas sa'i, "Emi nase'ena pepel ma agel lu'unai ma nenda' opeh ine'imi?"

²³Ea' Jisas notanima nafe' nawis ipat lu'unai Godi nape nawalipasa basef etin, amam pris dambami maloma agufumi Judai mafi'mai anan mahali'ana ma'i, "Emi na'ipina dei' nape dembinai nanda' opeh amama?"

²⁴Ea' Jisas nagwamama basef na'i, "Ae' wapoti' a'i ihali'ipa ma anom basefa ipe' ata' pili' pi'ipa ae' ama atuwasi i'ipipa emi na'ipi ape dembiwei anda' opeh amama. ²⁵Aman anama Jon napisi'as embeli, emi na'ipana ma nanda' opeh amama? God nape heveni na'ipana napisi'as o enin epen etapanai na'ipana?"

Ea' mame' basef amama manda'ipama ma'i, "Afa' wi'i, 'God nape heveni na'ipana,' atuwasi anan ni'ipafa ni'i, 'Dei' maina ipe' owa'

pembale'efana?' ²⁶Ea' afa' wi'i, 'Enin epen etapanai na'ipana,' na'ama esis amam nematawa sohafa. Afa' umbamahafama esis. Dei' main, esis hiesi sa'i Jon anona profet dembinai."

²⁷Ea' magwamana basef ma'i, "Afa' ina ogawana."

Ea' Jisas na'ipam na'i, "Na'ama etin ae' ina i'ipipa ma emi nase'e agel lu'unai anda' opeh amama Ae'ami, owa'."

Basef womun etina nogamana biam anona amani

²⁸"Ipe' ukup mape ma'imama? Anona aman nogamana biam. Anan nafe'ma nogalomana dambena ma na'ipana na'i, 'Nogalome ae'inai, dei' ine' fo'o nenda' opeha aof ae'anai newa mandelef wainim.' ²⁹Ea' nogalomana nagwamana basef na'ipana na'i, 'Ae' andaiwa!' Anom nimeguf mafe'ma ea', namboma okom ea' nafe'. ³⁰Ea' ahalomana nafe' na'ipa anona wapoti' na'ipana na'ama etin si'i do'ok nali' na'i. Ea' nagwamana basef na'i, 'A'e, ahalome.' Ea' anan ina naila basef ananiami nafe', owa'.

³¹Ea' dei' nogamana amama biam ananiami mamanama naila basef ahalomanai?"

"Amam ma'i, 'Nali'i.' "

Ea' Jisas na'ipam na'i, "Ae' a'ipipa endilisi, amam amama mofa' takisi manda' waf aonai maloma nematawa wanda' waf aonai wanda' so'a wauli esis ea' sefe' suwis wambota Godi numafias sili' ma ipe'. ³²Ipe' pegawa aman anama Jon napisias embeli. Anan nali' nafi'mai ipe' ea' nihi'ambepa wafa eaf bu'unai, ea' ipe' owa' peambale'efana. Ea' epes isima sanda' waf aonai anom mofa'asa takisi maloma anowa nematawa wanda' waf aonai so'a waulanai esis sembale'efana. Ipe' pati esis sembale'efana na'ama, ea' ipe' ina pamboma opalef pakwaha waf aonai pambale'efana, owa'.

Basef womun etina amam awami mumafi aof sawa mandelef wainim

(Mk 12:1-12; Lu 20:9-19)

³³Ipe' peme' anom basef womun etin. Anona aman dembinai nanda' anona aof nawa wain nahopana. Aof anama nomon anan nanda' anona tang notawa ma sofa'asa su'utip amama wainim, ea' nala' anona ipat launai notawa sope sumafiagon. Ea' nakwahomama aof anama anom amam ma'i monda' maola aof anama mofa' monianai. Ea' nafe' napani anona wambel laoguma.

³⁴Nogota su'utip mailanai, nasapa' anom manda' maola anani mafe'ma amam manda' maol aof ananinai. Anan na'i amam mose'ana anom su'utip gwa'aimi aof anama.

³⁵Ea' amam amama manda' maol aofi mofa' amam amama nafomona aof anamai naspa'am mafi'i mombalo'am maham, anona mahana afuna

endilisi, anona makwaha otamba mahana, ea' anona mahana etin nafa' nafe'. ³⁶Ea' anan nafomona aofi nasapa' anom amam mafe' wapoti'. Nasapa' amam hiami mikila' amam mali' nasapa'ami. Ea' amam amama manda' maol aofi manda'am na'ama etina amam si'i mali' mafi'i. ³⁷Ea' nagil' nasapa' nogalomana ananinai nafe'ma amam manda' maol aofi. Ea' anan na'iam na'i, 'Nambimb amam mome' malogel nogalome ae'anai.'

³⁸W'Owa'etin. Amam mati nogalomana ananinai nafi'i, manda'ipama etin ma'i, 'Aman anama anona nemaf nofa' amamaga hiami ahalomanai. Afa' ohana afuna ma afa' atofa ofa' aof anama.' ³⁹x'Ea' mombalo'ana mofa'ana mawisi aof ande'ana mahana afuna.

⁴⁰Ea' nambimb aman nafomona aofi nonda' maina amam?"

⁴¹Ea' amam pris dembemi maloma amam agufumi Judai magwamana ma'ipana ma'i, "Namanani anan nonda'mam waf aonai endilisi ma amam amama manda' waf aonai noham moga'. Ea' nose'asa aof anama nefe'ma enis epes sumafiana ama nogota gwa'aimi mieilana esis sose'ana anom gwa'aimi anan."

⁴²y'Ea' Jisas na'ipam na'i, "Ipe' patalifa basef Godi pegawam o owa'? Basef Baibeli ma'i na'ama ma'i,

'Owap^z anama mala' ifagwi magwase'ana dei' nataga nape owap nape nali'i ma nembalo' ipat. Dembinai God nanda' amama mataga, ape' matolom bo'om endililisi.'

⁴³Ea' ae' dei' a'ipipa. God nambimb nelefata basefa waf bu'unai ma ipe' piowis kingdom Ananinai ea' nose'asam enis epes nambimb sombale'efana sonda' waf bu'unai. [⁴⁴a'Ea' emi egafis sanda' sisi'ip sowa owap anama, pepe'etas. Ea' i'i owap anama nowa nosali'as, esis loloweas si'i sopof atona.]"

⁴⁵Ea' amam pris dambami maloma amam Farisi mame' basef amama womun etin Jisas na'iami ma'i anan nondala'wifa amam na'i basef amama. ⁴⁶b'Ea' mape magolopa eaf mombalo'ana ea' amam umbamahama esis amam nematawa. Dei' main, esis hiesi sombale'efana la'ifis sa'i Jisas anona profet.

Basef womun etina esis safi'i sanda' gwa'aimi lu'wami ma bias seandase'amai

22 ¹Ea' Jisas na'ipana basef womun etin wapoti' na'i, ²"Epes siowis kingdom heveni si'i anona king dembinai etapanai. Nogalomana ananinai na'i noso' ano'w nemata'w, ea' king anama nanda' anom gwa'aimi lu'wami. ³Nemaf anama seagwa' gwa'aimi anai notaga, anan nasapa' amam amama manda' maola anani mafe' mofalai epes isima

w 21:38 Mt 27:18 x 21:39 Hi 13:12 y 21:42 Sam 118:22-23; Ap 4:11; Ro 9:33; 1 Pi 2:6-8
z 21:42 Basef amama ma owap ma'i Jisas. a 21:44 Dan 2:44,45 b 21:46 Mt 21:26

fowa' nali' nofalasi seafi'mai gwa'aimi amama. Ea' esis sandaiwa'ma seafi'i.

⁴Ea' anan nasapa' anom wapoti' manda' maola anani motambel mafe', ea' na'ipam na'i, 'Ipe' fo'mago epes isima ae' andandepas sapani ea' pi'ipas na'ama pi'i, "Peme', ae' andandomba gwa'aimi ae'ami ea'. Mafis bulmakau suwafumi maloma mafis amama lu'wami ae'ami, ape' maham. Ea' amamaga hiami mandandombol ma'oh ea'. Ipe' pifi'mai gwa'aimi amama enda'ama nogalome noso' akwa'wi."'

⁵Ea' esis ukup aoma seme'ama seafe' ea' sandamboma safe' deindei ma opeh asasimi. Anona nafe' aof, anona nafe'ma bisnis ananimi. ⁶Ea' amam mapani mombalo' amama manda' maola kingi manda'am kwapete'am maham afum. ⁷Ea' king anama neme' amama okom wandafuna nasapa' soldia ananimi mafe' maha amam maha manda' maola anani afum hi'alam. Ea' makata nif maofa wambel amamunai wapoti'. ⁸Ea' king na'ipa amam manda' maoli na'i, 'Gwa'aimi enda'ama nogalome noso' akwa'w ea' sandandombam ma'oh ea' epes isima ae' efalasi ina seme' basef ae'ami safi'i, owa'. ⁹Na'ama dei' ipe' pefe' eaf anama hianai dawalegefa piti isima epes hiesi pi'ipas pefalas sifi'mai gwa'aimi amama lu'wami dase'amaimi.' ¹⁰Anan na'iam na'ama, amam manda' maoli mafe'agon gani gani eaf dawalegef mowa'aniesi epes isima matilisi hiesi, epes bu'wasi saloma sanda' waf aonai wapoti'. Ea' safi'i sape ipat anama sondase'ama ma si'ina endilisi.

¹¹Esis sape ea' dembinai king nawis nomona nitilis. Ea' nati anona aman atotona ina nala luwaguf salama nemaf anama dase'amainai, owa'. ¹²Ea' king na'ipana na'i, 'Alupinai, dei' maina ine' owa' nela luwaguf amama sandase'amaimi nifi'ni niwisi na'ae?' Ea' anan ina na'i anom basef, owa'.

¹³Ea' king na'ipa amam manda' maoli na'i, 'Ipe' pewa' lagof maloma bo'wagaha ananimi pekwahona nefe' niwis nepe owamb ande'. Owamb anama nambimb anan nowa nelef nalelef tilili talala' kwapete' nepe.' "

¹⁴Ea' Jisas na'ipas na'i, "A'e, God nofala epes hiesi na'ama etin si'i king anama nofalas. Anan nofala hiesi, ea' nandandepa atona etin sifi'i siowis sope solomana."

Amam mahali' Jisas nese'ana takis gavman dembinai Sisar Romunai
(Mk 12:13-17; Lu 20:20-26)

¹⁵Ea' amam dambami Farisi mafe' manda' basef ma'iam mandame'mama membale'a Jisas mowa'ana. Amam ma'i mome' anom basef ananimi owa' andeande'i ma monda'mana basef mowa'ana si'i sowa' bogof. ¹⁶Ea' amam masapa' alupumi amamumi maloma amam Heroti amam mafe'ma Jisas ma'i, "Dembinai Tisa, afa' ogawena ine' aman bu'unai na'i basef endilisimi. Ina umbamehena owa'. Ina ni'lipasa

anom basef isima enis agof lu'wamisi ea' anom basef isima agof a'asi falafisi, owa'. Ine' na'ipasa basef atifim endilisimi atom ma okom Godi amam nematawa hiesi dende' etin hi'alas. ¹⁷Ea' ine' ni'ipafa. Dei' ine' okom nape na'imama? Mi'uli ape'inai na'i andeande'ma ape' mose'ana takis Sisar gavman dembinai esis Romi o owa'?"

¹⁸Ea' Jisas nogawa ea' ma waf baso'omainai amamunai ea' na'i, "Ipe' amam pa'i malogof biamipei, dei' maina ipe' pagwamba ae'? ¹⁹Ipe' pihi'ambe anona moni ma ata' itolona."

Ea' mofa'manai anona moni ma natolona. ²⁰Ea' nahali'am na'i, "Ambal naloma agel anama mailanai emina?"

²¹Ea' ma'i, "Anama Sisari gavman dembinai esis Romi."

Ea' nagwamama basef na'ipam na'i, "Ea' amamaga Sisari, amama pese'anam Sisar. Ea' amamaga Godi, pese'anam God."

²²Amam mame'anama basef amama ea' gegelalasom kwapete'am makwahona mafe'.

Amam mahali' Jisasa epes saga'i sotanima sohafel wapoti'

(Mk 12:18-27; Lu 20:27-40)

²³Nemaf anama atona anom amam Sadyusi mafi'mai Jisas. Amam hiami mombale'ef saga'i ina anona nemaf sotanima sohafel wapoti', owa'. Ea' amam mafi'mai Jisas mahali'ana ²⁴ma'i, "Dembinai Tisa, fowa' gani Moses na'i, 'Ti anona aman noga' ma anan awasi a'ana ea' waulu'mana ata' kope, owalomana ananinai nose'akw nola enis awasi ma soho'ofana.' ²⁵Ea' fowa' amam wambota atotona 7-peleim mape. Nali'i sahalomam nase'akw awani a'akw naga', nakwaho'w kwape. Ea' owalomana nase'akw naga' nakwaho'w kwapani awani a'akw.

²⁶Ea' owalomana nandatu'ulanai wapoti' nanda'am na'ama etin, ea' anona nandatu'ulomi nase'akw manda'am na'ama etin mafe' mafe'ma matagama owagufunai akutainai. ²⁷Amam amama wambota atotona ea' maga' hi'alam. Anom nimeguf mafe'ma ea', akwa'w kwaga' waulu'mam. ²⁸Ea' anona nemaf esis saga'i sohafel wapoti', nemata'w akwama kwaso' amam 7-peleimi emi egafuna nose'akw? Amam 7-peleim mase'akw hi'alam."

²⁹Ea' Jisas nagwamama basef na'i, "Ipe' owa' pegawa basef Baibel na'iami, owa' pegawa pepel Godi. Ea' ipe' dei' ina pa'i basef endilisimi, owa'. ³⁰Nemaf anama sa'i sokwaha hi'agilif sotanima sohafel wapoti', amam nematawa ina ata' sondase'ama wapoti', owa'. Sopan etin si'i ensel mape heveni. ³¹Basef amama esis saga'i sotanima sohafel wapoti', ipe' patalifa basef amama God na'iam mape Baibeli o owa'? Anan na'ipipa na'ama na'i, ³²'Ae' God Abrahami, Aisaki maloma Jekopi.' Basef amama ma'i God ina Dembinai ma epes isima saga'i, owa'. Anan God epes isima ambal napeis sape namusi."

³³ Esis amam nematawa hiesi same' na'ama sohafel gegelalasisa basef ananiami.

Mi'uli nali'i Godi
(Mk 12:28-31; Lu 10:25-28)

³⁴ Ea' Jisas nasopama malogofa amam amama dambami Sadyusi ma basef amama. Ea' anom amam Farisi mame' basef amama mondowa'anima mafi'i felefele'ma anan. ³⁵ Ea' anona naloma amam nogawa mi'uli Godi andeande' na'i nogwamba Jisasa ni'i anom basef owa' andeande' ma monda'mana basef mowa'ana si'i sowa' bogof. Ea' nahali'ana na'i, ³⁶ “Dembina'i Tisa, maina mi'uli Godi lu'unai nikila' mi'uli hianai nape nali'i?”

³⁷ Ea' Jisas na'ipana na'i, “Ukup ipe'imi mohafela Dembinai God ipe'inai mimilana na'ama. Ukup ipe'imi mimilana hi'ilam, pese'ana ambagof opalef ipe'imi pese'anam hi'ilama Dembinai God atona. ³⁸⁻³⁹ Mi'uli anama lu'unai, nali' endilisi. Ea' mi'uli nagi'i anama, ‘Ipe' ukup mimila enis epes sape felefele'ma ipe'i, si'i ukup maimaila ipe' etipa.’ ⁴⁰ Basef ofagema ma mi'uli hianai Godi maloma basef amam profet manda'ami hiami mape nomona mi'uli anama biefina.”

Jisas nahali' amam dambami Farisi ma Kraisi, anan
SGod nandandepana nasapa'ana nafi'i
(Mk 12:35-37; Lu 20:41-44)

⁴¹ Amam Farisi ata' munduwa'animai etifigin maitu, Jisas nahali'am na'i, ⁴² “Ipe' ukup mape ma'imama ma Kraisi anan God nandandepana ea' ma nesapa'ana niefi'i? Anan nogalomana emi?”

Ea' ma'ipana ma'i, “Devit nogalomana.”

⁴³ Ea' nahali'am na'i, “Dei' maina Ambal Bu'unai Godi nafela okom Deviti ma na'i Kraisi Anan Dembinai? Ea' Devit fowa' gani na'i,

⁴⁴ ‘Dembina'i God na'ipa Dembinai Ae'anai na'i, “Ine' nepe lagel kwahisinai Ae'anai la'ela'ef nefe' netagama anona nemaf Ae' enda' naumbih ine'isi sefe' owina bo'wagah ine'imi.”’

⁴⁵ Devit fowa' nofala Kraisi na'i, ‘Dembina'i.’ Amama atom dei' Kraisi ina aman atona falafunai, owa'. Anan Dembinai.”

⁴⁶ Ea' dei' ina anona aman la'ifina ma nogwamana anom basef Jisas, owa'. Nemaf anama nafe' nafe' owagama wapoti' amam hiami umbamahama meahali'anama anom basef, owa'.

Jisas na'ipa epes hiesi ma waf aonai amam dambami mogawa mi'uli Godi
maloma amam Farisi manda'anai
(Mk 12:38-39; Lu 11:43,46, 20:45-46)

23 ¹ Ea' Jisas nase'asa basef esis amam nematawa hiesi saloma amam alupumi 12-peleim ananiami. ² Na'iam na'ama na'i, “Amom

mawalipasa mi'uli Godi maloma amama Farisi amam maho'ofa Mosesa mawalipasa mi'uli Godi la'ifim. ³Andeande'ma pila basef hiami amam ma'lipipami, ea' ipe' ina penda' waf amam manda'anai, owa' hapainai. Dei' main, amam ma'lipasa basef hiami, ea' amam atom ina mailam, owa'. ⁴Amam mowatania basef amamumi mawalipasama sielam si'i basef wafimi anom awolef wafimi lu'wami mawamonam matoma ikeguf asasimi, ea' amam ina magiambamas mofa'am ma lagof amamumi, owa'. ⁵Amamaga hiami manda'ami manda'am etina epes sotolom sinifelom. Amam mala egip^d lu'unai nail lagof balagah amamumi ma manda' beten ea' manda' sosaf launai nape sagwegw amamumi da'malifima. ⁶Amam ukup ma'i siaifah amama motawa mali'i atom dambami atom mapoma, ma nemaf anama sanda' gwa'aimi lu'wami o anama ifagw esis Juda sa'i basef sapeimi. ⁷Amam ma'i hiesi sotoloma sondalalimam sosa'ma agof amamumi anama sandatama sapoma ma ma'i sofalam si'ipam si'i, 'Dambami tisa'.

⁸Ea' enis epes ina sofala ipe' si'i ipe' dembipei, owa'. Dei' main, ipe' tisa dembinai ipe'inai atotona ea' ipe' hipei pape si'i sahin owan wambota atotona. ⁹Ipe' ina pefala enin epen nape etap anae' pi'i Ahalomepa ipe'inai, owa'. Dei' main, aman anama atotona anan Ahalomepa ipe'inai, nape ilif heveni. ¹⁰Ea' esis ina sofalepa si'i dembipei tisa, owa'. Dei' main, Dembinai tisa ipe'inai Kraisi atotona, God nandandepana nasapa'ana nafi'i. ¹¹Ea' emi egafis nambimb sotaga dembesi ipe'isi, dei' ata' sili' sope sonda' maol sope owina ipe'. ¹²Ea' na'ama etin, emi egafis sefela agof asasimi atom, epes isima anona nemaf agof a'as. Ea' emi egafis sonda' agof asasimi mefe' owin, anona nemaf esis sefa' agof lu'wami."

Jisas na'i basef maila amam Farisi maloma amam mawalipasa mi'uli Godi ma waf aonai amam manda'anai
(*Mk 12:40; Lu 11:39-42,44,52, 20:47*)

¹³"Ipe' amam dembipei pawalipasa mi'uli Godi paloma Farisi, ae' ati uwahipipa ma nimanimi lu'wami anona nemaf meatagamipei. Ipe' amam malogof biamipei! Ipe' pewalo uta ma naep esis amam nematawa ma ina nambimb siowis kingdom heveni, owa'. Dei' main, ipe' ina pafe' pawis nomon, ea' esis amam nematawa sa'i sefe' siwis nomon, isima ipe' pasopamas ea'fa sefe' siowis. [¹⁴Ipe' amam dembipei pawalipasa mi'uli Godi paloma Farisi, ae' ati uwahipipa ma nimanimi lu'wami anona nemaf

c 23:5 Mt 6:1; Eks 13:9; Diu 6:8; Nam 15:38-39 **d 23:5** Basef ofagema ma egip lu'unai ma amam manda' beten mape na'ama. Amam maila waf esis Judai fowa'inai ea' manda' bokis sa'usa'umi ma anona pepa basef Baibeli mailanai. Amam manda'am na'ama ma epes hiesi sotolom sinifelom. **e 23:6** Mt 6:5; Lu 14:7 **f 23:11** Mt 20:26; Mk 9:35; Lu 22:26 **g 23:12** Jop 22:29; Pro 29:23; Esi 21:26; Lu 14:11, 18:14

meatagamipei. Ipe' malogof biamipei. Ipe' pawis ifagw amama nematawa alifiwai, pawis pakawalopom amamaga awoumi. Panda'am na'ama panda' beten launai etina esis sitilipa si'i ipe' bu'wipei. Anona nemaf God newaloga epes hiesi, enis epes owa' seanda' waf aonai na'amainai sofa' nimanimi kwawie'um, ea' ipe' pefa' nimanimi lu'wami endilisi.]

¹⁵Ipe' amam pawalipasa mi'uli Godi paloma Farisi, ae' ati uwahipipa ma nimanimi lu'wami anona nemaf meatagamipei. Ipe' malogof biamipei! Ipe' pafe' hi'agoma naoh etap wambel hiagoma, pifa'ai anona epena notaga alupunai ipe'inai nila basef ipe'imi. Anan ea' nataga alupunai ipe'inai, ea' ipe' panda' anan aona endilisi nikila' ipe' na'ama. Ipe' aopei ma peafe' wambel aonai hel nif fandumi mapoma. Ea' ipe' panda' epen anama nikila' ipe' nenda' waf aonai endilisi nandahama nefe' wambel aonai hel.

¹⁶Ae' ati uwahipipa ma nimanimi lu'wami anona nemaf meatagamipei. Ipe' naep masi'ipei pa'i pih'i'ambasa eaf enis epes. Ipe' pawalipas na'ama pa'i, 'Ti emi egafis si'i agola ipat anama lu'unai Godi sanda' lotuwani ma si'i sonda' basef asasimi motaga la'ifim, amama falafumi. Ea' emi egafis si'i agola gol amama bu'wami sofalo'ma ipat anama ma si'i senda' basef asasimi motaga la'ifim, senda'am sila basef si'i sa'i.'

¹⁷Ipe' pahaga pagaoli ukup mololaepai ea' naep masi'ipei! Main de'im mape lu'um mikila'? Gol amama sofalo'ma ipat anama amam lu'um o ipat anama bu'unai nanda' gol amama mataga bo'oma naep Godi? Ea' dei' ipat anama atona nikila' gol. ¹⁸Ea' ipe' pawalipas wapoti' pa'i, 'Ti emi egafis si'i balata sofa' mafis saso' Godanai ma si'i sonda' basef asasimi motaga la'ifim, amama falafumi. Ea' emi egafis si'i ofa mafis satoma balata ilifa senda' basef asasimi motaga la'ifim, esis silam si'i sa'iam.'

¹⁹Ipe' naep masi'ipei! Maim amamaga mape lu'um? Ofa mafis mape lu'um o balata nanda' ofa anama nataga bo'ona ma naep Godi, dei' nataga lu'una? Ea' dei' balata nikila' ofa. ²⁰Na'ama dei' emi egafis si'i agel balata anama ma si'i sonda' basef asasimi motaga la'ifim, isima senda' basef amama la'ifima amamaga matoma balata ilif maloma balata wapoti'. ²¹Ea' emi egafis si'i agel ipat lu'unai Godi ma si'i sonda' basef asasimi motaga la'ifim, isima sanda' basef asasimi la'ifima ipat anama naloma Anan nape ipat anama. ²²Ea' emi egafis si'i heven ilifa sonda' basef asasimi motaga la'ifim, isima sa'i sonda' basef asasimi la'ifima balata bu'unai Godi naloma Aman anama natoma balata anama.

²³Ipe' amam pawalipasa mi'uli Godi paloma Farisi, ae' ati uwahipipa ma nimanimi lu'wami anona nemaf meatagamipei. Ipe' amam malogof biamipei! Ipe' pawaloga nambawa maloma lombo maloma akwal mamumami hiami pase'ana tu'wanim God. Panda'am na'ama ma akwal amama hiami agofuma amama min, dil, kumin. Ea' ipe' pindihi'ama basef amama hiami ma mi'uli God na'iami ma waf bu'unai ma

pigiambama epes, piti esis uwahipis, penda' amamaga andeande' ma waf endilisinai. Waf anama hianai neloma waf pindilali pese'ana amamaga maim Godanai, anama pekolasana pihapilana etin pilana. ²⁴Ipe' naep masi'ipei, pa'i pih'i'ambasa eaf enis epes! Ipe' panda' maola patofa afi'awa amama sa'umi mail maloh nembawa, ea' mafin anama lu'unai kamel ea' pewalo'ana nalomam.

²⁵Ipe' amam dembipei pawalipasa mi'uli Godi paloma Farisi, ae' ati uwahipipa ma nimanimi lu'wami anona nemaf meatagamipei. Ipe' amam malogof biamipei! Ipe' pandombasa kap plet ande'ama atom bo'om. Ea' nomon owa'. Ipe' opalef si'ipama waf sanda' walanai naloma waf anama alop atonai aonai. ²⁶Ipe' Farisi, naep masi'ipei! Ipe' ata' pili' pendombasa kap malep nomonam muli' ma nambimb ande'ema wapoti' meataga bo'om.

²⁷Ipe' amam pawalipasa mi'uli Godi paloma Farisi, ae' ati uwahipipa ma nimanimi lu'wami anona nemaf meatagamipei. Ipe' epes malogof biamipei! Ipe' pandahama si'i ifagw sa'umi sawa epes saga'i hi'agilif sanda' pen aftinai saofam. Ea' ande'ama bo'om ma satolom, ea' nomonama si'ima amamaga awami folo'alami mala maloma bihiguf balagah epes saga'i alialimi. ²⁸Ipe' pape na'ama etin. Esis epes sati alop ipe'inai ande' sa'i ipe' panda' waf bu'unai. Ea' nomon waf aonai baso'omunai ma malogof biagufi patopa' basef anai ma mi'uli Godi amama mape si'ima ipe'.

**Jisas na'ipa amam amama mawalipasa mi'uli Godi maloma amam Farisi
anona nemaf amam mofa' nimanimi awami
(Lu 11:47-51)**

²⁹Ipe' amam pawalipasa mi'uli Godi paloma Farisi, ae' ati uwahipipa ma nimanimi lu'wami anona nemaf meatagamipei. Ipe' amam pa'i malogof biamipei. Ipe' panda' hi'agilif amam profet maga'i ea' pefalo'ma ifagw epes isima bu'wasi saga'i sapeimi. ³⁰Ea' ipe' pa'i, 'I'i afa' fowa' gani ope si'i akusafa afa'isi, afa' ina wiegiambama esis oha amam profet afum, owa'.' ³¹Ama basef amama atom ipe' pawalapami ofagema ipe'imi atom, pa'i ipe' akusas pagi' patagai saha profet maga'i. ³²Ea' ipe' piwatani waf anama aonai esis akusipa sanda'anai hi'ilana!

³³Ipe' si'i iguf awami pataga iguf awami mahasi! Anona nemaf God nonda'masa basef lu'wami ea' ni'ipipa pefe' pepe wambel aonai hel. Dei' penda'am pi'imama ma nambimb pefe'ma basef amama? Owa'etin. ³⁴Na'ama Ae' asapa'o anom profet molomago anom amam ukup bu'wami mapeimi molomago anom gawaimi ma Baibeli amam mofo'o motagamepa. Anona nemaf ipe' peham moga', ea' anom ipe' piunda lawah usi'imi tu'wanaimi, anom pepe pela'am nomon ifagw pa'i basef papeimi. Ea' ipe' penda'am petofam anona wambel taun lu'unama ea'

petofam mofa' mefe' anona taun ea' petofam pegolopam etin pefe'. Ipe' anona nemaf penda' waf aonai anama. ³⁵Ea' dei' epes isima sape bu'wasi hiesi ma enis sahas saga', ofagema amama hiami anona nemaf mopoma ipe'. Nali'i Abel anan aman bu'unai nafi'i nafi'i natagama aman akutainai profet Sakaraia, Berekia nogalomana, anama akusipa sahana afuna la'afena ipat lu'unai Godi naloma balata saofa mafis saso' Godanai. Amama ofagema anona nemaf mila ipe' etipa. ³⁶Ae' a'ipipa endilisi ipe'. Amamaga nimanimi awami ofagema anona nemaf mopoma ipe' epes hipei amam nematawa dei' papani.

Jisas nalopa wambel Jerusalem

(Lu 13:34-35)

³⁷O ipe' Jerusalem, Jerusalem, ipe' paha amam profet afumi, pakwaha otamba paha amam God nasapa'am mafi'mai ipe' maga'. La'ela'ef ae' a'i ekolasa ipe' epes hipei si'i awata numa'inai nowa'ani nogami nakolasam mawis mail behenagof ananimi. Owa'etin, ipe' pandaiwa'. ³⁸Ipe' peme'! Dei' wambel ipe'inai anona nemaf aona wafina nope. ³⁹Ae' a'ipipa, ipe' nambimb ina petolowe wapoti' ma nambimb pi'i, 'Ape' ma'i God nofalo'ma aman anama nafi'i agel Dembinai ma nonda'ana nondanifel.' ”

Jisas na'i ipat lu'unai Godi anona nemaf aona

(Mk 13:1-2; Lu 21:5-6)

24 ¹Jisas nakwaha ipat lu'unai Godi nafe' etin, amam alupumi ananimi mafi'mai Anan. Amam ma'i mihi'ambana ifagw lu'wami lotumi. ²Ea' Jisas nagwamama basef na'ipam na'i, "Ipe' pati ifagw amama hiami? Ae' a'ipipa endilisi, anona nemaf ina anom otamba motoma anom otamba mope, owa'etin. Sagwasi'am sowalom hi'ilam mofe' mo'oh atona etin."

Jisas na'i basef na'i anona nemaf nimanimi awami motaga

(Mk 13:3-13; Lu 21:7-19)

³Jisas tol nape halaf anama lawah oliv motawama ea' alupumi ananimi atom mafi'mai anan ma'ipana ma'i, "Ine' ni'ipafa amamaga amama nambai' motaga. Maina ikwaf nili' notaga ma afa' ogawa ine' na'i netanima neafi'i ma etap anae' higililana?"

⁴Ea' Jisas nagwamama basef na'i, "Ipe' pindumafuma andeande'. Na'ama enin epen nembaso'mepa. ⁵Dei' main, amam hiami anona nemaf mifi'i mombaso'mepa mi'i agel ae'anai mi'i, 'Ae' ma'uwi ae' Kraiss, God nandandepa nasapa'e afi'i.' Ea' anona nemaf mombaso'ma amam nematawa hiesi some' basef amamumi si'i endilisimi silam. ⁶Anona nemaf peme' enis sopa' lupulupu' sonda' wandaf ea' enis seme'asa wandaf si'ipipa, ipe' ina umbamehepa, owa'. Amamaga amama anona

nemaf meatagai, ea' nemaf akutainai ata' owa'. ⁷Enis epes sape anama etap hiagoma kantri sofela wandaf sopa' soloma anona kantri. Anona dembinai king nehafel no'wa enis wambel hiagoma ananisi sopa' soloma anona dembinai king no'wa ananisi wambel hiagoma. Enis epes wambel hiagoma nolomohas sope, ea' enis wambel hiagoma atona etin etap suwambon nokoto'. ⁸Amamaga amama hiami ata' muli' motaga si'i nimanimi mali' matagama nemata'w kwa'i kola awani.

⁹Amama motaga ma ea', esis sofa'epa ma sese'epa nimanimi, ea' shepa pega'. Epes hiesi wambel hiagoma opalef aoma ipe' kwapete' endilisi. Esis sati ipe' paila basef Ae'ami na'ama dei' sahepa. ¹⁰Nemaf anama amam nematawa hiesi sokwaha sombale'efa Dembinai ea' sondawawalapa etin sose'asas sefe'ma naumbih sohas, ea' epes isima ukup aoma enis. ¹¹Ea' amam profet hiami mambaso'ami motaga mohafel mufi'i mombaso'ma amam nematawa hiesi. ¹²Waf aonai anona nemaf netaga lu'unu, na'ama amam nematawa hiesi sokwaha waf anama ukup maimaila enis epes mi'i uwahipis. ¹³Ea' emi egafis sembale'efa ae' la'ifis situ seatagama nemaf akutainai, isima anona nemaf God nefa'as setanimani. ¹⁴Ea' anona nemaf esis si'ipasa basef amama bu'wami Godi ma epes hiesi siowis kingdom heveni. Esis si'ipas ganima etap hiagoma hi'ilagon ama amam nematawa hiesi ganima wambel hiagoma ata' sili' seme'am ea' nemaf akutainai notaga.

Amamaga awami endilisi anona nemaf motaga
(*Mk 13:14-23; Lu 21:20-24*)

¹⁵Anona nemaf ipe' piti amamaga awami mohambombaga amamaga bu'wami motaga si'i fowa' gani profet Daniel na'i basef mail Baibeli ma'i. Amamaga amama motaga mope anama bo'wagoma nomon ipat lu'unai Godi. (Emi egafis sitalifa basef amama esis sogawa basef ofagema andeande'.) ¹⁶Nemaf anama amam nematawa sape etap hiagoma Judia sofa' sefe' sondowasa' halafutagw. ¹⁷Emi egafis sape ipat ande' felefele' ina ata' setanima siwis sefa'ai amamaga اساسimi ipat nomon, owa'. ¹⁸Emi egafis sapani aofi, ina ata' setanima sefe' wambel sefa' luwaguf maim اساسimi, owa'. ¹⁹Nematawa opafuwai waloma awama awasi ata' sagwa' nomambeh atomi, ae' a'i awau uwahipiwa endilisi ma nogota anama ofa' nimanimi lu'wami endilisi meataganai. ²⁰Ipe' penda' betena Goda ipe' ina pefa' pefe' nogota anama uf noloma asaf mifi'i o nemaf anama Sabat sapoma noma'wanai, owa'. ²¹Nogota anama nimanimi lu'wami endilisi. Fowa' dambadamba God nanda' etap nataga nafi'i nafi'i nataga dei', nimanimi awami amama fowa' gani ina anom na'amaimi mataga, owa'. Ea' anona nemaf wapoti' ina anom nimanimi amama motaga, owa'. ²²I'i God owa' notopa' nimeguf mefe' bandam, anona nemaf amam nematawa hiesi higililas hi'ilas. Owa'etin. God okom napoma epes isima anan nasahe'as ea' dei' natopa' nogota anama bandana.

²³Nemaf anama notaga ma i'i enis epes si'lipipa si'i, 'Ipe' piti Krai, God nandandepana nasapa'ana nafi'i anan nape na'ae', o 'nani nape gani,' ipe' ina pembale'efas, owa'. Hapaisi. ²⁴Dei' main, nemaf anama anom amam mombaso'am mi'i amam Krai o mi'i amam profet motaga monda' ikwaf la'ifinai naninani hianai si'i God atona nanda'anai. Endilisi i'i amam la'ifim, mombaso'ma amam nematawa God nasahe'as ea' mohambombagas. Owa'. Hapaisi. ²⁵Peme', ae' ali' a'lipipa ea' ma amamaga amama nimanimi dei' ata' owa' meatagai.

²⁶Na'ama i'i emi egafis si'lipipa si'i, 'Ipe' piti, anan nani nape gani epes a'agoma wafiguma fetauguma,' ipe' ina peme'as pefe'agon, owa'. I'i emi egafis si'i, 'Ipe' piti nani nape ipat nani nomon', ipe' ina pembale'efas, owa'. ²⁷Ipe' piti otaga holhol pelepele' holala nataga gani aon natefima ea' howalagon nafe' anama hiagoma aon nowalama naso'ma. Ae' ataga epen endilisiwei, nemaf anama ae' etanima iefi'i, enda'am na'ama etin hiesi sotolowe. ²⁸Mamagoma alop saga'i na'oma, ea' anama atogon anona nemaf komemb mefe' munduwa'anima.

Jisas na'i, "Ae' ataga epen endilisiwei anona nemaf ifi'i."

(Mk 13:24-27; Lu 21:25-28)

²⁹Nimanimi amama hiami ma nogota anama hi'ilam ea', mehip etin 'Aon alipunai netaga owamb, ea' aon owambunai wa na'ef ina molo, owa'. Ea' ondowa mowai otaga ilif, amamaga hiami mape otagai ea' bol etin mope.'

³⁰Nemaf anama ondowa mowai, ikwaf ae'anai netaga gani otaga ilif, Ae' ataga epen endilisiwei ifi'i. Ea' amam nematawa hiesi sape etap hiagoma selef. Ea' siti ae' eloma elagw otaga ilif ifi'i eloma amamaga howalagon bu'wami Godi moloma pepel Ananinai. ³¹Ea' alof lu'unai nelef mehip, esapa' amam ensel ae'ami mofe' etap hiagoma aon natefima nowalama wa'owa'ol anama biafigin biafigin mefe'agon hi'ilagon ganima etap otaga mafe' motambela. Ensel amama mofe' mofa'ai esis amam nematawa God nasahe'as ea' Ananisi sondatama etifigin.

Elif nihi'ambapa mogawa nimeguf

(Mk 13:28-31; Lu 21:29-33)

³²Ipe' ukup mi'i anom basef womun etina fig. Ipe' piti lawag anama fik noloma lawah hiami wapoti'. Ipe' piti ilaof nonafa ma basowa, pegawa nogota anama nelemb ea' felefele' ma meaof. ³³Ea' na'ama etin nemaf anama ipe' piti amamaga amama ali' a'lipipami motaga hi'ilam, ipe' pegawa ae' afi'i aitu felefele'ma uta. Ina ata' nogota laona, owa'.

³⁴Ae' a'lipipa endilisi, amam nematawa dei' ata' papani ina nambimb poga' ulal, ata' owa', ipe' piti amamaga amama hiami motaga hi'ilam. ³⁵Otaga noloma etap hiagoma anona nemaf hegililam hi'ilam, ea' basef ae'ami ina anona nemaf hi'ilam, owa'etin. Mope la'ela'ef hihif.

**Ina enin epen negawa nemaf neloma nogota Dembinai nataga epen
endilisinai neafi'i, owa'**

(Mk 13:32-37; Lu 17:26-30,34-36)

³⁶⁻³⁷Ae' ataga epen endilisiwei a'ipipa. Owa' enin epen negawa nemaf anama o nogota anama ae' iefi'ianai. Amam ensel mape heven ilifi wapoti' ina mogawana. Ae' nogalomana Godi wapoti' ina egawana, owa'. Ahalome atona nape ilif anan atona negawa nemaf anama. Waf fowa' sanda'ana nogota anama Noa napenai, ea' na'ama etin si'i esis sonda'ana nemaf anama felefele'ma iefi'i etaga etap anae'. ³⁸Fowa' gani embel lu'wami ata' owa' motagai, nogota anama esis sape sa' gwa'aimi sa' embel amam nematawa sindikikila'ma sandase'ama etin safe' safe' sataga nemaf anama Noa nafe' nawis sip. ³⁹Amam nematawa isima ina sagawa nemaf anama, owa'. Esis ukup mase'as sape na'ama etin safe' satagama nemaf anama embel lu'wami mataga mahas muwambu'was saga' hi'alas. Ea' na'ama etina nemaf anama ae' etanima iefi'ianai. ⁴⁰Anama amam biam mondao'oma monda' maol mapani aof, God nofa' anona, anona nokwahona nope. ⁴¹Ea' anowa nematawa biawa onda' maola plaua onda' bret, nemaf anama God nofa' ano'w kofe' nokwaha ano'w kope.

⁴²Ea' ipe' pindumafuma andeande'. Dei' main, ipe' ina pegawa nambai' Dembinai ipe'inai nifi'i, owa'. ⁴³Ipe' ukup mopoma anom basef wamun etin pegawam. I'i ofagena ma ipati nili' nogawa owamb maina nogota nanda' wali neafi'ianai, ama naep motawa notologon nope, nanda' wali ina nafi'i nupisila ipat ananinai nuwis nomon, owa'. ⁴⁴Ea' ipe' wapoti' naep motawai pepe. Dei' main? Ae' ataga epen endilisiwei iefi'i anona nemaf ipe' ina pegawa pi'i ifi'i ulal nemaf anama, owa'.

⁴⁵Ipe' hipai penda' waf bu'unai pehafa Ae' si'i aman anama gawainai numafi amam manda' maoli nanda' maol andeande'. Aman anama dembinai ananinai nandandepana ma numafi ananinai manda' maoli ma nease'ama gwa'aimi amam nogota anan na'ianai. ⁴⁶Nemaf anama dembinai ananinai notanima niefi'ianai, ma niti aman anama nanda' maol andeande', aman anama nondanifel. ⁴⁷Ae' a'ipipa endilisi. Dembinai ananinai anona nemaf nonda'ana nope dembinai ma numafi amamaga hiami ananinai. ⁴⁸Ea' i'i aman anama nonda' waf aonai okom napoma opaf ananinai atona ni'i, 'Dembinai ae'anai ina nambimb nifi'i ulal, owa!'. ⁴⁹Ama anan noha amam manda' maol etini nea' gwa'aimi embel la'ifimi noloma amam amama mahaga magaoli. ⁵⁰Ea' Dembinai ananinai notanima nifi'i anona nemaf aman anama ina ni'i Dembinai nifi'i ulal, ata' owa'. ⁵¹Ea' nohana negalo'mana nope noloma epes isima sambaso'ami malogof biefigimi. Wambel anama awagoma selef sonda' nalef tilili talala' kwapete'as sope.

Basef womun etina nematawa awiawai 10-pelelwa

25 ¹Nemaf anama epes siowis kingdom heveni si'i anom basef womun etina nematawa awiawai 10-pelelwa. Anona aman na'i

noso' ano'w nemata'w, nafe' napani ma notanima nifi'i. Ea' nematawa awama awiawawai ohafel ofa' lamifah mandandawa wafe' wa'i witi aman anama eaf o'wana ufi'i. ²Wanowa biawa gawa a'awai ea' wanowa biawa ogawai. ³Awama gawa a'awai ofa' lamifah malomawa wafi'i, ea' awau ina ofa'ai kerosin etifin nalomawa, owa'. ⁴Ea' awama gawaiwai owala kerosin batowagof ofa'am etifim maloma lamifah awoumi ofa'am etifim wafe'. ⁵Aman anama ina dei' nafi'i ulal, ata' owa'. Ea' awau hiawai naep nimanim ambeh mahawa wa'oh.

⁶Wa'oh wafe' wafe' ma amaneta la'efina wame' anona maf nataga na'i, 'Dei' aman naso' nemata'wi nafi'i. Ipe' pefe' petolona eaf pe'wanai pifi'i.' ⁷Ea' nematawa awama ohafel, wandondomba lamifah awoumi ma weafe'. ⁸Ea' nematawa awama gawa a'awai wandaila awama gawaiwai wa'ipawa wa'i, 'Ipe' ata' pese'apa kerosin tu'wanina. Lamifah ape'imi ma'i fendaga'am.' ⁹Ea' awau wa'ipawa wa'i, 'Owa'. Kerosin anae' dende'ma ape'. Ipe' fo'lo stua petala anona ipe'inai.'

¹⁰Ea' awo ata' wafe' watala kerosin etin, aman anama noso' nemata'wi nafi'i. Ea' nematawa awama wandandombol wapoti', wawis ipat nomon walomana sa' gwa'a'imi lu'wami ma aman naso' nemata'wi, ea' uta nasol.'

¹¹Ea' awama wafe' watala kerosin otanima wafi'i wagi' wataga, ea' waitu ofalana wa'i, 'Dembina, Dembinai, ine' usi'mapai uta.'

¹²Ea' anan nagwamawa basef na'i, 'Ae' a'ipipa endilisi, ae' owa' eagauepi.'

¹³Ea' Jisas na'i anom basef wapoti' na'i, 'Dei' ea' na'ama etin, ipe' pindumafuma andeande'. Dei' main, ipe' ina pegawa nambai' ae' iefi'i.'

Basef womun etina amam mofa' otamba

(Lu 19:11-27)

¹⁴Nemaf anama ae' etanima iefi'ianai epes siowis kingdom heveni na'ama etin si'i anom basef womun etina anona aman na'i nefe' anagon. Anan nofalai amam amama manda' maola anani mafi'i, nase'ama amamaga ananiami atona etina mumafiam. ¹⁵Ea' anan nawalomam moni amam. Anona nase'ana 5,000 kina, anona nase'ana 2,000 kina, anona nase'ana 1,000 kina. Anan nase'am otamba amama dende' ma gawa amamunai ea' nafe'. ¹⁶Ea' aman anama nofa' 5,000 kinai mehipe etin nanda' maolana ea' nofa' 5,000 kina wamenai wapoti'. ¹⁷Ea' aman anama nofa' 2,000 kinai wapoti' nanda' maolan nofa' 2,000 kina wamenai wapoti' naloma fowa'inai. ¹⁸Ea' aman anama nofa' 1,000 kinai dembinai ananinai nase'anana nofa'ana nafe' nala'agon nawa moni anama nambaho'wana etap.

¹⁹Ama nogota laona nafe' ea', dembinai amamunai notanima nafi'i. Ea' na'i ata' ni'i basef andeande' noloma amam nogawa moni anama anan nase'amanai. ²⁰Ea' aman anama nofa' 5,000 kinai nafi'i ea' nofa'ai

5,000 kina anama anan nanda' maol nofa'anai wapoti' na'ipa dembinai ananinai na'i, 'Dembina, ine' nase'e 5,000 kina ea' dei' ine' niti ae' anda' maola moni anama dei' efa' 5,000 kina wamenai wapoti.'

²¹Ea' Dembinai na'ipana na'i, 'Ine' aman bu'winai nanda' maol andeande'. Dei' fowa' ine' nimafi amamaga sa'um andeande'. Dei' enda'ena nimafi amamaga lu'wami. Ine' nifi'i nendanifel neloma Dembinai ine'inai.'

²²Ea' aman anama nofa' 2,000 kinai nafi'i na'ipana na'i, 'Dembina, ine' niti. Ine' nase'e 2,000 kina, dei' anda' maola moni anama, efa' 2,000 kina wamenai wapoti.'

²³Ea' Dembinai na'ipana na'i, 'Ine' aman bu'winai nanda' maol andeande'. Fowa' ine' nimafi amamaga sa'umi andeande'. Dei' enda'ena nimafi amamaga lu'wami. Ine' fi'i nendanifel neloma Dembinai ine'inai.'

²⁴Ea' aman anama nofa' 1,000 kinai anan wapoti' nafi'i na'ipa Dembinai ananinai na'i, 'Dembina, ae' egawa ine' aman la'ifinai nagi amamaga na'i ine'imi atom. Aof anona aman nawamanai anama ine' nafe' nala'am. Ea' anona etap anona aman nowaha olelembanai, ine' nafi'i nagi. ²⁵Ae' okom napoma ine'. Na'ama ae' umbamahe ma ine', dei' afe' ala'agon ambaho'am 1,000 kina ine'inai amboho'ana nape etap. Amama amamaga ine'imi ea' ine' tanima fa'amo.'

²⁶Ea' Dembinai ananinai nagwamana basef na'ipana na'i, 'Ine' nanda' maoli, ine' aman aowinai endilisi. Ine' ala'uta nainai. Endilisi ine' negawa ae' ala' gwa'aimi anona aman nawam aof ananinai, afe' atopa' wit anona etap anona amani. ²⁷I'i na'ama, dei' nefa'ana nembe'ana benga ae' etanima ifi'i efa'ana neloma anona wamenai wapoti'. ²⁸Ea' ipe' dalombana 1,000 kina aman anama pese'anana nefe'ma aman anama nofa' moni 10,000 kinai.'

²⁹Dei' main? Emi egafis sahapila amamaga amama nambimb sofa' anom wamenai wapoti' ma sefa' hiami. Ea' emi egafis amamaga a'asi, amamaga kwaiyo'um esis sahapilami, amama nambimb endalombasam esis. ³⁰Aman anama wafinai ipe' pekwahona nefe' nuwis ande' akotiguma endilisi. Wambel anama awagoma selef sonda' nalef tilili talala' kwapete'as sapoma.

**Dembina nataga epen endilisinai owagama newaloga
epes hiesi si'i sawaloga sipsipi meme maitu deindei**

³¹Nemaf anama ae' ataga epen endilisiwei iefi'i ilumai pepel howalagon ae'anai, ea' amam ensel hiami molome mifi'i. Ama nemaf anama ae' epe etoma balata lu'unai ae'anai ma howalagon mafi'i heveni. ³²Ea' amam nematawa hiesi sape etap hiagoma sifi'i sope naep ae'imi. Ea' ae' ihihis'as enda'as situ bieffis, si'i aman numafi sipsipi nasifa' sipsip mafe' anagon, meme mafe' anagon. ³³Ea' enda' epes sefe' situ wa'ol lagel kwahisinai

ae'anai si'i sipsip, ea' epes isima God nondaiwa'masi situ wa'ol lagel eganai si'i meme.

³⁴Ea' ae' dembiwei king i'ipa esis isima sape lagel kwahisinai i'i, 'Ipe' Ahalome ae'anai nofalo'mepa ma pendanifel, ipe' piwis kingdom Ananinai pefa' amamaga amama ipe'imi fowa' etap owa' ata' neatagai ma'omipei.

³⁵Dei' main, ipe' fowa' pati ae' nolomahe ape ipe' pase'e gwa'aimi. Pati iap nase'e, pase'e embel a' embel. Ae' afi'i si'i anona wambelinai ipe' pefa'e afe' ifagw ipe'imi. ³⁶Ea' ae' luwaguf maim a'e, ipe' pase'eam anda'am ea' awasiwi ipe' pimafi andeande'. Ae' ape anda' kalabus, ipe' paf'o patolowe.'

³⁷Ea' esis isima bu'wasi sogwa basef ananinai si'i, 'Dembinai, dei' maina nemaf ape' mati ine' nolomahena mase'ena gwa'aimi ine'? Maina nemaf ine' eap mase'ena ape' mase'ena embel? ³⁸Ea' maina nogota ape' matilina si'i anona wambelinai ape' mofa'ena mafi'i ifagw ape'imi? Ea' maina nemaf ape' matilina lowaf a'ena, mase'ena lowaf? ³⁹Ea' maina nemaf mati awes nanda'ena nape kalabus mafe' matilina?'

⁴⁰Ea' ae' dembiwei king egwamasa basef i'i, 'Ae' a'ipipa endilisi! Maim opeh bu'wami ipe' panda'ama pagiambama esis sahin owan ae'asi falafisi agof a'asi, amama ipe' ina panda'masam esis etis, owa'. Panda'meam ae' wapoti!'

⁴¹Ea' ae' i'ipa esis saitu lagel eganai wa'ol wapoti' i'ipas, ipe' si'amae fo'o. God nandaiwa'mepa na'i ipe' epes aopei. 'Ipe' fo'o wambel aonai nif lu'wami ma'oma. Nif anama Ahalome nanda'am mandandombol ma'oma aman aonai Satan naloma ensel ananinai atom. ⁴²Dei' main, ipe' fowa' pati ae' nolomahe ape, ipe' ina pase'e gwa'aimi, owa'. Ea' ae' eap mase'ema embel, ipe' ina pase'e embel a' embel, owa'. ⁴³Ea' ae' si'i epen anagon lauguniwei, ea' ipe' owa' pefa'e pefe' ifagw ipe'imi, owa'. Ea' lowaf a'e ipe' ina pase'e lowaf, ae' awes nanda'e, ape anda' kalabus ea' ipe' ina paf'o patolowe, owa'etin.'

⁴⁴Ea' esis wapoti' sogwa basef sohali' ae' si'i, 'Dembinai, dei' maina nemaf ape' mati ine' gwa'aimi embel a'ena nolomahena, ine' epen anagon laugininai, ine' lowaf a'ena awes nand'ena, nape nanda' kalabus, ea' ape' owa' mof'o meatilina?'

⁴⁵Ea' ae' egwamasa basef esis i'i, 'Ae' a'ipipa endilisi, maina waf owa' peanda'ana enin epen inima falafini agel a'ani, amama ea' na'ama etin ina panda'meana ae' wapoti', owa'etin.' ⁴⁶Ea' epes isima anona nemaf sefe' sofa' amamaga awami mape la'ela'ef hihif. Ea' epes isima bu'wasi anona nemaf owagama sofa' ambal namunai sefe' sope anama sope andeande' la'ela'ef hihif."

Amam dambami agufumi ma'i basef mandame'mama moha Jisas neaga'
(Mk 14:1-2; Lu 22:1-2; Jo 11:45-53)

26 ¹Jisas nawalipasa basef amama ma hi'alam, ama nogota anama anan na'ipa alupumi ananinai na'i, ²"Ipe' pegawa, nimeguf biam atom ata'

mape ma nemaf anama sogwa' gwa'aimi lu'wami sa'i Pasova ea' neataga. Nemaf anama anona aman nowalapa ae' ataga epen endilisiwei ma anom amam naumbih mundi ieil lawag usi'inai tu'wanainai mohe eaga'."

³Nemaf anama amam pris dambami maloma agufumi esis Judai munduwa'anima mape ipat Kaiafasi, anan pris dembinai nape nali'ma pris hiami. ⁴Ea' ma'i basef mandame'mama mefe' mondambaho' mombalo' Jisas mohana neaga'. ⁵Ea' amam mandaiwa'ma meambalo'ana nemaf anama sanda' gwa'aimi amama lu'wami. Na'ama epes hiesi ukup aom ea' sohafel sonda' wandaf.

Ano'w nemata'w kwakolo' sanda newala balaga Jisasi

(Mk 14:3-9; Jo 12:1-8)

⁶Nemaf anama Jisas nape Betani nape ipat anona aman Saimon, fowa' awes aonai nanda' alop ananinai nambo', dei' ambo'ona. ⁷Ea' ano'w nemata'w kwafi'mai anan kwahapila anona botol sanda'ana si'i owap, embel sanda alogw bu'wami ma'anai satalona otamba lu'wami nala botol anama. Ea' kwakolo'w sanda anama newala balaga Jisasi ma tebol anan natomama.

⁸Amam alupumi ananiami mati na'ama, ukup amamumi aom endilisi. Ea' ma'i, "Dei' maina akwa'w kwahambombaga sanda anama nafe' etin? ⁹I'i afa' ofa'ana enis epes sotalona moni hianai ma afa' ofa'ana oso' epes isima kwahusa gwa'aimi maim, andeande'. Owa'etin."

¹⁰Ea' Jisas nogawa ukup amamumi, na'ipam na'i, "Dei' maina ipe' ukup aom mapoma nemata'w akwama? Owa'. Akwa'w kwanda' waf bu'unai ma ae'. ¹¹Isima kwahusa gwa'aimi maim sape salomepa nimeguf hiami. Ea' ae' ina ata' elomepa epe nimeguf hiami, owa'. ¹²Nemata'w akwama kwakolo'wa sanda anama ma alop ae'anai kwanda' amama kondola'wifa felefele'ma esis seawe hi'agif. ¹³Endilisi ae' a'lipipa, ganima etap wambel hiagoma anona nemaf si'ipasa basef amama bu'wami Godi, si'ipasa basef ako'umi wapoti' ma ukup meapoma waf bu'unai akwa'w kwanda'meanai."

Judas na'i basef la'ifimi naloma amam naumbih moha Jisas neaga'

(Mk 14:10-11; Lu 22:3-6)

¹⁴Nogota anama anona alupumi Jisasi 12-peleim agilinama Judas Kariotinai nafe'ma amam pris hiami dambami. ¹⁵Ea' nahali'am na'i, "Ipe' pa'i pese'e main petalowe ma ihi'ambepana?"

Ea' amam matalifa moni silva 30-peleim mase'ana. ¹⁶Ea' nogota anama atona nohafel nanda'am la'ela'ef nagolopa anona eafa nihi'ambama Jisas amama meambalo'ana.

Jisas na' gwa'aimi lu'wami sa'i Pasova naloma alupumi ananiami

(Mk 14:12-21; Lu 22:7-14,21-23; Jo 13:21-30)

¹⁷Nemaf anama sali' sa' anom gwa'aimi sa'i Pasova esis sa' bret anama owa' neatf lu'unai ea' amam alupumi ananiami mafi'mai anan mahali'ana

ma'i, "Ine' na'i afa' ofe' ondondomba ipat eti ma ine' nea' gwa'aimi amama?"

¹⁸Ea' na'i, "Ipe' pefe' taun, pefe'ma anona aman pi'ipana pi'i, 'Dembina'i Tisa na'i, "Nemaf dahandahama God nandandepamianai ea' felefele'. Ae' a'i ea' Pasova anama eloma alupumi ae'ami ope ipat ine'inai." "

¹⁹Ea' amam alupumi ananimi manda'am na'ama si'i anan na'ipam ea' mandondomba gwa'aimi Pasova. ²⁰Ea' owamb anan nape nagwa' gwa'aimi tebol naloma alupumi ananimi 12-peleim. ²¹Ea' amam mape ma' gwa'aimi etin, Jisas na'ipam na'i, "Ae' a'ipipa endilisi, anona afa'inai atuwasi nefe' nihi'amba amam naumbiha ae' efe' eapoma."

²²Ea' ukup amamumi nimanim endilisi, mohafel mahali'ana atona etin ma'i, "Dembina'i, ae' o emi?"

²³Ea' anan nagwamama basef na'i, "Aman anama dei'aol nalome wahapila bret walata dis, anan ea' ma'una, anama atuwasi nowalapa ae' ma naumbih ae'ami. ²⁴A'e, ataga epen endilisiwei, atuwasi enis epes sehe eaga' si'i Buk Baibel na'iama ae'. Ea' aman anama nowalapa ae' ma naumbih, anan uwahipina endilisi. Nambimb nimanimi awami endilisi motagamana. Fowa' mama'wana owa' ata' kolanai, andeande'. Ama anan ina notagama amamaga nimanimi awami. Owa'etin."

²⁵Ea' aman anama Judas atuwasi nowalapa Jisas amam naumbih anan na'ipa Jisas na'i, "Dembina'i Tisa, ae' o emi?"

Ea' Jisas nagwamana basef na'i, "Ine' etina na'iam."

Jisas nase'ama gwa'aimi komunion alupumi ananimi 12-peleim
(*Mk 14:22-26; Lu 22:15-20; 1 Ko 11:23-25*)

²⁶Jisas nalomam ata' mape ma' gwa'aimi etin, nafela anona bret, nanda' beten nanifela God, nawalona nase'am na'ipam na'i, "Ipe' felana pea'ana. Bret anama alop ae'anai."

²⁷Ea' nafela anona kap embel wain nalanai nanifela God, nase'am na'ipam na'i, "Ipe' hipei gwa'am etin. ²⁸Embel amama esimbel ae'ami manda' basef amama Godi ma'i endilisimi atomi mataga la'ifim. Esimbel amama ae' ekolo'wama God nokwahomasa waf aonai epes hiesi sanda'anai. ²⁹Ae' a'ipipa, ina ata' etanima ea' embel wain wapoti', owa'. Ae' efe' etaga wambel Ahalomei, ea' anona wain dambainai elomepa anama."

³⁰Amam manda' anona awaf ea' mawisi mafe' mondowasa' halaf lawah oliv motawama.

Jisas na'i atuwasi Pita nombaho' agel ananinai nowa' alafuga anan
(*Mk 14:27-31; Lu 22:31-34; Jo 13:36-38*)

³¹Ea' Jisas na'ipam na'i, "Atuwasi owamb anae' ipe' pindaiwa'ma pembale'efa ae' pekwahowe. Dei' main, fowa' gani Baibel na'i na'ama na'i, God na'i,

'Anona nemaf owagama gani, ae' eha aman anama numafi sipsipi noga'. Ea' sipsip amama mofa' mefe' atona etin.'

³²Ea' owa'etin. Nambimb ae' etanima ehafel wapoti' ili'ipa efe' etap hiagoma Galili."

³³Ea' Pita nagwa basef na'ama na'i, "I'i endilisi amam alupumi ine'imi hiemi meambale'efa ine' mi'i mokwahena, hapaimi, ae' embale'efa ine' la'ifiwi ina atuwasi ikwahina, owa'."

³⁴Ea' Jisas nagwamana basef na'i, "Ae' a'lipina endilisi, dei' owamb anae' awata ata owa' nondo'am, ine' nembaho' agel ae'anai ni'i wenif ni'i, 'Ae' owa' egawa Jisase.'"

³⁵Ea' Pita na'ipana na'i, "Owa'etin. I'i esis soha afa' biafa oga' etin, ae' ina embaho' agel ine'inai, owa'etin."

Ea' alupumi hiami Jisasi ma'iam na'ama etin hi'alam.

**Jisas nafe' nawis anagon Getsemani sawa lawah
oliv motawama nanda' beten
(Mk 14:32-42; Lu 22:39-46)**

³⁶Ea' Jisas nao'wa alupumi ananimi mafe' etin anagon Getsemani lawah hiami oliv motawama. Ea' na'ipam na'i, "Ipe' pepe na'ae, ae' efe' gani wa'ol enda' beten."

³⁷Ea' anan nao'wa Pita naloma Sebedi batausana Jemsi Jon nao'wam mafe'. Ea' name' opaf ananinai nimanina kwapete' endilisi. ³⁸Ea' na'ipam na'i, "Opaf ae'anai nimanina endilisi ma ae' ega'. Ipe' pepe na'ae pindumafuma pepe pehafa ae' eatanimani."

³⁹Ea' anan nandamboma nafe' fele' nowa nambe' opaf notawa nanda' beten na'i, "Ahalome Ae'inai, i'i ine' ni'i a'e, nekwahome nimanimi amama. Ea' ine' nila okom ine'inai atona, Ae' owa'."

⁴⁰Nahali'ana ea', nehafel notanima nafe'ma alupumi ananimi mapoma, nati amam ma'oh maga' mafe'. Ea' nofala Pita na'i, "Ipe' la'ifipa pepe pehafa ae' o owa'? Nogota a'lipipa a'i pepe pehafa ae' ina laona, owa'. Nogota bandana si'i aua atotona. ⁴¹Ipe' pindumafuma andeande' pepe penda' beten. Na'ama amamaga meagwambipei motagama ipe'. Endilisi ambagof ipe'mi ma'i a'e ma penda' beten, ea' alop nimanina ala'uta naepa."

⁴²Ea' anan notanima nafe'ma bif nanda' beten na'i, "Ahalome ae'anai, i'i owa' anona eaf ae' indihil'ama nimanimi amama, ea' hapaimi, ae' efa'am. Ine' nila okom ine'inai atona."

⁴³Anan nahali'ana ea' nandamboma notanima nafi'i bif amam mapoma nati amam ata' ma'oh etin. Dei' main, naep amamumi nimanim. ⁴⁴Ea' nakwahom notanima nafe' nanda' beten wenif. Beten anama atona do'ok nali' nanda'anai, notanima nanda'ana wapoti'.

⁴⁵Ea' notanima nafi'mai amam mapoma na'ipam na'i, "Ipe' ata' papoma noma'w pa'oh etin? Peme! Nogota ae'anai nataga. Dei' nemaf anae'

anona aman aonai nifi'i nulumai anom amam awami mufi'i mowa' Ae' ataga epen endilisiwei. ⁴⁶Hafel! Afa' ofe' uti aman anama nihi'ambama ae' ma naumbih ae'ami dei' nafi'i.”

Judas nawalapa Jisasa naumbiha mombalo'ana mofa'ana mofe'
(*Mk 14:43-50; Lu 22:47-53; Jo 18:3-12*)

⁴⁷Jisas ata' naitu na'ipam etin, Judas, anona amam 12-peleim Jisas, anan nafi'i nalumai amam hiami mahapila bainahi belep. Amam pris dambami malumai amam agufumi dambami esis Judai masapa'am mafi'i. ⁴⁸Ea' aman anama nowalapa Jisas, nali' na'ipam nanda' ikwaf nihi'ambam na'i, “Atuwasi ipe' piti ae' iesisi' dalogwanai, aman anama ea' Jisas ma'una. Ipe' pembalo'ana pewa'ana.”

⁴⁹Ea' anan nafe'ma Jisas mehıp na'i, “Owamb bu'unai, Dembinai Tisa.” Ea' nasisi' dalogwana.

⁵⁰Ea' Jisas na'ipana na'i, “Alupinai, amamaga ine' nafi'i ma na'i nenda'ami, da'am mehıp.”

Ea' amam mafi'i felefele'ma Jisas mowasa' lagof mombalo'ana. ⁵¹Ea' anona aman nape naloma Jisas, nala lagel nagiai bainat ananinai naha anona aman nanda'mana maola pris dembinai nape nali'ma pris hiami, natopa' aliga ananinai pele'atana nowa.

⁵²Ea' Jisas na'ipana na'i, “Wala bainat notambel nowala napoma. Emi egafis sapa' bainah, anona nemaf bainah mohas sogal. ⁵³Ine' negawa pepel Ahalomei o owa'? I'i ae' ihali'ana, Anan nase'e ensel ananiami hiami endilisi mehıp mikila' amam soldia hiami wambotagw 12-peleim. Owa'. ⁵⁴I'i ae' enda' waf anama, atuwasi basef amama fowa' God na'iam mape buk Baibeli ina mataga alihim dende'ma amam mifi'i mombale'e, owa'.”

⁵⁵Ea' Jisas na'ipa esis amam nematawa hiesi na'i, “Ipe' pefa'ai bainahi belep pafi'i si'i pafi'i pa'i pewa' anona aman aonai napa' naloma gavmani? Nimeguf hiami ae' ape alomepa ipat lu'unai Godi awalapa basef bu'wami esis amam nematawa hiesi ea' ipe' ina pembale'e. ⁵⁶Ea' dei' amamaga amama ipe' panda'ami mataga dende'ma basef amama fowa' God na'ipa amam profet manda'am mail buk mataga endilisi.”

Ea' alupumi ananiami hiami makwahona mafa' mafe' hi'alam.

Amam mofa' Jisas mafe' manda'mana basefa amam dambami Juda
(*Mk 14:53-65; Lu 22:54-55,63-71; Jo 18:13-14,19-24*)

⁵⁷Amam amama mombalo' Jisas mofa'ana mafe' ipat anona pris dembinai nape nali'ma pris hiami Kaiafas. Ea' amam dambami mawalipasa mi'uli Godi maloma agufumi esis Judai mali' mafi'i mundawa'anima mape. ⁵⁸Ea' Pita ina nalomam nafe' etin, owa'. Anan nape lougun nagimam nafe' nataga endaleleb nawis ipat dembinai prisi nafe' nape naloma amam polisman mapoma nif. Anan na'i nope niti atuwasi maim meataga.

⁵⁹Ea' amam pris dambami maloma amam dambami Juda mumafi koti, amam hiami ma'i mogolopa enis epesa sombaso'ma Jisas ma anom basefa mohana neaga'. ⁶⁰Ea' epes hiesi sataga sa'i basef baso'maimi mafe'ma Anan. Ea' esis ina satagama anom basef endilisi ofagema ma mohana neaga', owa'. Ea' anom amam biam mataga ⁶¹ma'i, "Aman anama na'i anom basef na'i, 'Ae' la'ifiwei ma etalona ipat lu'unai Godi ma etanima ela'ana wapoti' nimeguf wanom.'"

⁶²Ea' pris anama dembinai naitu nahali' Jisas na'ama na'i, "Ine' negwa basef amama o owa'? Dei' maina amam ma'ipina basef na'ama?"

⁶³Ea' Jisas ina na'i anom basef, owa'.

Ea' pris anama na'ipana na'i, "Ae' a'ipina endilisi ma agel dembinai Godi nape la'ela'ef hihif, ine' kipa ape'. Ine' Krais nogalomana Godi nandandepena nasapa'ena nafi'i o owa'?"

⁶⁴Ea' Jisas na'i, "Ipe' pa'iam ea' ma'um. Ea' ae' a'ipipa, anona nemaf ipe' piti ae' ataga epen endilisiwei, epe lagel da'isinai Godi. Epe otaga ilif etanima ifi'i petolowe."

⁶⁵Jisas na'iam na'ama ea', pris anama okom wandafuna ea' nahape' klos amama anan nalami na'iam na'i, "Anan nanda' dembinai God findiwana ma basef awami! Ape' ina ata' mofalai enis epes wapoti' sifi'i si'i anom basefa anan, owa'. Anan na'ipana basef awami ma God, ea' amama dei' pame'anamam ea'. ⁶⁶Ipe' ukup mape ma'imama?"

Ea' amam hiami magwamana basef ma'i, "Anan nanda' waf aonai ea' andeande'ma neaga'."

⁶⁷Ea' amam misi'wafa amaga Jisasi mahana lagof amamumi. Ea' anom nakolaombana. ⁶⁸Ea' masopamana naep ananiami ma'i, "Ine' Krais God nandandepena nasapa'ena nafi'i, ine' ni'i basef si'i anona profet na'iami newalapa emi nahena."

Pita na'i, "Ae' owa' egawa Jisase."

(Mk 14:66-72; Lu 22:56-62; Jo 18:15-18,25-27)

⁶⁹Pita tol nape endaleleb nomon nape ipat ande'. Ea' ano'w nemata'w kwanda' maoli kwafi'i felefele' ma anan ea' kwa'ipana kwa'i, "Ine' wapoti' nape naloma Jisas etap hiagoma Galili."

⁷⁰Ea' Pita nambaho' agel Jisasi ma naep isima hiesi na'i, "Ae' ina egawa basef amama ine' na'iami, owa'."

⁷¹Ea' nafe' naitu indaleleb nomon felefele'ma uta, ano'w nemata'w kwatolona wapoti' kwa'ipa esis amam nematawa sape felefele' kwa'i, "Aman anama anan nape naloma Jisas Nasaretinai."

⁷²Ea' Pita nambaho' agel Jisasi wapoti' ea' na'i, "Endilisi gani ilif, ae' ina egawa aman anama."

⁷³Nogota bandana nafe'ma ea', anom amam maitu felefele' mafi'mai Pita ma'ipana ma'i, "Endilisi, ine' aman naloma esisi. Diga ine'inai nawalapena alihina."

⁷⁴Ea' dei' Pita nehafel na'i basef la'ifimi na'i, "Ti' basef ae'ami ina endilिसimi, ae' a'i God nehe' ega'. Endilisi gani ilif, ae' ine egawa aman anama, owa'."

Anan na'iam ea', mehip awata nanda'am. ⁷⁵Ea' Pita okokoma basef nambati' Jisas na'ipanami na'i, "Awata owa' ata' neanda'am, ine' nembaso'mas ni'iam wenif ni'i, 'Ine' owa' negawa Jisase.' "

Ea' Pita nawisi nafe' ande' nalef mehip endilisi.

Amam mofa' Jisas nafe'ma gavman dembinai Pailat

(Mk 15:1; Lu 23:1-2; Jo 18:28-32)

27 ¹Ea' lala kuhimbita atona amam pris dambami hiami maloma agufumi esis Judai ma'i basef mandame'mama moha Jisas neaga'. ²Amam mowa'ana mofa'ana mafe' mase'ana gavman dembinai Pailat.

Judas nandaha nail mandof ea' afuna

(Ap 1:18-19)

³Dei' aman anama Judas nawalapa Jisasa amam naumbih nati amam manda' basef mahana Jisasa neaga'. Ea' nati amam mahana manda' amamaga amama, ea' nofa' nimanimi lu'wami endilisi. Ea' dei' anan notanima nowambela moni silva anama 30-peleina nafe'ma amam pris amama dambami maloma agufumi esis Judai. ⁴Ea' na'i, "Ae' anda' waf aonai. Dei' main, awalapa aman anama bu'unai, owa' nonda' waf aonai, atuwasi neaga'."

Ea' amam ma'i, "Amama ina ofagema afa'imi, owa'. Amama ea' ofagema ine'imi atom."

⁵Ea' Judas nakwaha moni silva anama ipat lu'unai Godi nomon, nafe' anagon nandaha nail mandof ea' afuna.

⁶Amam pris amama dambami mafela moni anama mofa'ana ma'i, "Moni anama anan natala aman anama afa' wahana naga'i. Ea' afa' ina ombe' moni anama neloma moni na'oh ipat lu'unai Godi, owa'."

⁷Ea' amam ma'i anom basef mandame'mam ama moni anama manda'ana matala anona etapa anona aman nala' malohi. Ea' mofa' etap anama ma monda' hi'agilifa sowa epes isima lauginasi safi'i salomas sape saga'i. ⁸Ea' dei' sofala agiliguma sa'i, "Etap esimbel matalanai."

Agel anama ma etap anama dei' nandape. ⁹Ea' anom basef fowa' gani God nihi'amba anona aman profet Jeremaia nanda'ami, anama dei' mataga alihim mandawalap. Basef amama ma'iam na'ama ma'i,

"Amam mofa' otamba silva 30-peleim, esis Juda sandandepam ma aman anama. ¹⁰Ea' moni anama satala anona etapa anona aman nala' malohi, si'i Dembinai na'ipa ae' mehip."

Jisas nafe' naituma naep Pailati ea' Pailat nahali'ana

(Mk 15:2-5; Lu 23:3-5; Jo 18:33-38)

¹¹Amam mofa' Jisas mafe' naitu naep dembinai gavman Pailati ea' Pailat nahali'ana na'i, "Ine' king dembinai esis Judai o owa'?"

Ea' Jisas nagwamana basef na'i, "Basef amama ine' na'iami endilisimi."

¹²Ea' amam pris amama dambami maloma agufumi esis Judai mambaso'mana ma basef hiami, ea' anan ina nagwamam anom basef, o owa'.

¹³Ea' Pailat nahali'ana na'i, "Ine' name' basef amama hiami manda'menami o owa'?"

¹⁴Ea' Jisas ina nagwamana anom basef Pailat, owa'. Ea' dembinai gavman gegelalasang kwapete'.

Pailat na'i soha Jisas nail lawag usi'inai tu'wanainai

(Mk 15:6-15; Lu 23:13-25; Jo 18:39-19:16)

¹⁵Nogota anama gavman anama dembinai waf ananinai na'ama. Afagof hiami ma nemaf anama sanda' gwa'aimi lu'wami amama sa'i Pasova, anan nakwaha enin epen nanda' kalabusi nafe' wafifina. Emi epen esis amam nematawa hiesi sandandepanai, dembinai gavman na'i a'e nakwahona nafe'ma esis wafifina. ¹⁶Nemaf anama anona aman nanda' waf aonai nape nanda' kalabus, agilinama Barabas. Aman anama epes hiesi sagawa anan nanda' waf aonai endilisi. ¹⁷⁻¹⁸Ea' esis amam nematawa sunduwa'anima saituu. Pailat nogawa amam dambami esis Judai kowalama epes hiesi saila basef Jisasi ukup aom atom mapomana dei' manda' kotimana. Amama atom dei' nahali'as na'i, "Ipe' pa'i ae' ekwaha emi epen nekwaha kalabus nefe'mago ipe'?' Ekwaha Barabas o Jisas, esis sa'i Kraisi Dembinai?"

¹⁹Pailat nape ipat anama sanda' kotanai, waulu'mana anani'wi kwanda' basef mafi'mai anan kwa'i, "Ina nenda' anom amamaga awami ma aman anama bu'unai, owa'. Ae' do'ok a'oh owamb andondo'ah atolona ea' efa' nimanimi lu'wami ma Anan."

²⁰Ea' amam pris amama dambami maloma anom agufumi esis Judai mafela ukup ma esis amam nematawa hiesi ma sohali' Pailata nokwaha Barabas, ea' soha Jisas noga'.

²¹Ea' Pailat na'ipas wapoti' na'i, "Amam amama biam, ipe' pa'i ae' ekwaha emi epen nefe'mago ipe'?"

Ea' sa'ipana sa'i, "Barabas."

²²Ea' Pailat nahali'as na'i, "Aman anama Jisas ipe' pa'i Kraisi, ipe' pa'i ae' i'imamana?"

Ea' esis hiesi sa'i, "Undana nil lawag usi'inai tu'wanainai!"

²³Ea' Pailat nahali'as na'i, "Dei' main? Anan nanda' maina waf aonai?"

Ea' esis sa'i mehip endilisi sa'i, "Undana lawag hana afuna!"

²⁴Ea' Pailat nogawa basef ananiami ina la'ifim nahianas, owa'. Na'ama esis sohafel sonda' wandaf lu'unai. Ea' Pailat nolai embel nasa'opa lagof ananiami ma naep esis amam nematawa hiesi nihi'ambas na'iam na'i, "Ae' ina ati ofagema owa'etina eha aman anama noga', owa'. Ofagema amama ipe'imi atom."

²⁵Ea' amam nematawa hiesi sagwa basef sa'i, "Ea' ofagema amama mondafi'mai ape' moloma awasi ape'isi."

²⁶Ea' Pailat nakwaha Barabas nafe'ma esis. Ea' na'ipa amam soldia ma moha Jisas mofa'ana mafe' mundana lawag usi'inai ti'wanainai.

Amam soldia manda' salamala basef awami ma Jisas mahana manda'am mondola'wifana si'i anona dembinai king

(Mk 15:16-20; Jo 19:2-3)

²⁷Ea' amam soldia Pailati mofa' Jisas mawisi ipat amam gavmani lu'unai. Ea' mofala anom soldia hiami mafi'i munduwa'anima ma anan. ²⁸Ea' mowalia luwaguf maim ananiami malamana anona saket akwahinai. ²⁹Ea' mowalo'mana anona mandof higatagunai, malasana'ofana si'i hat mowalo'manana balaga ananinai. Ea' mase'ana anona alifita nahapilana lagel da'isinai ananinai. Amam mindiwa nembawa motawa felefele'ma anan, manda' salamalana ma'i basef findiwaimi ma anan ma'i, "Nemaf bu'unai, ine' king dembinai esis Judai!"

³⁰Ea' misi'wafana mandalombana alifita anama mohana timbi tambel balaga ananinai. ³¹Manda'ana findiwana ma ea', mowalimana saket anama, akwahinai malamana klos maim ananiami mofa'ana mafe'ma mundana lawag usi'inai tu'wanainai.

Amam soldia maunda Jisas lawag usi'inai tu'wanainai

(Mk 15:21-32; Lu 23:26-43; Jo 19:17-27)

³²Amam mohafel mafe' etin, mati anona aman Saimon Sairininai. Ea' amam soldia masapa'ana ma niegiambama Jisas nofa' lawag ananinai. ³³Ea' mafe' mataga anagon agiliguma Golgota. Ape' dei' mambomefagel ma'i, Pipitagel Balagaina. ³⁴Ea' mase'ana anom embel wainim mambomom malomana anona marasin numbutinai nea' embel mohagofa ekep pehana. Anan name' embel etin, nandaiwa'mam. ³⁵Amam maundana lawag usi'inai tu'wanainai ea', manda' satu ma luwaguf maim ananiami ma emi nikila' nefa'am mondondam atona etin. ³⁶Ea' amam tol mape anama mumafiana. ³⁷Ea' manda' anom basef mail lawag anama ilifunama felefele'ma balaga ananinai. Basef amama sanda' kotami Pailat nanda'ami mai'am na'ama ma'i, "AMAN ANAMA ANAN JISAS, DEMBINAI ESIS JUDAI."

³⁸Felefele'ma Jisas naila amam soldia maunda anom biam manda' waf aonai manda' wali. Amam maunda Jisas nail la'afen, ea' maunda amam

biam mail wa'owa'ol. ³⁹Ea' enis amam nematawa safe' safi'i esis sanda' salamala anan samboma balagah sa'iam na'ama ⁴⁰sa'i, "Ine' ewi, ine' netalona ipat anama lu'unai Godi, ma netanima nefelana nimeguf wanom wapoti', dei' nigiangbama ine'. I'i ine' nogalomana Godi, nendatagah nisila'i."

⁴¹Ea' amam pris dambami maloma amam mawalipasa mi'uli Godi maloma amam agufumi esis Judai wapoti', hiami malomam manda'ana findiwana na'ama etin si'i eses ma'i, ⁴²"Anan nagiambama enis epes ea' dei' ina nagiambama anan, owa'. Anan dembinai king esis Israeli! Ea' dei' nondatagah lawag ilif nisila'i ma ape' motolona mombale'efana. ⁴³Anan nembale'efa God na'iam na'i, 'Ae' nogalomana Godi.' Ea' i'i God okom ninilana, anan nigiangbamana."

⁴⁴Ea' amam amama biam makowalefi saundam malumana manda'ana findiwana si'i amam agufumi mali' manda'manam.

Jisas ea' naga'

(Mk 15:33-41; Lu 23:44-49; Jo 19:28-30)

⁴⁵Aon nahagasom owamb lu'unai nataga naofenia etap hiagoma esis Judai akotigin nape nafe' nafe' nataga aon nandamboma nape gani 3 klok wambomota. Ea' nataga howalagon wapoti'.

⁴⁶Felefele'ma aon nandamboma 3 klok, Jisas noga na'i mehip na'i, "Eloi, Eloi, lema sabaktani?"

Ape' mambomam ma'iam na'ama ma'i,

"God ae'inai, God ae'inai, dei' maina ine' nakwahowe?"

⁴⁷Ea' enis epes saitu felefele' same' anan na'iam na'ama sa'i, "Anan nofala profet Elaija."

⁴⁸^hEa' dei' atef anona aman nasagih nafe' mehip nofa' anom mosong mape naohi' nalam mowala embel wainimi numbutimi nagiam nasapa'am anona elifita nandowana nafe'ma Jisas nea' embel.

⁴⁹Ea' enis saitu sa'i, "Ata' ota' kwahowana, ma ata' muti Elaija atuwasi nifi' notagahona o owa'?"

⁵⁰Ea' Jisas noga na'i mehip endilisi wapoti' ea' na'i a'e, ea' ambal ananinai nandahi' nafe'ana.

⁵¹^jEa' lowaf anama lu'unai si'i uta netaol ipat lu'unai Godi nomon palalana gani ilif nowala etap nataga biefina. Ea' suwambon lu'unai nakoto' etap owah lu'wami kokwa'alam. ⁵²Ea' anama sawa epes saga'i hi'agilif mandawisi' ea' amam nematawa hiesi Godi fowa' saga'i sohafel

h 27:48 Sam 69:21 **i 27:48** Mosong mape naohi ofagema ma'i boan otalef dindagimi. I'i enin epen nefe' newala naoh nefa'ami ea' niwafi'ama owaf neham, ale'um magal. I'i ape' molam mowala embel, mowalom, mehip etin embel muwisam. **j 27:51** Eks 26:31-33; Hi 10:19-20

wapoti'. ⁵³ Esis sokwaha hi'aglif amama sape. Nemaf anama Jisas nohafel wapoti' esis sefe' suwis Jerusalem, wambel bu'unai God nandandepanai. Ea' epes hiesi satilis.

⁵⁴ Kepten anama dembinai numafi soldia hiami naloma amam soldia mape mumafi Jisasi mati amamaga amama. Nogota anama mati amamaga mataga etap nasol etin napan, umbamaham endilisi ma'i, "Endilisi, aman anama nogalomana Godi."

⁵⁵ ^kNematawa hiawai waila Jisasi wakwaha etap hiagoma Galili wafi'i wagiambamana awau waitu laogon watologon. ⁵⁶ ^lAno'w Maria Makdalai'wi. Ano'w agel atona Maria kola Jems naloma Josep. Ea' ano'w kola amam biam Sebedi batausana.

Amam masapa' Jisas nawis owap lu'unai nagal nawis nomon si'i ipat
(*Mk 15:42-47; Lu 23:50-55; Jo 19:38-42*)

⁵⁷ Ea' wambomota felefele' ma owamb anona aman Arimateainai agilinama Josep nafi'i. Anan amamaga hiamunai anan alupunai naila Jisasi. ⁵⁸ ^mEa' nafe'ma Pailat nahali'ana ma nofa'i alop Jisasi nowana. Ea' Pailat na'ipa amam soldia mehip ma Josep nofa'ana mose'anana. ⁵⁹ Ea' nofa'ana lowaf namunai bu'unai afitinai. ⁶⁰ Ea' nowa'ana nofa'ana nafe' nawis hi'agif ananinai dambainai, fowa' nagwasana nawis anona owap lu'unai. Ea' nasapa'ana nawis nambe'ana na'oh nomon. Ea' dei' namboma anona owap lu'unai nafe' nowalo uta hi'agif anama. Anan nanda'am na'ama ea' nafe'. ⁶¹ Ea' Maria Makdalai'wi kwaloma ano'w awau agel atona, awau biawa wape wa'ol felefele' ma hi'agif watologon.

Amam soldia mumafi hi'agif

⁶² Ama wafilu nemaf sandandomba amamaga gwa'aimi maim anama nafe'ma ea', amam pris dambami maloma amam Farisi mafe' matagama Pailat. ⁶³ Ea' ma'ipana ma'i, "Dembinai, afa' ukup mapoma anom basef aman anama nambaso'ami na'iami fowa' anan ata' nape. Anan na'iam na'ama na'i, 'Nimeguf wanom mefe'ma hi'ilam, ae' etanima ehafel wapoti!' ⁶⁴ Amama atom dei' ine' ni'ipa anom soldia mumafi hi'agif anama andeande'ma nimeguf wanom mefe' hi'ilam. Na'ama amam alupumi ananimi mifi'i mokoalopana mofa'ana mefe' mi'ipa esis amam nematawa mi'i, 'Anan notanima nehafel hi'agif wapoti!' Ea' baso'am anama dei'inai lu'una nikila' nali'i."

⁶⁵ Ea' Pailat na'ipam na'i, "Ipe' pe'wa anom soldia pefe' pewalo uta hi'agif anama la'ifina, si'i ukup ipe'imi ma'iam dende'ma gawa ipe'inai."

⁶⁶ rEa' amam mafe' mowalowa hi'agif anama la'ifina, ea' mosao'ma uta masaha'ana manda' anona ikwaf la'ifinai ma epes ina siniga'ana siowis. Ea' ma'ipa anom soldia mape mumafiagon.

Jisas notanima nohafel wapoti'
(Mk 16:1-10; Lu 24:1-10; Jo 20:1-18)

28 ¹Nemaf anama esis Juda sapoma noma'wanai Sabat nafe' hi'alana, ea' Sande^o nemaf nali'ma wik kuhimbata atona felefele'ma aon nielatowi, nematawa awama biawa Maria Makdalai'wi kwaloma ano'w agel atotona Maria wafi'i ma wieti hi'agif. ²Ea' sowambon lu'unai nasol mehipe. Ea' anona ensel Dembinai nisila'i gani heven, nafe' hi'agif nelefata owap anama nowalo uta nafe' na'oh wa'ol ea' natomana. ³ pAmaga ananinai howalona nafifil endilisi si'i otaga pelele'ala howalagon ea' lu'waguf maim ananiami afitim endilisi si'i ais mandati. ⁴Ea' soldia amama mumafi hi'agifi umbamaham kwapete'am endilisi mowa ma'oh etap si'i saga'i.

⁵Ea' ensel anama na'ipa awau biawa na'i, "Ipe' bipa ina umbamehepa, owa'. Ae' egawa ipe' pafi'i pa'i piti Jisas, aman anama esis sahana naga' lawag usi'inai tu'wanainai. ⁶ qAnan ina ata' nape na'ae, owa'. Notanima nohafel ea' si'i fowa' nali' na'ipipa! Ipe' fi'i ma ata' piti na'ae na'oma. Dei' wafigin nape. ⁷ rDei' ipe' fo'o mehipe pi'ipa alupumi ananiami pi'i, 'Anan nahafel wapoti' ea'. Peme'. Anan nali'ipa nafe' etap hiagoma Galili. Ipe' fo'o potolona gani.' Basef ae'ami ea' amama."

⁸Ea' awau umbamahawa ea' wandanifel endilisi wapoti', mehipe wakwaha hi'agif wasagih wafe'ma wie'ipa amam alupumi ananiami. ⁹Dei' atef Jisas nati awau eaf nanda'mawa gude na'i, "Nemaf bu'unai ipe'."

Ea' awo wafe' felefele'ma anan wahapila bo'wagah ananiami ma onda' lotuma anan.

¹⁰Ea' Jisas na'ipawa na'i, "Ipe' ina umbamehepa, owa'. Ipe' bipa pefe' pi'ipa amam owape ae'ami mofolo Galili. Atuwasi motolowe ganima."

Basef amam soldia mumafi hi'agif

¹¹Nematawa awama biawa ata' wafe' eaf etin, anom soldia mumafi hi'agifi mafe' mawis taun anama ma'ipa amam pris dambami ma amamaga amama matagai. ¹²Ea' pris amama maloma agufumi esis Judai ma'i anom basef mandame'mam ea' mase'ama moni hianai nafe'ma soldia amama ea' ¹³ ma'ipam ma'i, "Ipe' pi'iam na'ama pi'i, 'Owamb afa'

n 27:66 Dan 6:17 **o 28:1** Basef ofagema ma nemaf Sande mape na'ama. Diga Griki naloma diga Inglisi na'i nemaf nali'i ma wik. Ea' basef amama ma'i maina nemaf? Amama ina alihima epes hiesi, owa'. Ea' dei' basef amama Sande mape buk anae'. **p 28:3** Mt 17:2; Ap 1:10 **q 28:6** Mt 12:40, 16:21 **r 28:7** Mt 26:32

wa'ihhi, amam alupumi ananiami mafi'i makoalopana mofa'ana.' ¹⁴Ama gavman dembinai neme' basefana, afa' onda' okom ananinai awanena ipe' basef a'epa.”

¹⁵Ea' amam soldia mofa' moni anama mame' basef amamumi magi'mam. Ea' basef amama ea' mafe'agon hi'alagon wambel hiagoma esis Juda, ea' ata' sa'iam etin mafi'i matagama dei' sa'iam la'ela'ef.

**Jisas nase'ama maol amam alupumi ma mofe' meawalapa basef bu'wami
ananiami**

(Mk 16:14-18; Lu 24:36-49; Jo 20:19-23)

¹⁶Ea' amam alupumi 11-peleim mafe' Galili mataga halaf anama Jisas nali' na'ipam meafe'ma. ¹⁷Ea' mati Jisas mafela agel ananinai manifelona. Ea' anom ukup biambiefim mapeim.

¹⁸Ea' Jisas nafi'i felefele'ma amam na'ipam na'i, “God nase'eana agel lu'unai ma pepel ilifanai etapanai ea'. ¹⁹Na'ama dei' ipe' pefe' wambel hiagoma piwalipa amam nematawa sape wambotogw hiami piwalipasa basef bu'wami ae'ami, penda'as sotaga alupisi ae'asi ma siela basef Ae'ami andeande' ea' pipisi'as embela agel Ahalomei noloma Ae'anai noloma Ambal Bu'unai Ananinai. ²⁰Ea' piwalipasa sila basef bu'wami hiami ae'ami fowa' awalipipami ma basef la'ifimi. Endilisi ae' ape alomepa ma nimeguf hiami danda, pefe' pefe' ma nemaf akutainai nogota hi'ilana.”